

Kinohi

KA BUKE MUA A MOSE, IKAPAIA

- ¹ I KINOHI hana ke Akua i ka lani a me ka honua.
- ² He ano ole ka honua, ua olohelohelohe; a maluna no
o ka hohonu ka pouli. Hoopunana iho la ka
Uhane o ke Akua maluna o ka wai.
- ³ I iho la ke Akua, I malamalama; a ua mala-
malama ae la.
- ⁴ Nana ae la ke Akua i ka malamalama, ua maikai:
a hookaawale ae la ke Akua mawaena o ka
malamalama, a me ka pouli.
- ⁵ Kapa mai la ke Akua i ka malamalama, he Ao,
a kapa mai hoi ia i ka pouli, he Po. A o ke
ahiahi a me ke kakahiaka, o ka la mua ia.
- ⁶ I iho la ke Akua, I aouli mawaena o na wai, i mea
hookaawale i kekahih wai me kekahih wai.
- ⁷ Hana iho la ke Akua i ke aouli; a hookaawale ae
la ia i ka wai malalo o ke aouli, me ka wai
maluna o ke aouli: a pela io no.
- ⁸ Kapa iho la ke Akua i ke aouli, he Lani. A o ke
ahiahi a me ke kakahiaka, o ka lua ia o ka
la.
- ⁹ I iho la ke Akua, E hui pu na wai malalo o ka lani
i kahi hookahi, i ikeai ai kahi maloo: a pela
io no.
- ¹⁰ Kapa iho la ke Akua i kahi maloo, he Aina; a
kapa iho la oia i na wai i hui pu ia 'i, o na
moana: a nana ae la ke Akua, ua maikai.

- 11 I iho la ke Akua, E hooulu mai ka honua i ka mauu, a me ka launahele e hua ana i ka hua, a me ka laau hua e hua ana hoi ma kona ano iho, iloko ona iho kona hua maluna o ka honua: a pela io no.
- 12 A hooulu mai la ka honua i ka mauu, a me ka launahele e hua ana i ka hua ma kona ano iho, a me ka laau e hua ana i ka hua, iloko ona kona hua ma kona ano iho: nana iho la hoi ke Akua, ua maikai.
- 13 A o ke ahiahi a me ke kakahiaka, o ke kolu ia o ka la.
- 14 I iho la ke Akua, I mau malamalama iloko o ke aouli o ka lani, i mea hookaawale i ke ao a me ka po; i mau hoailona lakou no na kau, a no na la, a me na makahiki:
- 15 I mau kukui hoi lakou iloko o ke aouli o ka lani, e hoomalamalama mai ai i ka honua: a pela io no.
- 16 Hana iho la ke Akua i na malamalama nui elua: o ka malamalama nui, e alii ai maluna o ke ao, a o ka malamalama uuku iho, e alii ai maluna o ka po, a me na hoku hoi.
- 17 Kauaku la ke Akua ia mau mea ma ke aouli o ka lani, e hoomalamalama mai ai i ka honua,
- 18 E hooalii hoi maluna o ke ao a me ka po, a e hookaawale ae i ka malamalama a me ka pouli: a nana iho la ke Akua, ua maikai.
- 19 A o ke ahiahi a me ke kakahiaka, o ka ha ia o ka la.
- 20 I iho la ke Akua, E hoohua nui mai na wai i na mea ola e holo ana, a me na manu e lele ae maluna o ka honua, ma ka lewa akea o ka lani.

- 21** Hana iho la ke Akua i na ia nui, a me na mea ola a pau e holo ana, a ka wai i hoohua nui mai ai ma ko lakou ano iho a me na mea eheu hoi a pau ma ko lakou ano iho: a nana iho la ke Akua, ua maikai.
- 22** Hoomaikai iho la ke Akua ia mau mea, i iho la, E hoohua ae oukou e hoolaha nui hoi, a e hoopihia i na wai o na moana; a e hoolaha ae na manu maluna o ka honua.
- 23** O ke kakahiaka a me ke ahiahi, o ka lima ia o ka la.
- 24** I iho la ke Akua, E hoohua mai ka honua i ka mea ola ma kona ano iho, i ka holoholona laka, me ka mea kolo, a me ka holoholona hihiu ma kona ano iho: a pela io no.
- 25** Hana iho la ke Akua i ka holoholona hihiu ma kona ano iho, me na holoholona laka ma ko lakou ano iho, a me na mea kolo a pau o ka honua ma ko lakou ano iho: a nana iho la ke Akua, ua maikai.
- 26** I iho la ke Akua, E hana kakou i ke kanaka o ku ia kakou, ma ka like ana me kakou iho: a e hooalii ia ia maluna o na ia o ke kai, maluna hoi o na manu o ka lewa, maluna hoi o na holoholona laka, a maluna hoi o ka honua a pau, a maluna no hoi o na mea kolo a pau e kolo ana ma ka honua.
- 27** Hana iho la ke Akua i ke kanaka ma kona ano iho, ma ke ano o ke Akua oia i hana'i ia ia; hana mai la ia i kane a i wahine.
- 28** Hoomaikai mai la ke Akua ia laua, i mai la hoi ke Akua ia laua, E hoohua ae olua, e hoolaha hoi, e hoopihia i ka honua, a e lanakila maluna, a e noho alii maluna o na ia o ke

kai, a me na manu o ka lewa, a me na mea a pau e kolo ana maluna o ka honua.

²⁹ I mai la ke Akua, Aia hoi, na haawi aku au na olua i na launahel a pau e hua ana i ka hua maluna o ka honua a pau, a me na laau a pau iloko ona ka hua o ka laau e hua ana i ka hua; he mea ai ia na olua.

³⁰ A na ka poe holoholona a pau o ka honua, me na manu a pau o ka lewa, a me na mea a pau e kolo ana ma ka honua, na mea e ola ana, na lakou ka nahelehele a pau i mea ai: a pela io no.

³¹ Nana iho la ke Akua i na mea a pau ana i hana'i, aia hoi, ua maikai wale no. A o ke ahiahi a me ke kakahiaka, o ke ono ia o ka la.

2

¹ PELA i paa ai ka lani a me ka honua i ka hanaia, a me ko laila poe mea a pau.

² A i ka hiku o ka la, hooki iho la ke Akua i ka hana ana i hana'i: a hoornaha iho la oia i kana hana a pau ana i hana'i.

³ Hoomaikai mai la ke Akua i ka hiku o ka la, a hoano iho la; no ka mea, hoomaha iho la oia ia la i ka hana a pau a ke Akua i hana'i.

⁴ Eia ka mooolelo no ka lani a me ka honua i ka wa i hanaia'i ia mau mea, i ka la a Iehova a ke Akua i hana'i i ka honua a me ka lani.

⁵ A me na mea kanu a pau o ka mahiuuai, i ka wa aole ia maloko o ka honua, a mo na launahel a pau o ke kula mamua o kona ulu ana: no ka mea, aole i hooua mai o

- Iehova ko Akua i ka ua maluna o ka honua,
aoles hoi he kanaka nanā e mahi ka aina.
- ⁶ Aka, pii aku la ka ohu mai ka honua aku, a
hoomau iho la i ka ili a pau o ka aina.
- ⁷ Hana iho la o Iehova ke Akua i ke kanaka, he lepo
o ka honua, a ha iho la ia i ka hanu ola iloko
o na puka ihu ona; a lilo ae la ke kanaka i
mea ola.
- ⁸ Kanu iho la o Iehova ke Akua i ka mahinaai
maloko o Edena ma ka hikina; a malaila oia
i hoonoho iho ai i ke kanakā ana i hana'i.
- ⁹ Hooulu ae la o Iehova ke Akua i na laau a pau
mailoko ae o ka honua, i na mea oluolu no
ka maka, i na mea ono hoi ke ai; i ka laau o
ke ola hoi iwaena konu o ka mahinaai, a me
ka laau i ikeā'i ka pono a me ka hewa.
- ¹⁰ Kahe ae la kekahi muliwai mai Edena aku e
hoomau i ka mahinaai; a malaila aku, man-
amana ae la ia a lilo i eha mana.
- ¹¹ O Pisona kā inoa o ka mua: oia no ka mea o
hoopuni ana i ka aina a pau o Havila, he
wahi gula ia;
- ¹² A he maikai ke gula o ia aina: ilaila no ka
deliuma a me ka pohaku onika.
- ¹³ O Gihona ka inoa o ka lua o ka muliwai: oia ka
mea e hoopuni ana i ka aina a pau o Aitiopa.
- ¹⁴ O Hidekela ka inoa o ke kolu o ka muliwai: oia
ka mea e kahe ana ma ka aoao hikina o
Asuria. A o Euperate ka inoa o ka ha o ka
muliwai.
- ¹⁵ Lawe ae la o Iehova ke Akua i ke kanaka, a
hoonoho iho la ia ia ma ka mahinaai ma
Edena, e mahi a e malama ia wahi.

- ¹⁶ Kauoha mai la o Iehova ke Akua i ke kanaka, i mai la, E ai wale oe i ko keia laau kela laau o ka mahinaai nei:
- ¹⁷ Aka, o ko ka laau i ike a i ka pono a me ka hewa, mai ai iho oe ia mea: no ka mea, i kou la e ai ai ia mea, he oiaio no e make oe.
- ¹⁸ I iho la o Iehova ke Akua, Aole pono ke kanaka ke noho, oia wale; e hana no wau i kokoolua nona e ku ia ia.
- ¹⁹ No ka lepo i hana'i o Iehova ke Akua i na holoholona a pau o ke kula, a me na manu a pau o ka lewa, a kai mai la ia lakou io Adamu la, i ike a inoa a Adamu e kapaaku ai ia lakou: a o ka inoa a Adamu i kapaaku ai i na mea ola a pau, oia iho la kona inoa.
- ²⁰ Kapaaku la o Adamu i na inoa no na holoholona laka a pau, a no na manu o ka lewa, a no na holoholona hiihiu a pau; aka no Adamu, aole i loaa kona kokoolua e ku ia ia.
- ²¹ Hookau mai la o Iehova ke Akua i ka hiamoe nui ia Adamu, a hiamoe iho la ia: unuhi ae la kela i kekahi iwiaoao ona, a hoopili iho la ia i ka io ma kona wahine.
- ²² A o ka iwiaoao a Iehova ke Akua i unuhi mai ai noloko mai o ke kanaka, hana iho la oia ia mea i wahine, a alakai ae la ia ia i ke hanaka.
- ²³ I aku la o Adamu, Oia nei no ka iwi o kuu mau iwi, a me ka io o kuu io; e kapaia oia nei, wahine, no ka mea, ua unuhia ae oia mailoko ae o ke kane.
- ²⁴ No keia mea, e haalele aku ke kanaka i kona makuakane a me kona makuwahine, a e

pili aku oia i kana wahine: a e lilo laua i io hookahi.

²⁵ Aohe kapa o laua a elua, o ke kane a me kana wahine, aole hoi o laua hilahila.

3

¹ U A oi aku ka maalea o ka nahesa i ko na holoholona o ke kula a pau a Iehova ke Akua i hana'i. I mai la ia i ka wahine, He oiaio anei, ua papa mai ke Akua, Aole olua e ai i ko na laau a pau o ka mahinaai nei!

² I aku la ka wahine i ka nahesa, E pono no maua ke ai i ka hua o na laau o ka mahinaai nei:

³ Aka, o ka hua o ka laau iwaena konu o ke kihapai, ua i mai ke Akua, Mai ai olua ia mea, aole hoi e hoopaaaku, o make olua.

⁴ Olelo mai la ka nahesa i ka wahine, Aohe oiaio e make olua:

⁵ No ka mea, ua ike no ke Akua, a i ka la e ai ai olua ia mea, e hookaakaia auanei ko olua mau maka; a e like olua me ke Akua, i ka ike i ka pono a me ka hewa.

⁶ A ike ae la ka wahine, he ono ko ia laau i mea ai, a he maikai hoi i na maka, a he laau makemakeia i mea hoonaauao, lalauaku la ia i kona hua, ai iho la, a haawiaku la hoi na kana kane me ia, a ai iho la no hoi oia.

⁷ A hookaakaia ae la na maka o laua a elua, a ike iho la laua, aohe o laua kapa; kui iho la laua i na lau fiku a paa, i mau papalu no laua.

⁸ Lohe ae la laua i ka leo o Iehova ke Akua, e holoholo ana ma ka mahinaai i ka wa malu

o ka la: pee iho la o Adamu me kana wahine
mawaena o na laau o ua mahinaai la, mai
ke alo aku o Iehova ke Akua.

⁹ Hea mai la o Iehova ke Akua ia Adamu, i mai la
ia ia, Auhea oe?

¹⁰ I aku la oia, I lohe au i kou leo iloko o ka
mahinaai nei, a makau no wau, no ka mea,
aohe o'u kapa, a pee iho la au.

¹¹ I mai la kela, Nawai i hai mai ia oe, aohe ou
kapa? Ua ai anei oe i ko ka laau a'u i papa
aku ai ia oe, Mai ai oe!

¹² Olelo aku la ke kanaka, Na ka wahine au i haawi
mai ai na'u, nana no i haawi mai i ko ka
laau, a ai iho la au.

¹³ I mai la o Iehova ke Akua i ka wahine, Heaha
keia mea au i hana'i! I aku la ka wahine, Na
ka nahesa wau i hoowalewale mai, a ai iho
la au.

¹⁴ I aku la o Iehova ke Akua i ka nahesa, No kau
hana ana ia mea, e oi aku kou ahewaia
i ko na holoholona laka a pau, a i ko na
holoholona hihiu a pau o ke kula; ilalo kou
alo e kolo ai oe, o ka lepo kau e ai ai, a pau
na la o kou ola ana.

¹⁵ E waiho no au i ka inaina mawaena o olua a me
ka wahine, a mawaena hoi o kou hua a me
kona hua; nana e paopao iho kou poo, a nau
hoi e pakukui aku kona kuekuewawae.

¹⁶ I mai la hoi oia i ka wahine, E hoonui loa aku au
i ka eha o kou hapai ana: me ka eha hoi oe e
hanau mai ai i na keiki; a o kou makemake
aku aia no ia i kau kane, a oia hoi kou haku.

¹⁷ I mai la hoi oia ia Adamu, No ka mea, ua hoolohe
oe i ka leo o kau wahine, a ua ai hoi i ko ka

laau a'u i papa aku ai ia oe, i ka i ana, Mai ai oe ia mea, ua hoohewaia ka aina nou; me ka luhi oe e ai ai i kana, a pau na la o kou ola ana:

¹⁸ E hookupu mai no hoi ia i na kakalaioa a me na puakala nau; a nau no e ai i na mea kanu o ka waena.

¹⁹ Me ka hou o kou maka e ai ai oe i ka ai, a hiki i kou wa e hoi hou aku ai i ka lepo; no ka mea, mailaila oe i laweia mai ai; no ka mea, he lepo no oe, a e hoi hou aku oe i ka lepo.

²⁰ Kapaaku la o Adamu i ka inoa o kana wahine, o I Eva; no ka mea, ka makuwahine ia o na kanaka a pau.

²¹ A hana iho la o Iehova ke Akua i na kapa ili no Adamu a no kana wahine, a hoaahu iho la ia laua.

²² I iho la o Iehova ke Akua, Aia hoi, ua like ke kanaka me kekahi o kakou, ka ike i ka pono a me ka hewa: ano hoi, o lalau aku kona lima, a lawe hoi i ko ka laau ola, ai iho a ola mau loa aku:

²³ No ia mea, kipakuaku la o Iehova ke Akua ia ia iwaho o ke kihapai o Edena, e mahi i ka lepo, kahi ana i laweia mai ai.

²⁴ Pela oia i kipaku ai i ke kanaka; a hoonoho iho la ma ka hikina o ka mahinaai o Edena i na kerubima, a me ka pahi wakawaka e ka ana io ia nei i maluhia'i ke ala ma ka laau ola.

4

¹ A IKEaku la o Adamu i kana wahine ia Eva; hapai

- ae la oia, a hanau mai la ia I Kaina, i mai la,
 Ua loaa no ia'u he kanaka no Iehova mai.
- ² Hanau hou iho la oia i kona kaikaina ia Abela. He
 kahuhipa o Abela, a he mahiai o Kaina.
- ³ Mahope iho o na la, lawe aku la o Kaina i kekahi
 hua o ka honua i mohai na Iehova.
- ⁴ Lawe aku la hoi o Abela i kekahi o na hanau mua
 o kana poe hipa, i na mea momona hoi. A
 maliu mai la o Iehova ia Abela a me kana
 mohai:
- ⁵ Aka, aole ia i maliu mai ia Kaina a me kana
 mohai. Huhu loa iho la o Kaina, a kulou iho
 la kona maka ilalo.
- ⁶ I mai la o Iehova ia Kaina, Heaha kau i huhu ai?
 No ke aha hoi i kulou iho ai kou maka ilalo!
- ⁷ A i hana pono oe, aole anei oe e maliuia'ku? a
 i ole oe e hana i ka pono, ke waiho la ka
 mohai hala ma ka puka. A ia oe no ko ia la
 makemake, a e alii iho oe maluna ona.
- ⁸ Kamailio ae la o Kaina me kona kaikaina, me
 Abela: a ia laua ma ka waena, ku ae la o
 Kaina me ke ku e i kona kaikaina ia Abela,
 pepehi iho la ia ia a make.
- ⁹ Olelo mai la o Iehova ia Kaina, Auhea la o Abela
 o kou kaikaina! Iaku la oia, Aole au i ike:
 owau anei ke kahu o kuu kaikaina!
- ¹⁰ I mai la kela, Heaha kau i hana iho net? ke hea
 mai nei ka leo o ke koko o kou kaikaina ia'u
 mai ka lepo mai.
- ¹¹ Ma keia hone aku, e hoohewaia'ku ai oe mai ka
 honua ae, i hamama ae kona waha e ale i ke
 koko o kou kaikaina, na kou lima aku.
- ¹² I kou mahi ana i ka honua, aole ia e hua mai ma
 keia hope i kona momona: a e lilo hoi oe i

kanaka aea a me ke kuewa wale maluna o ka honua.

¹³ Iaku la o Kaina ia Iehova, He nui loa kuu hewa: aole paha ia e hiki ke kalaia.

¹⁴ Aia hoi, ua kipaku aku oe ia'u i keia la mai ke alo aku o ka honua nei; a ua hookaawaleia au mai kou alo aku; a e lilo ana au i kanaka aea me ke kuewa wale maluna o ka honua; a i loaa au i kekahī, e pepehi mai ia ia'u a make.

¹⁵ I mai la o Iehova ia ia, Nolaila, o ka mea nana e pepehi ia Kaina, e pahiku ka hoopai ana i kona hewa. A kau iho la o Iehova i hoailona maluna o Kaina, o loaa ia i kekahī nana ia e pepehi aku a make.

¹⁶ Hele aku la o Kaina mai ke alo aku o Iehova, a noho iho la ma ka aina o Noda, ma ka hikina o Edena.

¹⁷ Ike aku la o Kaina i kana wahine; hapai ae la oia, a hanau mai la ia Enoka: kukulu iho la oia i kulanakauhale, a kapa iho la i ka inoa o ua kulanakauhale la, mamuli o ka inoa o kana keiki, o Enoka.

¹⁸ Na Enoka hoi i hanau mai o Irada: na Irada hoi o Mehuiaela: na Mehuiaela o Metusaela: na Metusaela o Lameka.

¹⁹ Lawe ae la o Lameka i na wahine elua nana: o Ada ka inoa o kekahī, a o Zila ka inoa o kekahī.

²⁰ Na Ada i hanau mai o Iabala: o ka makamua ia o ka poe noho halelewa, a o ka hanai holoholona.

- ²¹ A o Iubala ka inoa o kona kaikaina: o ka maka-mua ia o ka poe a pau i hookani i ka lira a me ka ohe.
- ²² A o Zila, hanau mai no hoi nana o Tubalakaina, oia ke kumu a na paahana a pau e kui ana i ke keleawe a me Ka hao: a o Naama ke kaiku wahine o Tubalakaina.
- ²³ I aku la o Lameka i na wahine ana, ia Ada, laua o Zila, E hoolohe mai olua i ko'u leo; e na wahine a Lameka, e haliu mai i ka'u olelo: no ka mea, ua pepehi iho la au i ke kanaka no ka hoeha ana mai ia'u, i ke kanaka opio opio no ka paopao ana mai ia'u.
- ²⁴ Ina paha e pahiku ka hoopai ana no Kama, he oiaio no, e pakana hiku me kumamahiku hoi ia no Lameka.
- ²⁵ Ike hou iho la o Adamu i kana wahine; a hanau mai la ia he keikikane, a kapaaku la i kona inoa o I Seta: No ka mea, ua haawi mai la ke Akua i ka hua hou na'u, wahi ana, i panihakahaka no Abela i pepehiia e Kaina.
- ²⁶ Na Seta hoi i hanau kekahi keikikane; a kapa iho ia i kona inoa o Enosa: ia manawa ka hoomaka ana o na kanaka e kahea aku i ka inoa o Iehova.

5

- ¹ EIA ka olelo kuauhau no na hanauna o Adamu. I ka la a ke Akua i hana'i ke kanaka, ma ke ano o ke Akua kana i hana mai ai ia ia.
- ² He kane laua me ka wahine kana i hana'i; hoomaikai iho la oia ia laua, a kapa iho la i ko laua inoa o Adamu, i ka la i hanaia'i o laua.

- ³ Hookahi haneri makahiki o ko Adamu ola ana
a me kanakolu, a hanau mai nana ke
keikikane i ku ia ia, ma kona ano iho; a kapa
aku la i kona inoa o Seta:
- ⁴ O na la o Adamu mahope mai o ka hanau ana o
Seta, ewalu ia haneri makahiki: a nana mai
na keikikane a me na kaikamahine:
- ⁵ O na la a pau o ko Adamu ola ana, he eiwa haneri
makahiki a me kanakolu: a make iho la ia.
- ⁶ Hookahi haneri makahiki a me kumamalima o
ko Seta ola ana, a hanau ae la o Enosa nana:
- ⁷ Ewalu haneri makahiki o ko Seta ola ana a me
kumamahiku mahope mai o ka hanau ana
o Enosa, a nana mai na keikikane a me na
kaikamahine.
- ⁸ O na la a pau o Seta, eiwa ia haneri makahiki a
me ka umikumamalua: a make iho la ia.
- ⁹ He kanaiwa makahiki o ko Enosa ola ana, a
hanau ae la o Kainana.
- ¹⁰ Ewalu haneri makahiki a me ka umikumamal-
ima o ko Enosa ola ana, mahope mai o
ka hanau ana o Kainana, a nana mai na
keikikane a me na kaikamahine:
- ¹¹ O na la a pau o Enosa, eiwa haneri makahiki a
me kumamalima: a make iho la ia.
- ¹² He kanahiku na makahiki o ko Kainana ola ana,
a hanau mai o Mahalaleela nana:
- ¹³ Mahope mai o ka hanau ana o Mahalaleela,
ewalu haneri makahiki o ko Kainana ola
ana a me kanaha, a nana mai na keikikane
a me na kaikamahine:
- ¹⁴ A o na la a pau o Kainana, eiwa haneri makahiki
a me ka umi keu: a make iho la ia.

- 15 He kanaono na makahiki a me kumamalima o ko Mahalaleela ola ana, a hanau ae la o Iareda nana.
- 16 Mahope mai o ko Iareda hanau ana, ewalu haneri makahiki a me ke kanakolu o ko Mahalaleela ola ana, a nana mai na keikikane a me na kaikamahine.
- 17 O na la a pau o Mahalaleela, ewalu ia haneri makahiki a me kanaiwa kumamalima: a make iho la ia.
- 18 Hookahi haneri makahiki o ko Iareda ola ana a me kanaonokumamalua, a hanau ae la o Enoka nana.
- 19 Mahope mai o ka hanau ana o Enoka, ewalu haneri makahiki o ko Iareda ola ana, a nana mai na keikikane a me na kaikamahine.
- 20 O na la a pau o Iareda, eiwa ia haneri makahiki a me ke kanaonokumamalua: a make iho la ia.
- 21 He kanaonokumamalima na makahiki o ko Enoka ola ana, a hanau ae la o Metusala nana.
- 22 Hele pu ae la o Enoka me ke Akua, ekolu haneri makahiki mahope mai o ka hanau ana o Metusala, a nana mai na keikikane a me na kaikamahine:
- 23 O na la a pau o Enoka, ekolu haneri na makahiki a me kanaonokumamalima:
- 24 Hele pu ae la o Enoka me ke Akua, aole ia i make; no ka mea, na ke Akua ia i lawe aku.
- 25 Hookahi haneri makahiki o ko Metusala ola ana a me kanawalukumamahiku, a hanau ae la o Lameka nana.

- 26 Mahope mai o ka hanau ana o Lameka, ehiku haneri me ke kanawalukumamalua na makahiki o ko Metusala ola ana, a nana mai na keikikane a me na kaikamahine.
- 27 O na la a pau o Metusala, eiwa haneri na makahiki a me kanaonokumamaiwa: a make iho la ia.
- 28 Hookahi haneri na makahiki a me ke kanawalukumamalua o ko Lameka ola ana, a hanau ae la ke keikikane nana:
- 29 Kapa aku la ia i kona inoa, o Noa, i ae la, E hoomaha mai oia nei ia kakou i ka kakou hana ana a me ka luhi ana a ko kakou mau lima, no ka honua a Iehova i hoino mai ai.
- 30 Mahope mai o ka hanau ana o Noa, elima haneri na makahiki a me kanaiwakumamalima o ko Lameka ola ana, a nana mai na keikikane a me na kaikamahine.
- 31 A o na la a pau o Lameka, ehiku haneri makahiki a me kanahikukumamahiku: a make iho la ia.
- 32 Elima haneri makahiki o Noa: a nana mai o Sema, a o Hama, a me Iapeta.

6

- ¹ A I ka wa o ka hoomaka ana e mahuahua ai na kanaka maluna o ka honua, a ua hanau mai na kaikamahine a lakou.
- ² Ike ae la na keiki a ke Akua i na kaikamahine a na kanaka, ua maikai lakou; lalau aku la lakou i na mea a lakou i makemake ai i mau wahine na lakou.
- ³ I iho la o Iehova, Aole e noho loa ana kuu Uhane me kanaka, no ka mea, he kino no ia; aku,

o kona mau la ma keia hope aku, he haneri makahiki ia a me ka iwakalua.

⁴ Noho iho la na kanaka nunui ma ka honua ia manawa; a mahope aku, a komo aku la na keiki a ke Akua iloko i na kaikamahine a na kanaka, a hanau mai na lakou ka poe kanaka ikaika, he poe kanaka kaulana lakou i ka wa kahiko.

⁵ A ike mai la ke Akua, he nui ka hewa o kanaka ma ka honua, a ua hewa wale no ka noonoo ana o kona naau, ana i manao ai i na la a pau.

⁶ A mihi iho la o Iehova i kana hana ana i na kanaka maluna o ka honua, a ua ehaeha kona naau.

⁷ I iho la o Iehova, E luku auanei au i na kanaka a'u i hana'i, mai ke alo aku o ka honua, i na kanaka a me na holoholona, a me na mea kolo, a me na manu o ka lewa: no ka mea, ke mihi nei au i ka'u hana ana ia lakou:

⁸ Aka, loaa ia Noa ke alohaia mai imua o Iehova.

⁹ Eia ka mooolelo no Noa: He kanaka pono o Noa, a he hemolele iwaena o na hanauna ona, a hele pu o Noa me ke Akua.

¹⁰ Ua hanau mai na Noa ekolu keikikane, o Sema, o Hama, a o Iapeta.

¹¹ Ua inoino hoi ka honua imua o ke Akua; a ua piha ka honua i ka hoino.

¹² Nana mai la ke Akua i ka honua, aia hoi, ua inoino ia; no ka mea, ua hana ino na kanaka a pau i ko lakou aoao ma ka honua.

¹³ Olelo mai la o Iehova ia Noa, Ua hiki mai i ko'u alo nei ka hope o na mea ola a pau; no ka

mea, ua piha ka honua i ka hoino ma o lakou la: aia hoi, e luku auanei au ia lakou ma ka honua.

¹⁴ E hana oe i halelana nou; e hana hoi oe i na keena maloko o ka halelana, a e hapala ae i ke kepau maloko a mawaho.

¹⁵ Penei kau e hana aku ai: ekolu haneri kubita o ka loa o ka halelana, he kanalima na kubita ka laula, a he kanakolu na kubita o kona kiekie.

¹⁶ He malamalama kau e hana'i ma ka halelana, a e hoopaa ia mea maluna ma ke kubita; a e kau oe i ka pukakomo o ka halelana ma kona paia: a he papalalo, me ka papawaena, a me ka papaluna kau e hana'i ma ia mea.

¹⁷ A owau la e, e lawe mai ana au i ke kaiakahinalii maluna o ka honua, i mea e lukuia'i na mea io a pau, i ka poe nona ka hanu ola malalo o kalani; a e make na mea a pau ma ka honua.

¹⁸ Aka, e hoopaa aku au i ka'u berita ia oe; a e komo ae oe iloko o ka halelana, o oe, me kau mau keikikane, a me kau wahine, a me na wahine a kau mau keikikane.

¹⁹ A no na mea io a pau e ola ana, e lawe oe i elua o kela mea keia mea iloko o ka halelana, i kane i wahine, i malama ola pu ia lakou me oe.

²⁰ O na manu ma ko lakou ano, a o na holoholona, ma ko lakou ano, a o kela mea kolo keia mea kolo o ka honua, ma kona ano iho, e hele papalua mai lakou iou la, i malama ola ia lakou.

- 21** E lawe oe nau i na mea ai a pau, a e hoiliili oe ia iou la; i mea ai nau, a na lakou.
- 22** Pela o Noa i hana'i; ma ka mea a pau a ke Akua i kauoha mai ai ia ia, pela oia i hana'i.

7

- 1** I MAI ia o Iehova ia Noa, E komo ae oe me kau ohana a pau iloko o ka halelana; no ka mea, o oe no o keia hanauna ka'u i ike ai, he pono imua o'u.
- 2** O na holoholona maemae a pau, e lawe pahiku aku oe ia lakou me oe, i ke Kane a me kana wahine; a o na holoholona maemae ole, e papalua he kane me kana wahine,
- 3** E pahikuia no hoi na manu o ka lewa, ke kane, ka wahine, e hoola i kumuholaha maluna o ka honua a pau.
- 4** No ka mea, ehiku la e koe, alaila e hoooua iho ai au maluna o ka honua he kanaha la a me na po; a e luku ana au i na mea ola a pau a'u i hana'i, mai ke alo o ka honua aku.
- 5** Hana iho la o Noa i na mea a pau a Iehova i kauoha mai ai ia ia.
- 6** Eono haneri na makahiki o Noa i ka wa i hiki mai ai ke kaiakahinalii maluna o ka honua.
- 7** Komo aku la e Noa me na keikikane ana, a me kana wahine, a me na wahine a kana mau keikikane iloko o ka halelana, no ke kaiakahinalii.
- 8** O na holoholona maemae a me na holoholona maemae ole, a o na manu, a me na mea kolo a pau maluna o ka honua.

- ⁹ Komo papalua aku la lakou iloko io Noa la, ke kane, ka wahine, me ka ke Akua i kauoha mai ai ia Noa.
- ¹⁰ A hala ae la na la ehiku, hiki mai ke kaiakahinalii maluna o ka honua.
- ¹¹ I ka makahiki eono haneri o ko Noa ola ana, i ka lua o ka malama, a ma ka la umikumamahiku o ua malama la, ia la no, huahuai mai la na panawai a pau o ka hohonu nui, a hamarna ae la na puka wai o ka lani.
- ¹² Hookahi kanaha la a me na po o ka ua ana maluna o ka honua.
- ¹³ Ia la hookahi no, como ae la o Noa, a o Sema, a o Hama, a o Iapeta, na keikikane a Noa, a me ka wahine a Noa, a me na wahine ekolu a kana mau keikikane me lakou, iloko o ka halelana.
- ¹⁴ O lakou me na holoholona hihiu a pau ma ko lakou ano iho, a me na holoholona laka a pau ma ko lakou ano iho, a me kela mea kolo keia mea kolo, e kolo ana maluna o ka honua ma kona ano iho, a me na manu a pau ma ko lakou ano iho, o na mea eheu a pau, o kela ano keia ano.
- ¹⁵ Komo papalua ae la lakou io Noa la iloko o ka halelana, o na mea io a pau e ha ana i ka hanu ola.
- ¹⁶ He kane he wahine o na mea io a pau ka poe i comoaku iloko, mo ka ke Akua i kauoha mai ai ia ia: a papani ae la o Iehova i ka puka mahope ona.

- ¹⁷ Hookahi kanaha la o ke kaiakahinalii maluna o ka honua; mahuahua ae la ka wai, a hoolana ae la i ka halelana, a ua kaikaiia ae la ia maluna o ka honua.
- ¹⁸ Lanakila ae la ka wai a mahuahua loa ae la maluna o ka honua; a holo aku la ka halelana maluna o ka wai.
- ¹⁹ Lanakila loa ae la ka wai maluna o ka honua; a uhia ae la na kuahiwi kiekie a pau loa malalo o ka lani.
- ²⁰ He umikumamalima na kubita o ke kiekie o ka wai maluna; a uhia ae la na kuahiwi.
- ²¹ A make iho la na mea ola a pau i holo maluna o ka honua, o na manu, o na holoholona laka, o na holoholona hihiu, a o na mea kolo a pau e kolo ana maluna o ka honua, a me na kanaka a pau;
- ²² O ka poe a pau nona ka hanu ola iloko o na puka ihu, o na mea a pau ma ka aina maloo, make iho la lakou.
- ²³ A pau loa iho la na mea ola maluna o ka honua i ka make, o na kanaka, me na holoholona, a me na mea kolo, a me na manu o ka lewa; a ua hoopauia lakou mai ka honua aku: o Noa wale no ka i koe, a me ka poe me ia iloko o ka halelana.
- ²⁴ A lanakila ae la ka wai maluna o ka honua, hookahi haneri na la a me kanalima.

8

- ¹ HOOMANAO iho la o Iehova ia Noa, a me na mea ola a pau, a me na holoholona a pau me ia iloko o ka halelana: hoohuai mai la ke Akua i ka makani maluna o ka honua, a emi iho la ka wai:

- ² Ua papaniia ae la na punawai o ka hohonu, a me na puka wai o ka lani, a malie iho ka ua mai luna mai:
- ³ Hoi hou mau aku la ka wai mailuna ae o ka honua: a mahope o na la he haneri a me kanalima, ua emi ka wai.
- ⁴ A i ka hiku o ka malama, i ka la umikumamahiku o ua malama la, ili iho la ka halelana ma na kuahiwi o Ararata.
- ⁵ Emi mau iho la ka wai, a hiki i ka umi o ka malama: i ka umi o ka malama, i ka la mua o ua malama la, ua ike na wahi kiekie o na kuahiwi.
- ⁶ A hala na la he kanaha, wehe ae la o Noa i ka puka makani o ka halelana ana i hana'i:
- ⁷ Hookuu aku la ia i kekahi koraka, nana i lele aku a hoi mai ma kela wahi a ma keia wahi, a maloo iho ka wai ma ka honua.
- ⁸ Hookuu aku la hoi oia i ka manu nunu e ike i ka emi ana o ka wai mai ka aina aku;
- ⁹ Aka, aole i loaa i ua manu nunu la he wahi e maha'i o kona wawae, a hoi hou mai la ia io na la iloko o ka halelana, no ka mea, ua uhi ka wai maluna o ka honua a pau; alaila, o aku la kona lima, lalau aku la oia ia ia, a huki mai la ia ia io na la iloko o ka halelana.
- ¹⁰ Noho iho la ia i na la hou aka i ehiku; a hookuu hou aku la i ka manu nunu iwaho o ka halelana;
- ¹¹ A ahiahi iho la, hoi mai la ka manu nunu io na la, aia hoi, he lau oliva hou ma kona waha. Pela o Noa i ike ai, ua emi iho ka wai mai luna aka o ka honua.

12 Noho iho la ia i na la hou aku i ehiku; a hookuu
aku la i ka manu nunu; aole no ia i hoi hou
mai io na la ma ia hope mai.

13 I ka makahiki eono haneri a me kumamakahi,
i ka malama hookahi, a i ka la mua o ua
malama la, maloo iho la ka wai mai ka
honua aku; a wehe ae la o Noa i ke pani
maluna o ka halelana, a nana ae la, aia hoi,
ua maloo ka aina.

14 A i ka lua o ka malama, i ka la iwakaluaku-
mamahiku o ua malama la, ua maloo iho ka
honua.

15 Olelo mai la ke Akua ia Noa, i mai la,

16 E hele aku oe iwaho o ka halelana, o oe, me
kau wahine, me au mau keikikane, a me na
wahine a kau mau keikikane me oe.

17 E lawe pu mai me oe i na mea ola a pau ia oe, o
na mea io, o na manu, na holoholona, a me
na mea kolo a pau e kolo ana maluna o ka
honua; i hanau nui ai lakou ma ka honua, i
hua mai, a mahuahua maluna o ka honua.

18 Hele aku la o Noa me kana mau keikikane, a me
kana wahine, a me na wahine a kana mau
keikikane me ia:

19 O na holoholona hoi a pau, o na mea kolo a pau,
me na manu a pau, a me na mea a pau e
kolo ana maluna o ka honua, ma ko lakou
mau ano iho, hele aku la lakou iwaho o ka
halelana.

20 Hana iho la o Noa i kuahu no Iehova, lalau akula
ia i kekah i o na holoholona maemae a pau,
a o na manu maemae a pau, a kaumaha aku
la i na mohaikuni maluna o ke kuahu.

- ²¹ Honi mai la o Iehova i ke ala oluolu: i iho la o Iehova iloko o kona naau, Aole au e hoino hou i ka aina no kanaka, no ka mea, ua hewa no ka manao ana o ko ke kanaka naau mai kona wa opiopio; aole hoi au e luku hou aku i na mea ola a pau, me au i hana iho nei.
- ²² E mau auanei ka wa e kanu ai a e ohi ai; ke ana a me ka wela, ke kau a me ka hooilo, ka la a me ka po; a pau na la o ka honua.

9

- ¹ HOOPOMAIKAI mai la ke Akua ia Noa, a me kana mau keikikane, i mai la ia lakou, E hoohua mai oukou, e mahuahua, a e hoopihia i ka honua.
- ² E kau mai auanei ka makau ia oukou a me ka weliweli maluna o na holoholona a pau o ka honua, maluna hoi o na manu a pau e ka lewa, a maluna hoi o na mea a pau e hele ana ma ka honua, a maluna no hoi o na ia a pau o ke kai; ua haawiia'ku lakou iloko o na lima o oukou.
- ³ O na mea hele a pau e ola ana, na oukou ia e ai; me ka'u i haawi aku ai i na launahele opiopio na oukou, pela ka'u e haawi aku nei i na mea a pau.
- ⁴ Aka, mai ai oukou i ka io me kona ola, oia kona koko.
- ⁵ He oiaio, e hoopai auanei au i ke koko o ko oukou ola; ma ka lima o na holoholona a pau ka'u e hoopai aku ai; a ma ka lima hoi o na kanaka; ma ka lima hoi o ka hoahanau o kela kanaka keia kanaka ka'u e hoopai aku ai i ke ola o kanaka.

- ⁶ O ka mea nana e hookahe i ke koko o kanaka, e hookaheia no kona koko e kanaka: no ka mea, ma ke ano o ke Akua oia i hana'i i kanaka.
- ⁷ A oukou, e hoohua mai oukou, a e mahuahua; e hanau nui ma ka honua, a e hoolaha malaila.
- ⁸ Olelo mai la ke Akua ia Noa a i kana mau keiki me ia, i mai la,
- ⁹ Owau la e, ke hoopaa nei au i ka u berita me oukou a me ka oukou poe mamo mahope o oukou:
- ¹⁰ A me na mea ola a pau me oukou, o na manu, o na holoholona laka a me na holoholona hihiu o ka honua me oukou: mai ka poe a pau i hele mai iwaho e ka halelana, a i na holoholona a pau o ka honua.
- ¹¹ E hoopaa no wau i ka'u berita me oukou: aole hoi e luku hou ia ua mea ola a pau i na wai o ke kaiakahinalii: aole hoi he kaiakahinalii e hiki hou mai ana e pau ai ka honua.
- ¹² I mai la ke Akua. Eia ka hoailona o ka berita a'u e hana nei mawaena o'u a o oukou, me na mea ola a pau me oukou, no ua hanauna a pau.
- ¹³ Ke kau nei au i kuu anuenue ma ke ae, i hoailona ia uo ka berita mawaena o'u a o ka honua.
- ¹⁴ A hoouhi aku ai au i ke ao maluna o ka honua, e ike a auanei ke anuenue ma ke ae.:
- ¹⁵ A e hoomanao iho uo au i ka'u berita mawaena o'u a o oukou, me na mea io e ola ana a pau: aole loa e lilo hou ana ka wai i kaiakahinalii e luku ai i na mea io a pau.
- ¹⁶ A e kau mai auanei ke anuenue ma ke ao: a e nana aku au ia i hoomanao iho ai au i ka

berita mau loa mawaena o ke Akua a o na
mea ola a pau o na mea io a pau maluna o
ka honua.

- ¹⁷ Olelo mai la ke Akua ia Noa Ola ka hoailona o ka
berita a'u i hoopaa iho ai mawaena o'u a e
na mea io a pau maluna o ka houna.
- ¹⁸ O na keikikane a Noa. ua mea i puka mai
iwaho o ka halelana. oia o Sema, o Hama,
a o lapeta: a o Hama ka makuakaue no
Kananna.
- ¹⁹ O lakou ua keikikane ekolu a Noa. a na lakou
i hoolalaia ku [na kanakal] ma ka honua a
pau.
- ²⁰ Hoomaka iho la o Noa e mahiai, a kanu iho la ia
i ka malawaina:
- ²¹ Inu iho la ia i ka waina, a ona: a ua uhi ole ia oia
i ke kapa maloko o kona halelewna.
- ²² Ike aku la o Hama ka makuakane o Kauaana i
kahihilahila o kona makuakane. a hai mai
la i kona mau hoahanau elua mawaho.
- ²³ Lalau aku la o Sema laua o Iapeta i ka aahu. a
kau iho la maluna o ko laua mau poohiwi.
a hele hope aku la laua. a uhi iho la i kahihilahila
o ko laua makuakane: ua huli hope ko laua mau maka. a ike ole aku laua i kahihilahila
o ko laua makuakane.
- ²⁴ Ala ae la o Noa i ka pau ana o kona waina. a
ike iho la ia i ka mea a kana keiki muli iho
i hana aku ai ia ia.
- ²⁵ Olelo mai la oia. E poino ne o Kanaaua: he
kauwa ia ua na kauwa a kona poe hoahanau.
- ²⁶ Olelo mai la hoi oia. E hoomaikaiia o Iehova. ke
Akua o Sema: a o Kauaana kana kauwa.

- ²⁷ E hoomahuahua auanei ke Akua ia Iapeta, a e
noho no auanei ia ma ua halelewa o Sema:
a o Kauaana kana kauwa.
- ²⁸ A e ko Noa ola ana mahope o ke kaiakahinalii,
akolu ia haneri makahiki a me kanalima.
- ²⁹ O ua la a pau o Noa. aiwa ia haneri makahiki a
me kanalima: a make iho la ia.

10

- ¹ EIA ka mooolelo no na keikikane a Noa o Sema,
o Hama, a o Iapeta: ua hanau na lakou na
keikikaua mahope o ke kaiakahinalii.
- ² O na keikikane a lapeta: o Gomera, o Magoga, o
Madai, o lavaua. o Tuhalia. o Meseka, a o
Tirasa.
- ³ O na keikikane a Gomera: o Asekenaza, o Kipata,
a o Elia.
- ⁴ O na keikikane a lavana o Elia. o Taresisa. o
Kitima, a o Dodanima.
- ⁵ Ua puunaneia na aina kahakai o na lahuikanaka
e lakeu nei ma ke lakou mau aina, e kela
mea a o keia mea e like me kana olelo,
mamuli o ka lakou mau ohnau, ma na
lahuikanaka o lakou.
- ⁶ O na keiki a Hama: o Kusa. o Migeraima, e Puta,
a o Kanaaua.
- ⁷ O na keikikane a Kusa: o Seba e Havila. o Sabetia.
e Raama, a o Sabeteka: a o na keikikane a
Raama: o Seba, a o Dedana.
- ⁸ Na Kusa o Nimeroda: hoomaka iho la ia e
hoolanakila ma ka honua nei.

- ⁹ He kanaka koa ia i ka hahai holoholona imua o Iehova: nolaila i oleloia'i, E like me Nimeroda ka mea koa loa, ka hahai holoholona imua o Iehova.
- ¹⁰ O ka hoomaka ana o kona aupuni, oia o Babela, o Araka, o Akada, a o Kalene, ma ka aina o Sinara.
- ¹¹ Ma ia aina aku i hele aku ai o Asura, a kukulu iho la ia Nineva, a me ke kulanakauhale o Rehobota, a me Kala,
- ¹² A me Resena mawaena o Nineva a o Kala: he kulanakauhale nui no ia.
- ¹³ Na Mizeraima ka Luda, me ka Anama, me ka Lehaba, me ka Naputuha.
- ¹⁴ Me ka Paterima, me ka Kaseluhima, (na lakou mai ka Pilisetia,) a me ka Kapetora.
- ¹⁵ Na Kanaana mai o Sidona, kana hiapo, a o Heta,
- ¹⁶ A o ka Iebusa, a o ka Amora, a o ka Giragasa,
- ¹⁷ A o ka Hiva, a o ka Areka, a o ka Sinite,
- ¹⁸ A o ka Aravada, a o Zemara, a o ka Hamata: a mahope iho ua hoolahaia'ku na ohana a ka poe Kanaana.
- ¹⁹ A o ka mokuna aina o ka Kanaana, mai Sidona ia, i kona hele ana mai i Gerara, a hiki i Gaza; i kou hele ana aku i Sodoma, me Gomora, a me Adema, a me Geboima, a hiki i Lasa.
- ²⁰ Oia na keikikane a Hama, mamuli o ka lakou mau ohana, mamuli hoi o ka lakou mau olelo, ma na aina o lakou, a ma na lahuikanaka o lakou.
- ²¹ Na Sema hoi, na ka makuakane o ka poe keiki a pau a Ebera, na ke kaikaina a Iapeta ka

- hoahanau mua, ua hanau no hoi na keiki nana.
- 22 O na keiki a Sema; o Elama, o Asura, o Arepakada, o Luda, a o Arama.
- 23 O na keikikane a Arama; o Uza, o Kula, a o Getera, a o Masa.
- 24 Na Arepakada o Sala, na Sala hoi o Ebera.
- 25 Ua hanau na Ebera na keikikane elua: o Pelega ka inoa o kekahi; no ka mea, ua maheleia ka honua i kona mau la; a o Ioketana ka inoa o kona kaikaina.
- 26 Na Ioketana o Alemodada, o Selepa, a Hazamaveta, o Iera,
- 27 O Hadorama, o Uzala, o Dikela,
- 28 O Obala, o Abimaela, o Seba,
- 29 O Opira, o Havila, a o Iobaba: o lakou nei a pau na keikikane a Ioketana.
- 30 A o ko lakou wahi noho ai, mai Mesa aku no ia, i kou hele ana a hiki i Separa, i kekahi mauna o ka hikina.
- 31 Oia na keikikane a Sema, mamuli o ka lakou mau ohana, mamuli hoi o ka lakou mau olelo, ma ko lakou mau aina, a me ko lakou mau lahuikanaka.
- 32 Oia na ohana a na keikikane a Noa, e like me ko lakou mau hanauna, ma ko lakou mau lahuikanaka; ma o lakou nei ua maheleia na lahuikanaka ma ka honua mahope mai o ke kaiakahinalii.

11

¹ HOOKAHI no lehelehe, hookahi hoi olelo a ko ka honua a pau.

- ² A i ko lakou hele ana mai ka hikina mai, loaa ia lakou kahi papu ma ka aina o Sinara; a noho iho la lakou ilaila.
- ³ Olelo ae la kekahi kanaka i kona hoa, Ina kakou, e hana kakou i na pohaku ula, e kahu a moa loa. O ko lakou pohaku, he pohaku ula, a he bitumena ko lakou puna.
- ⁴ Olelo ae la lakou, Ina kakou, e hana kakou i kulanakauhale no kakou, a me ka halepakui e kiekie ae kona welau i ka lani; a e hookaulana i ko kakou inoa, o hoopuehuia'ku kakou maluna o ka honua a pau.
- ⁵ Iho mai la o Iehova ilalo e nana i ke kulanakauhale a me ka halepakui a na keiki a kanaka i hana'i.
- ⁶ I iho la o Iehova, Aia hoi, hookahi no ka poe kanaka, hookahi hoi ko lakou lehelehe; eia ka lakou e hoomaka nei e hana: a mahope aku, aohe mea keakea ia lakou ke hana i na mea a pau a lakou e manao ai.
- ⁷ Ina kakou, e iho iho kakou, a malaila kakou hookahuli ai i ka lakou olelo, i hoomaopopo ole ai lakou i ka olelo a kekahi.
- ⁸ Pela o Iehova i hoopuehu aku ai ia lakou maluna o ka honua a pau: a oki iho la ka lakou hana ana i ua kulanakauhale la.
- ⁹ No ia mea, ua kapaia ka inoa o ia wahi, o Babela, no ka mea, ilaila o Iehova i hookahuli ai i ka olelo a ko ka honua a pau: a mai ia wahi aku i hoopuehu aku ai o Iehova ia lakou maluna o ka honua a pau.
- ¹⁰ Eia ka mooolelo na Sema: hookani haneri makahiki o Sema, a hanau mai o Arepakada

nana, elua makahiki mahope mai o ke ka-iakahinalii.

- 11 Mahope mai o ka hanau ana o Arepakada, alima haneri no makahiki o ko Sema ola ana, a nana mai na keikikane a me na kaikamahine.
- 12 He kanakolu na makahiki a me kumamalima o ko Arepakada ola ana, a hanau mai o Sala nana:
- 13 Mahope mai o ka hanau ana o Sala, aha haneri na makahiki a me kumamakolu o ko Arepakada ola ana, a nana mai na keikikane a me na kaikamahine.
- 14 He kanakolu na makahiki o ko Sala ola ana, a hanau mai o Ebera nana:
- 15 Mahope mai o ka hanau ana o Ebera, aha haneri na makahiki me kumamakolu o ko Sala ola ana, a nana mai na keikikane a me na kaikamahine.
- 16 He kanakolu na makahiki a me kumamaha o ko Ebera ola ana, a hanau mai o Pelega nana:
- 17 Mahope mai o ka hanau ana o Pelega, aha haneri na makahiki a me kanakolu o ko Ebera ola ana, a nana mai na keikikane a me na kaikamahine.
- 18 He kanakolu na makahiki o ko Pelega ola ana, a hanau mai o Reu nana:
- 19 Mahope mai o ko Reu hanau ana, alua haneri na makahiki a me kumamaiwa o ko Pelega ola ana, a nana mai na keikikane a me na kaikamahine.

- ²⁰ He kanakolu na makahiki a me kumamalua o ko
 Reu ola ana, a hanau mai o Seruga nana:
- ²¹ Elua haneri na makahiki a me kumamahiku o
 ko Reu ola ana mahope mai o ka hanau ana
 o Seruga, a nana mai na keikikane a me na
 kaikamahine.
- ²² He kanakolu na makahiki o ko Seruga ola ana, a
 hanau mai o Nahora nana:
- ²³ Mahope mai o ka hanau ana o Nahora, elua
 haneri na makahiki o ko Seruga ola
 ana, a nana mai na keikikane a me na
 kaikamahine.
- ²⁴ He iwakalua na makahiki a me kumamaiwa
 o ko Nahora ola ana, a hanau mai o Tera
 nana:
- ²⁵ Mahope mai o ka hanau ana o Tera, he haneri
 na makahiki a me ka umikumamaiwa o ko
 Nahora ola ana, a nana mai na keikikane a
 me na kaikamahine.
- ²⁶ He kanahiku na makahiki o ko Tera ola ana,
 a hanau mai o Aberama, o Nahora, a o
 Harana.
- ²⁷ Eia ka mooolelo no Tera; na Tera o Aberama, o
 Nahora, a o Harana; na Harana o Lota.
- ²⁸ Make iho la o Harana mamua o kona
 makuakane o Tera, ma kona aina i hanau
 ai, ma Ura no ko Kaledea.
- ²⁹ Lawe ae la o Aberama laua o Nahora i mau
 wahine na laua: o Sarai ka inoa o ka wahine
 a Aberama, a o Mileka ka inoa o ka wahine
 a Nahora; oia ke kaikamahine a Harana, a
 ka makuakane o Mileka, a o ka makuakane
 hoi o Iseka.

³⁰ A he pa o Sarai; aohe ana keiki.

³¹ Lawe ae la o Tera i kana keiki ia Aberama, a me kana moopuna ia Lota, ke keiki a Harana, a me Sarai kana hunonawahine, o ka wahine a kana keiki a Aberama; a haele pu mai la lakou mai Ura mai no ko Kaledea, i ka hele ana ma ka aina o Kanaana: hiki mai la lakou i Harana, a noho iho la ilaila.

³² O na la o Tera, elua ia haneri makahiki a me kumamalima: a make iho la o Tera ma Harana.

12

¹ I OLELO mai o Iehova ia Aberama, E hele aku oe mai kou aina aku, a mai kou poe hoahanau aku, a mai ka hale o kou makuakane aku, a hiki i ka aina a'u e kuhikuhi aku ai ia oe.

² A e hoolilo au ia oe i lahuikanaka nui, e hoomaikai aku hoi au ia oe, e hookaulana hoi au i kou inoa, a e lilo oe i mea e pomaikai ai.

³ E hoopomaikai aku hoi au i ka poe hoomaikai ia oe, a e hoino aku au i ka mea hoino ia oe, a ia oe e pomaikai ai na ohana a pau o ka honua.

⁴ Hele aku la o Aberama e like me ka Iehova i olelo mai ai ia ia; a hele pu o Lota me ia. He kanahiku kumamalima na makahiki o Aberama, i kona wa i hele mai ai mai Harana mai.

⁵ Lawe ae la o Aberama i kana wahine ia Sarai, a me Lota ke keiki a kona kaikuaana, a me ka waiwai a pau a lakou i hoiliili ai, a me na ohua a pau i loaa ia lakou ma Harana;

a puka mai la lakou e hele mai i ka aina o Kanaana; a hiki mai la lakou i ka aina o Kanaana.

- 6** Kaahele ae la o Aberama i ka aina, a hiki aku la i kahi o Sikema, i ka laau oka o More. E noho ana no na mamo a Kanaana ma ia aina ia manawa.
- 7** Ikeae la o Iehova e Aberama, i mai la ia, E haawi aku no wau i keia aina no kau poe mamo: malaila oia i hana'i i kuahu no Iehova, ka mea i ikeae ia.
- 8** Hele aku la ia mai ia wahi aku a ka puu ma ka hikina o Betela, a kukulu iho la i kona halelewa, o Betela ma ke komohana, a o Hai ma ka hikina: malaila oia i hana'i i kuahu no Iehova, a hea aku la ia i ka inoa o Iehova.
- 9** Hele hou aku la o Aberama e neenee ana i ke kukuluhema.
- 10** He wi ma ia aina; a hele aku la o Aberama ilalo i Aigupita e noho malihini malaila, no ka mea, ua nui loa ka wi ma ka aina.
- 11** A kokoke aku la ia e komo i Aigupita, i aku la ia i kana wahine ia Sarai, Eia hoi ke ike nei au he wahine maikai oe ke nanaia'ku:
- 12** Nolaila, a ike mai ko Aigupita ia oe, e olelo auanei lakou, Eia kana wahine; a e pepehi mai lakou ia'u, a e hoola ae lakou ia oe.
- 13** Ke nonoi aku nei au ia oe, e i aku oe, he kaikuwahine oe no'u, i pomaikai ai au ia oe, a e malamaia kuuola nou.
- 14** A hiki aku la o Aberama i Aigupita, ike mai la ko Aigupita i ka wahine he maikai loa.

- ¹⁵ A ike mai la na luna a Parao ia ia, hoomaikai lakou ia ia imua o Parao, a ua laweia aku la ua wahine la ma ka hale o Parao.
- ¹⁶ Lokomaikai mai la oia ia Aberama no Sarai: a ia ia na hipa, na bipi, na hoki, na kauwakane, na kauwawahine, na hokiwahine, a me na kamelo.
- ¹⁷ Hooeha mai la o Iehova ia Parao a me kona poe ohua i na mai eha loa, no Sarai ka wahine a Aberama.
- ¹⁸ Kahea mai la o Parao ia Aberama, i mai la, Heaha keia mea au i hana mai ai ia'u? No ke aha la i hai ole mai oe ia'u o kau wahine ia?
- ¹⁹ No ke aha la oe i olelo mai ai, O ko'u kaikuwahine ia, i mea e lawe ai au ia ia i wahine na'u? Eia hoi kau wahine, e lawe oe ia ia, a e hele aku.
- ²⁰ Kauoha aku la o Parao i kona poe kanaka nona, a hoihoi mai la lakou ia ia, me kana wahine, a me kana mau mea a pau.

13

- ¹ PII hou mai la o Aberama mai Aigupita mai, oia me kana wahine, a me kana mau mea a pau, a me ia no o Lota, i kau wahi o ke kukuluhema.
- ² Ua waiwai nui loa o Aberama i na holoholona, i ke kala a me ke gula.
- ³ Hele ae la ia i kona hele ana mai ke kukuluhema mai a Betela, kahi i ku ai o kona halelewa mamua, mawaena o Betela a me Hai;
- ⁴ Kahi o ke kuahu ana i haua'i mamua: ilaila o Aberama i kahea aku ai i ka inoa o Iehova.

- ⁵ A o Lota hoi, ka mea i hele pu me Aberama, he hipa no kana me na bipi a me na halelewa.
- ⁶ Aole i pono ka aina no laua, i noho pu ai laua, no ka nui o ko laua waiwai, aole i hiki ia laua ke noho pu.
- ⁷ Hakaka ae la ka poe kahubipi a Aberama me ka poe kahubipi a Lota: e noho ana no ka Kanaana a me ka Perezi ma ia aina ia manawa.
- ⁸ I aku la o Aberama ia Lota, Ea, aole make hakaka kaua, kekahī i kekahī, aole hoi ka'u poe kahubipi me kau poe kahubipi; no ka mea, he mau hoahanau kaua.
- ⁹ Aole anei ma kou alo ka aina a pau? ke noi aku nei au ia oe, e hookaawale kaua: ina oe ma ka lima hema, alaila e hele au ma ka lima akau; a ma ka lima akau oe, alaila e hele au ma ka lima hema.
- ¹⁰ Alawa ae la ko Lota mau maka, ike aku la i na wahi papu o Ioredane, he nui ka wai ma ia wahi a pau i kou hele ana mai i Zoara, mamua o ko Iehova luku ana ia Sodoma a me Gomora, e like me ka mahinaai o Iehova, a e like me ka aina i Aigupita.
- ¹¹ Alaila, wae iho la o Lota i ka papu a pau o Ioredane: a hele aku la o Lota ma ka hikina, a hookaawale ae la laua i ke kekahī me kekahī.
- ¹² Noho iho la o Aberama ma ka aina i Kanaana, a noho aku la o Lota ma na kulanakauhale o ua papu la, a kukulu iho la i kona halelewa ma Sodoma.

¹³ A o na kanaka o Sodoma, he poe hewa lakou, he lawehala loa imua o Iehova.

¹⁴ Olelo mai la o Iehova ia Aberama mahope mai o ko Lota hookaaawale ana ae mai ona aku la, E alawa ae oe i kou mau maka, a e nana aku mai kou wahi e noho nei, i ke kukuluakau a i ke kukuluhema, a i ka hikina hoi a i ke komohana:

¹⁵ No ka mea, o ka aina a pau au e ike nei, na'u ia e haawi aku nou, a no kau poe mamo mahope mau loa aku.

¹⁶ E hoomahuahua aku no wau i kau poe mamo e like me ka lepo o ka honua: ina e hiki i ke kanaka ke helu i na huna lepo o ka honua, alaila e heluia kau poe mamo.

¹⁷ E ku ae; e kaahele i ka aina ma kona loa a ma kona laula; no ka mea, na'u no ia e haawi aku nou.

¹⁸ Alaila lawe ae la o Aberama i kona halelewa, hele aku la ia a noho iho la ma na laau oka no Mamere, aia no ma Heberona, a hana iho la ia ilaila i kuahu no Iehova.

14

¹ I KA manawa ia Amerapela ke alii o Sinara, o Arioka ke alii o Elasara, o Kedorelaomera ke alii o Elama, a o Tidala ke alii o Goima;

² Kaua mai la lakou me Bera ke alii o Sodoma, me Biresa ke alii o Gomora, me Sinaba ke alii o Adema, me Semebara ke alii o Zeboima, a me ke alii o Bela, oia hoi o Zoara.

³ I hoakoakoia keia poe a pau ma ke awawa o Sidima, kahi ia o ka moana paakai.

- ⁴ Hookauwa aku la lakou na Kedorelaomera i na makahiki he umikumamalua; a i ka umiku-mamakolu o ka makahiki, kipi ae la lakou.
- ⁵ A i ka makahiki umikumamaha, hele mai la o Kedorelaomera, a me ia pu ua mau alii la, a hahau mai la i ka Repaima ma Aseterota Kanaima, me ka Zuzima ma Hama, a me ka Emima ma Sehave ma Kiriataima.
- ⁶ A me ka Hora ma ko lakou mauna Seira, a hiki Elepazana ma ka waoakua.
- ⁷ A hoi mai la lakou, a hiki mai la i Enemisepata, oia o Kadesa, a hahau aku ia i ko ka aina a pau o ka Amaleki, a me ka Amori i noho la ma Hazezona-tamara.
- ⁸ Hele aku la ke alii o Sodoma me ke alii o Gomora, me ke alii o Adema, a me ke alii o Zeboima, a me ke alii o Bela, oia hoi o Zoara; a kaua aku la lakou me kela poe ma ke awawa o Sidima;
- ⁹ Me Kedorelaomera ke alii o Elama, a me Tidala ke alii o Goima, a me Amerapela ke alii o Sinara, a me Arioka ke alii o Elasara; o na'lili eha me na'lili elima.
- ¹⁰ He nui na lua bitumena ma ke awawa o Sidima; hee aku la na alii o Sodoma a me Gomora, a haule iho la ilaila; a holo aku la ka poe i koe ma ka mauna.
- ¹¹ Lawe pio aku la lakou i ka waiwai a pau o Sodoma a o Gomora, a me ka lakou ai a pau, a hele aku la.
- ¹² Lawe aku la hoi lakou ia Lota, i noho ai ma Sodoma, o ke keiki a ko Aberama kaikuaana, a me kana waiwai, a hoi aku la.
- ¹³ Hele mai la kekahi o ka poe i pakele, a hai mai la ia Aberama ka Hebera; no ka mea, i noho

ai oia ma na laau oka no Mamere ka Amori,
ka hoahanau o Esekola, a o Anera: a ua
hoolauna pu lakou nei me Aberama.

¹⁴ Lohe ae la o Aberama, ua lawe pio ia kona hoahanau, alakai aku la ia i kona poe kanaka i hoomakaukauia ka poe i hanau ma kona hale iho, akolu haneri a me kumamawalu, a alualu aku la ia lakou a hiki i Dana.

¹⁵ Mahele iho la oia i kona poe e ku e ia lakou, oia a me kana poe kauwa i ka po, poipo aku la ia lakou, a alualu aku la ia lakou a hiki i Hoba, aia ma ka lima hema o Damaseko.

¹⁶ Hoihoi mai la ia i ka waiwai a pau, a lawe mai la hoi oia i kona hoahanau ia Lota, a me kona waiwai, me na wahine hoi, a me na kanaka.

¹⁷ Hele aku ke alii o Sodoma iwaho e halawai me Aberama, mahope o kona hoi hou ana mai mai ka luku ana ia Kedorelaomera a me na alii me ia, ma ke awawa o Save, oia ke awawa o ke alii.

¹⁸ A o Melekizedeka ke alii o Salema, lawe mai la ia i ka berena a me ka waina: oia ke kahuna o ke Akua kiekie loa.

¹⁹ Hoomaikai mai la oia ia ia, i mai la, E pomaikai no o Aberama i ke Akua kiekie loa, nona ka lani a me ka honua.

²⁰ E hoomaikaiia hoi ke Akua kiekie loa, nana i hoolilo mai kou poe enemi iloko o kou lima. A haawi aku la ia nana i ka hapaumi o na mea a pau.

²¹ I mai la ke alii o Sodoma ia Aberama, o ke kanaka ko'u, a e lawe oe i ka waiwai nou.

- ²² Iaku la o Aberama i ke alii o Sodoma, Ua hapai
aku no au i ko'u lima ia Iehova, i ke Akua
kiekie loa, i ka mea nona ka lani a me ka
honua,
- ²³ Aole au e lawe no'u i kekahī maawe, aole hoi
kekahī mea iki o kau, o olelo ae oe, Ua
waiwai o Aberama ia'u:
- ²⁴ O ka mea wale no a ka poe kanaka opioipo i ai
ai, a me ka puu waiwai pio a ka poe kanaka
i hele pu ai me an, o Anera, o Esekola, a o
Mamere; e lawe lakou i ko lakou puu.

15

- ¹ MAHOPE mai oia mau mea, hiki mai la ka olelo
a Iehova ia Aberama ma ka hihio, i mai la,
Mai makau oe, e Aberama, owau no kou
palekaua a me kau uku nui loa.
- ² Iaku la o Aberama, E ka Haku, e Iehova e, heaha
kau mea e haawi mai ai ia'u, no ka mea, ke
hele keiki ole nei au, a o ka puuku o kuu
hale, oia o Eliezera no Damaseko.
- ³ Iaku la o Aberama, Aia hoi, aole oe i haawi mai
i keiki na'u; a o kekahī i hanau iloko o ko'u
hale, oia kuu hooilina.
- ⁴ Aia hoi, hiki mai la ka olelo a Iehova ia ia, i ka i
ana mai, Aole keia o kou hooilina; aka, o ka
mea e hele mai ana mailoko mai ou iho, o
kou hooilina ia.
- ⁵ Kai aku la oia ia ia mawaho, i mai la, E nana aku
oe iluna i ka lani, e helu i na hoku, ina e hiki
ia oe ke helu: i mai la kela ia ia, Pela auanei
kau poe mamo.

- ⁶ Manaoio aku la oia ia Iehova, a hooili mai la oia ia mea i pono nona.
- ⁷ I mai la kela ia ia, Owau no Iehova nana oe i lawe mai nei, mai Ura o ko Kaledaea mai, e haawi aku nou i keia aina i wahi e noho ai.
- ⁸ I aku la ia, E ka Haku, e Iehova e, pehea la au e ike ai, e ili mai ana keia aina no'u?
- ⁹ I mai la kela ia ia, E lalau oe na'u i bipi-wahine akolu makahiki ona, i kaowahine akolu makahiki ona, i hipakane akolu ona makahiki, i manu kuhukuku, a me ka nunu opioipo.
- ¹⁰ Lawe mai la oia ia mau mea a pau io na la, a mahele ae la ia lakou mawaena, a waiho iho la i kela apana i keia apana e ku pono aku i kona hoa: aka, aole ia i mahele i na manu.
- ¹¹ A lele mai la na manu maluna iho o na mohai, hoopuehu aku la o Aberama ia lakou.
- ¹² A i ka napoo ana o ka la, ua pauhia o Aberama i ka hiamoe nui; aia hoi, kau mai la ka, weliweli a me ka pouli nui maluna iho ona.
- ¹³ Olelo mai la ia ia Aberama, E ike pono oe, e lilo ana kau poe mamo i malihini ma ka aina e aole no lakou, a e hookauwa aku na lakou; a e hoinoia mai lakou e kela poe i na haneri makahiki eha.
- ¹⁴ A o ua lahuikanaka la nana lakou e hooluhi mai, na'u lakou e hoohewa aku: a mahope iho, e puka mai lakou iwaho me ka waiwai nui.
- ¹⁵ E huiia'ku oe i ou mau makua me ka malu; a e kanuia oe i ka wa elemakule maikai.

- ¹⁶ Aka, e hoi hou mai no lakou ia nei i ka ha o ka hanauna: no ka mea, aole i lawa ka hewa o ka Amori i nei manawa.
- ¹⁷ A napoo iho la ka la, a poeleele iho la, aia hoi, nee ae la ka umuahi e punohu ana a me ke kukui e a ana mawaena o ua mau apana la.
- ¹⁸ Ia la no, hoopaa iho la oia i berita me Aberama, i ka i ana mai, Ua haawi aku no wau i keia aina no kau poe mamo, mai ka muliwai o Aigupita a hiki aku i ka muliwai nui, ka muliwai o Euperate:
- ¹⁹ I ka Kena, i ka Keniza, i ka Kademona,
- ²⁰ I ka Heta, i ka Periza, me ka Repaima,
- ²¹ I ka Amora, i ka Kanaana, i ka Giregasa, a me ka Iebusa.

16

- ¹ O SARAI ka wahine a Aberama, aole ia i hanau keiki nana: a ia ia kekahi kauwawahine no Aigupita, o Hagara kona inoa.
- ² I mai la o Sarai ia Aberama, Aia hoi, ua pa wau ia Iehova; ke nonoi aku nei au ia oe, e komo ae oe iloko i ka'u kauwawahine, i loaa paha ia'u na keiki ma o na la. Hoolohe aku la o Aberama i ka leo o Sarai.
- ³ Lalau aku la o Sarai o ka wahine a Aberama ia Hagara i kana kauwawahine no Aigupita, i ka umi o ka makahiki a Aberama i noho ai ma ka aina o Kanaana, a haawi mai la ia ia i wahine na kana kane na Aberama.
- ⁴ Komo aku la ia iloko io Hagara la, a ko ae la ia: a ike iho la ia ua ko, ua hoowahawahaina kona hakuwahine imua o kona maka.

- ⁵ I mai la o Sarai ia Aberama, Iluna iho ou ko'u hoinoia: ua haawi aku au i ka'u kauwawahine iloko o kou poli; a ike iho la ia, na ko oia, hoowahawahaia no au e ia: e hooponopono mai o Iehova mawaena o kaua.
- ⁶ Iaku la o Aberama ia Sarai, Aia hoi, iloko no o kou lima kau kauwawahine, e hana aku oe ia ia e like me kou makemake. A hoopilikia aku la o Sarai ia ia, mahuka aku la ia mai kona alo aku.
- ⁷ A loaa oia i ka anela o Iehova ma ka punawai iloko o ka waonahele, ma ka punawai o ke alanui e hele ai i Sura.
- ⁸ I mai la ia, E Hagara, e ke kauwawahine a Sarai, no hea mai oe? e hele ana hoi oe ihea? Iaku la kela, Ke mahuka aku nei au mai ke alo o ko'u hakuwahine, mai o Sarai aku.
- ⁹ Olelo mai la ka anela o Iehova ia ia, E hoi hou oe i kou hakuwahine, a e noho iho oe malalo o kona mau lima.
- ¹⁰ I mai la hoi ka anela o Iehova ia ia, E hoonui loa no wau i kau poe mamo, aole lakou e hiki ke heluia no ka lehulehu.
- ¹¹ I mai la hoi ka anela o Iehova ia ia, Aia hoi, ua hapai oe, a e hanau mai no oe i keikikane, a e kapa oe i kona inoa o Isemaela; no ka mea, ua lohe no o Iehova i kou popilikia.
- ¹² E lilo auanei ia i kanaka hihiu, e ku e aku no kona lima i na kanaka a pau, a e ku e mai no hoi ka lima o na kanaka a pau ia ia: a e noho auanei no ia ma ke alo o kona poe hoahanau a pau.

- ¹³ Kapaaku la ia i ka inoa o Iehova nana i olelo mai ia ia, O oe e ke Akua ka mea i ike mai ia'u: no ka mea, i iho la ia, Ua imi aku no anei au i ka Mea ike mai ia'u?
- ¹⁴ Nolaila, ua kapaia ua punawai la, o Beeralahairoi: aia no ia mawaena o Kadesa a o Bereda.
- ¹⁵ Hanau mai la o Hagara i keikikane na Aberama: kapaaku la o Aberama i ka inoa o kana keiki a Hagara i hanau ai, o Isemaela.
- ¹⁶ He kanawalukumamaono na makahiki o Aberama, i ka wa a Hagara i hanau ai ia Isemaela na Aberama.

17

- ¹ I KE kanaiwakumamaiwa o na makahiki o Aberama, ike Mai la o Iehova e Aberama, i mai la ia ia, Owau no ke Akua mana; e hele oe imua o ko'u alo, a e hemolele oe.
- ² A e hoopaa auanei au i kau berita mawaena o'u a ou; a e hoomahuahua aku au ia oe a nui loa.
- ³ Moe iho la o Aberama ilalo kona alo: a kamailio mai la ke Akua me ia, i mai la,
- ⁴ Owau no, ea, aia hoi me oe ka'u berita, a e lilo auanei oe i kupuna no na lahuikanaka he nui loa.
- ⁵ Aole oe e hea hou ia, o Aberama, aka, o Aberahama kou inoa: no ka mea, ua hoolilo aku no au ia oe i kupuna no na lahuikanaka he nui loa.
- ⁶ A e hoolilo no wau ia oe i mea hoohua nui loa, e hoopuka auanei au i na lahuikanaka mailoko aku ou, a e puka mai no hoi na alii nui mailoko aku ou.

- ⁷ A e hoopaa no hoi au i ka'u berita mawaena o'u a ou, a me kau poe mamo mahope ou ma na hanauna o lakou, i berita mau loa, i Akua no au nou, a no kau poe mamo mahope ou.
- ⁸ A e haawi aku no au i ka aina au e noho malihini nei, i ka aina a pau o Kanaana, nou, a no kau poe mamo mahope ou, i wahi e noho mau ai: a owau hoi ko lakou Akua.
- ⁹ Olelo mai la ke Akua ia Aberahama, Nolaila, e malama oe i ka'u berita, o oe a me kau poe mamo mahope ou, ma na hanauna o lakou.
- ¹⁰ Eia ka'u berita e malama ai oukou mawaena o'u a o oukou, a me kau poe mamo mahope ou; E okipoepoeia na keikikane a pau o oukou.
- ¹¹ E okipoepoe oukou i ka io o ko oukou omaka; o ka hoailona ia o ka berita mawaena o'u a o oukou.
- ¹² I ka poawalu o kona ola ana, e okipoepoeia na keikikane a pau o na hanauna o oukou; o ka mea i hanau ma kou wahi, a me ka mea i kuaiia i ke kala na ke kanaka e mai, ka mea aole nau i hua mai.
- ¹³ O ka mea i hanau ma kou wahi, a me ka mea i kuaiia i kou kala, he pono no e okipoepoeia oia: a e pili auanei ka'u berita ma ko oukou io i berita mau loa.
- ¹⁴ A o ke keikikane okipoepoe ole ia, ke okipoepoe ole ia ka io o kona omaka, e hookiia'ku ia kanaka mai kona hanauna aku; ua haihai oia i ka'u berita.
- ¹⁵ Olelo mai la ke Akua ia Aberahama, A o Sarai o kau wahine, aole oe e kahea hou aku i kona inoa, o Sarai, e kapaia oia, o Sara.

- ¹⁶ E hoopomaikai aku hoi au ia ia, a e haawi aku hoi au ia oe, i keikikane nana mai: oia, e hoopomaikai no au la ia, nana mai na lahuikanaka; a nana mai no hoi na alii o kanaka.
- ¹⁷ Alaila, moe iho la o Aberahama ilalo kona maka, akaaka iho la, a i iho la iloko o kona naau, E hanauia anei ke keiki na ka mea nona na makahiki he haneri? E hanau mai no anei o Sara, nona na makahiki he kanaiwa?
- ¹⁸ I aku la o Aberahama i ke Akua, Ina no o Ise-maela e ola imua ou!
- ¹⁹ I mai la ke Akua, He oiaio, na Sara e hanau ke keikikane nau, a e kapa aku oe i kona inoa o Isaaka: a e hoopaa auanei au i ka'u berita me ia, a me kana poe mamo mahope ona, i berita mau loa.
- ²⁰ A o Isemaela, ua hoolohe hoi au ia oe nona: Aia hoi, na hoopomaikai no au ia ia, a e hoohua auanei au i na keiki nana, a e hoomahuahua no hoi au ia ia; e hanau nana na alii he umikumamalua, a e hoolilo hoi au ia ia i Iahuikanaka nui.
- ²¹ Aka, e hoopaa auanei au i kuu berita ia Isaaka, i ka mea a Sara e hanau mai ai nau, i keia manawa o kela makahiki aku.
- ²² A oki iho la kana kamailio ana me ia, hoi aku la ke Akua iluna mai o Aberahama aku.
- ²³ Lalau aku la o Aberahama i kana keiki ia Ise-maela, a me na mea a pau i hanau ma kona hale, a me na mea a pau i kuaiia i kana kala, i na kane a pau o ko Aberahama mau ohua; a okipoepoe iho la i ka io o ko lakou omaka

ia la hookahi no, e like me, ka ke Akua i olelo
mai ai ia ia.

²⁴ He kanaiwa na makahiki a me kumamaiwa o ko
Aberahama ola ana, ia ia i okipoepoeia'i ma
ka io o kona omaka.

²⁵ He umikumamakolu na makahiki o Isemaela, ia
ia i okipoepoeia'i ma ka io o kona omaka.

²⁶ Ia la hookahi no, i okipoepoeia'i o Aberahama, a
me kana keiki o Isemaela.

²⁷ Ua okipoepoe pu ia me ia na kanaka a pau o
kona mau ohua, i hanau ma kona hale, a i
kuaiia i kona kala na ke kanaka e mai.

18

¹ I KEA ae la o Iehova e ia ma na laau oka o
Mamere: a noho iho la ia ma ka puka o ka
halelewa, i ka manawa i wela mai ai ka la.

² Alawa ae la kona mau maka iluna, ike ae la, aia
hoi, ku mai la na kanaka ekolu imua ona:
a i kona ike ana aku, holo aku la ia mai ka
puka o ka halelewa aku e halawai me lakou,
a kulou iho la ia ma ka honua.

³ I aku la ia, E kuu haku, ina i loaa ia'u ke alohaia
imua o kou mau maka, ke noi aku nei au
ia oe, mai hele wale aku oe mai kau kauwa
aku.

⁴ Ke noi aku nei au, i laweia mai kekahī wai iki e
holoi i ko oukou mau wawae, a e hoomaha
ihō oukou malalo o ka laau.

⁵ E lawe mai no hoi au i wahī berena, a e hooluolu
ihō i ko oukou naau; a mahope iho oukou
e hele aku ai; no ka mea, nolaila ko oukou
hele ana mai i ko oukou kauwa, I mai la
lakou. Me kau i olelo mai ai, pela oe e hana'i.

- ⁶ Wikiwiki ae la o Aberahama i ka hele iloko
o ka halelewa io Sara la, i aku la, E
hoomakaukau koke oe i ekolu sato palaoa
wali; e hookawili a e pulehu i papaberena.
- ⁷ Holo aku la o Aberahama i ka ohana bipi,
lalau aku la i ka bipikeiki opiopio momona,
haawi aku la i kekahī keiki, a wikiwiki iho
la ia e kalua.
- ⁸ Lalau aku ia i wahi bata a me ka waiu, a me ka
bipikeiki ana i kalua ai, a kauaku la imua o
lakou: a kuaku la ia ma o lakou la malalo o
ka laau; a ai iho la lakou.
- ⁹ Ninau mai la lakou ia ia, Auhea kau wahine, o
Sara? Iaku la ia, aia no iloko o ka halelewa.
- ¹⁰ Alaila, i mai la kela, Ho oiaio, e hoi hou mai ana
au i keia manawa o kela makahiki, aia hoi,
e loaa uanei ia Sara he keikikane. A lohe ae
la o Sara ma ka puka o ka halelewa ma kona
kua.
- ¹¹ A o Aberahama laua o Sara, ua kahiko no laua,
he nui ko laua mau la; a ua pau ia Sara ka
mea a na wahine.
- ¹² Nolaila, akaaka iho la o Sara iloko iho ona, i
oho la, E olioli no anei au mahope o kuu wa
lu wahine, a ua elemakule hoi kuu haku?
- ¹³ Ninau mai la o Iehova ia Aberahama, No ko aha
la i akaaka ai o Sara, i ka i ana, He oiaio anei,
o hanau no wau i keiki i kuu wa lu wahine?
- ¹⁴ E hakalia anei kekahī mea ia Iehova? I ka wa i
oleloia'i e hoi hou mai ana au i ou la, i keia
manawa o kela makahiki, a e loaa ia Sara he
keikikane.
- ¹⁵ Alaila hoole aku la o Sara, i aku la, Aole au i
akaaka; no ka mea, makau iho la ia. I mai
la kela, Aole, ua akaaka no oe.

- 16 Ku ae la ua mau kanaka la, nana aku la ma Sodoma; a hele pu o Aberahama me lakou e hookuu aku ia lakou.
- 17 I ae la o Iehova, E huna anei au ia Aberahama i ka'u mea e hana nei?
- 18 No ka mea, e lilo io no auanei o Aberahama i lahuikanaka nui a ikaika hoi, a e pomaikai hoi na lahuikanaka a pau o ka honua ia ia.
- 19 No ka mea, ke ike nei au ia ia, e kauoha aku no ia i kana poe keiki a me kona mau ohua mahope ona, i malama mai ai lakou i ka aoao o Iehova, a e hana lakou ma ka pono a me ka pololei; i hooili aku ai o Iehova maluna o Aberahama i ka mea ana i olelo ai nona.
- 20 Olelo mai la o Iehova, Ua nui loa ka leo no Sodoma a me Gomora, ua kaumaha no hoi ko lakou hewa;
- 21 E iho ana au ilaila e ike, i like paha ka lakou hana ana me ka leo no ia wahi i hiki mai ai io'u nei; a i ole paha, o ike auanei hoi au.
- 22 Huli ae la ua mau kanaka la i na maka o laua mailaila aku, a hele aku la i Sodoma: aka, ku iho la o Aberahama imua o Iehova.
- 23 Neenee aku la o Aberahama a kokoke, i aku la, E luku pu anei oe i ka poe pono me ka poe hewa?
- 24 Ina paha he kanalima na kanaka pono maloko o ua kulanakauhale la, e luku anei oe ia wahi, aole no o malama ia wahi no ka poe pono he kanalima maloko?
- 25 Aole loa oe e hana pela, ke pepehi pu i ka poe pono me ka poe hewa: i like pu ai ka poe

pono me ka poe hewa, aole loa oe pela:
 aole anei o hana pono ka lunakanawai o ka
 honua a pau?

- 26 I mai la o Iehova, Ina loaa ia'u ma Sodoma
 na kanaka pono he kanalima maloko o ke
 kulanakauhale, alaila au e malama ai ia
 wahi a pau no lakou.
- 27 Olelo aku la o Aberahama, i aku la, Eia hoi,
 ua hoomaka no wau e olelo aku i ka Haku,
 owau he lepo wale no, a me ka lehu:
- 28 A i emi mai na mea elima o ka poe pono he
 kanalima; e luku anei oe ia kulanakauhale
 a pau no ia mau mea elima? I mai ia kela, A
 i loaa ia'u ilaila he kanaha a me kumamal-
 ima, aole au e luku aku.
- 29 Olelo hou aku la oia ia ia, i aku la, Ina paha he
 kanaha ka poe i loaa ilaila? i mai la kela,
 Aole au o hana aku ia mea, ke kanaha lakou.
- 30 I aku la hoi oia, Ea, a i huhu ole mai ka Haku,
 e olelo aku no au: Ina paha he kanakolu ka
 poe i loaa ilaila? I mai la kela, Aole au e hana
 ia mea, ke loaa ia'u he kanakolu ilaila.
- 31 I aku la oia, Aia hoi, na hoomaka iho nei au e
 olelo aku i ka Haku: Ina paha ho iwakalua
 ka poe i loaa ilaila? I mai la kola, aole au o
 luku aku, ko iwakalua lakou.
- 32 I aku la hoi oia, A i ole e huhu mai ka Haku, a
 hookahi wale no a'u olelo e koe: Ina paha he
 umi ka poe i loaa ilaila? I mai la kela, Aole
 au e luku aku, ke umi lakou.
- 33 A pau ae la ka Iehova kamailio ana mo Abera-
 hama, hele aku la o Iehova; a hoi hou mai
 la o Aberahama i kona wahi.

19

- ¹ A AHIAHI iho la, hiki aku la na anela elua ma Sodoma: a noho iho la o Lota ma ka ipuka o Sodoma: ike aku la o Lota, ku ae la ia e halawai me lakou, a kulou iho la kona mau maka ilalo ma ka honua;
- ² I aku la, E kuu mau haku, ke noi aku nei au ia olua, e kipa mai olua maloko o ka hale o ka olua kauwa nei, e moe no a ao ka po, a e holoi i ko olua wawae, a kakahiaka nui e ala'e olua a e hele aku. I mai la laua, Aole, e moe no maua ma ke alanui a ao ka po.
- ³ Koi ikaika aku la ia ia laua; a kipa ae la laua io na la, a komo aku la iloko o kona hale; a hana iho no ia i ahaaina na laua, pulehu iho la i ka palaoa huole, a ai iho la laua.
- ⁴ Aole laua i moe iho, a o na kanaka o ke kulanakauhale, o na kanaka o Sodoma, o ka poe kahiko a me ka poe hou, o na kanaka a pau mai o a o, hoopuni mai la lakou i ka hale:
- ⁵ Kahea mai la lakou ia Lota, i mai la ia ia, Auhea na kanaka i hele mai i ou la i keia po? E kai mai ia laua iwaho io makou nei, i ike makou ia laua.
- ⁶ Hele aku la o Lota iwaho ma ka puka io lakou la; a papani ae la i ka puka mahope ona.
- ⁷ I aku la, E na hoahanau, ke nonoi aku nei au ia oukou, mai hana hewa oukou.
- ⁸ Eia hoi ia'u na kaikamahine elua i ike ole i ke kane; e ae mai oukou ia'u e lawe mai ia laua iwaho io oukou nei, a e hana aku oukou ia laua i ka mea pono ma ko oukou maka: aka, mai hana aku oukou i kekahī mea i keia

mau kanaka; no ka mea, nolaila laua i hele
mai nei ma ka malumalu o kuu hale.

⁹ I mai la lakou, E hookaawale oe. I ae la hoi lakou,
I hele mai no oia nei e noho wale maanei, a
e lilo ana ka ia i lunakanawai: ano hoi, e oi
aku ka makou hana ino ana ia oe i ko laua
la. A hookeke nui mai la lakou i ua kanaka
nei, ia Lota, a neenee mai la e wawah i ka
pani puka.

¹⁰ Aka, lalau aku la ua mau kanaka la ia Lota, a
huki mai laua ia ia iloko o ka hale io laua la,
a papani aku la i ka puka.

¹¹ Hoomakapo iho la laua i ka poe kanaka iwaho
o ka puka o ka hale, i na mea uuku a me na
mea nui: a hoopauaho lakou ia lakou iho i
ka imi i ka puka.

¹² I mai la laua ia Lota, Aole anei ia oe kekahi poe
e ae maanei? o ka hunonakane paha, o na
keikikane au, a me au mau kaikamahine, a
o na mea a pau ia oe, e laweia'ku iwaho o
keia wah:

¹³ No ka mea, e luku aku maua i keia wah, no ka
nui loa ae o ka leo no lakou, imua o ke alo
o Iehova; a ua hoouna mai no o Iehova ia
maua e luku aku ia wah.

¹⁴ Hele aku la o Lota iwaho, olelo aku la i kona mau
hunonakane i mare me na kaikamahine
ana, i aku la, E ala'e, e holo aku iwaho o
keia wah; no ka mea, e luku mai ana o
Iehova i neia kulanakauhale. Aka, ua like
ia i ka manao o na hunonakane me ka mea
hoomaewaewa.

¹⁵ I ka wanaao, hoolalelale ua mau anela la ia
Lota, i mai la, E ala ae, e lawe i kau wahine,

a me kau mau kaikamahine elua maanei,
o pau auanei oe iloko o ka make o ko ke
kulananakauhale.

¹⁶ Ia ia i hookaulua ai, lalau aku la ua mau kanaka
la i kona lima, me ka lima o kana wahine, a
me ka lima o kana mau kaikamahine elua;
ahonui mai la o Iehova ia ia: alakai aku
la laua ia ia, a hookuu aku la iwaho o ke
kulananakauhale.

¹⁷ I ka wa i alakai aku ai laua ia lakou iwaho o
ke kulananakauhale, alaila i mai la ia, E holo
i pakele kou ola; mai nana i hope ou, mai
kali oe ma neia wahi papu a pau; e holo i ka
mauna, o make oe.

¹⁸ I aku la o Lota ia laua, Auwe! e kuu Haku, aole
pela.

¹⁹ Eia hoi, ua loaa iho nei i kau kauwa ka lokomaikai imua o kou mau maka, a ua hoonui
ae nei oe i kou aloha au i hoike mai ai ia'u i
ka hoola ana mai ia'u, aole e hiki ia'u ke holo
ma ka mauna, o loaa ia'u ka poino, a make
au.

²⁰ Eia ae ke kulananakauhale, e hiki koke ke holo
malaila, a ua liilii hoi ia; ea, e ae mai ia'u e
holo malaila, (aole anei ia he wahi liilii?) a
e malamaia kuu ola.

²¹ I mai la kela ia ia, Aia, ua hoolohe aku no
au i keia mea hoi; aole au e luku aku ia
kulananakauhale, no ka mea au i olelo mai ai.

²² E wikiwiki oe e holo ilaila; no ka mea, aole e
hiki ia'u ke hana i kekahi mea, a puka aku
no oe ilaila. Nolaila, ua kapaia ka inoa o ia
kulananakauhale, o i Zoara.

- ²³ Ua puka mai ka la maluna o ka honua i ke komo ana o Lota iloko o Zoara.
- ²⁴ Alaila, hooua mai la o Iehova maluna o Sodoma i ka luaepele a me ke ahi mai o Iehova la, mai ka lani mai.
- ²⁵ Hookahuli iho la oia ia mau kulanakauhale, a me kahi papu a pau, a me na kanaka a pau o ua mau kulanakauhale la, a me na mea ulu ma ka honua.
- ²⁶ Aka, nana ae la kana wahine mahope ona, a lilo iho la ia i kukulu paakai.
- ²⁷ Ala ae la o Aberahama i kakahiaka nui, a hoi hou aku la ia i kahi ana i ku ai imua o Iehova:
- ²⁸ Nana aku la ia ma Sodoma a me Gomora, a ma ka aina papu a pau, ike aku la ia, aia hoi, pii ae la ka uahi o ia aina iluna, e like me ka punoho o ka lua ahi.
- ²⁹ A i ka wa a ke Akua i luku ai i na kulanakauhale o ka papu, hoomanao iho la no ke Akua ia Aberahama, a hoopakele ae la ia Lota maiwaena aku o ka hookahuli ana, ia ia i hookahuli ai i na kulanakauhale kahi a Lota i noho ai.
- ³⁰ Pii ae la o Lota mailoko aku o Zoara, a noho iho la ma ka mauna, a me ia pu na kaikamahine ana elua; no ka mea, makau iho la ia ke noho ma Zoara: noho no ia ma kekahī ana, oia a me kana mau kaikamahine elua.
- ³¹ I aku la ka hanau mua i kona kaikaina, Ea, ua elemakule ko kana makuakane, aole hoi he kanaka ma ka honua nei a pau nana e komo

mai io kaua nei, e like me ka nana ana a ko
ka honua nei:

³² Ina kaua, o hooинu kaua i ko kaua makuakane i
ka waina, a e moe kaua me ia, i malama ai
kana i hua na ko kaua makuakane.

³³ Hooинu laua ia po i ko laua makuakane i ka
waina: a komo aku la ka hanau mua iloko, a
moe iho la me kona makuakane: aole nae i
ike kela i kona wa i moe iho ai, aole hoi kona
wa i ala'i.

³⁴ A ia la ae, i aku la ka hanau mua i ke kaikaina,
Aia hoi, moe iho no au me kuu makuakane
i ka po nei: e hooинu kaua ia ia i ka waina i
keia po no hoi; a e komo aku oe iloko, e moe
me ia, i malama ai kana i hua na ko kana
makuakane.

³⁵ Hooинu laua i ko laua makuakane i ka waina ia
po no hoi: a ku ae la ke kaikaina, a moe iho
la me ia; aole kela i ike i kona wa i moe iho
ai, aole hoi i kona wa i ala ai.

³⁶ Hapai na kaikamahine elua a Lota na ko laua
makuakane.

³⁷ Hanau mai la ka mua i keikikane, a kapa iho la
i kona inoa o Moaba: oia ke kupuna o ka
Moaba a hiki i keia manawa.

³⁸ A hanau mai la hoi ka muli iho i keikikane, a
kapa iho la i kona inoa o Benami: oia ke
kupuna o ka Amona a hiki i keia manawa.

20

¹ HELE aku la o Aberahama mailaila aku ma ka
aina kukuluhema, a noho hoi ia mawaena
o Kadesa a o Sura, a ma Gerara kona noho
malihini ana.

- ² Olelo aku la o Aberahama no kana wahine no Sara, Oia no kuu kaikuwahine: a hoouna mai la o Abimeleka ke alii o Gerara, a lawe aku la ia Sara.
- ³ A hele mai la ke Akua io Abimeleka la ma ka moeuhane i ka po, i mai la ia ia, Aia hoi, he kanaka make oe, no ka wahine au i lawe iho nei, no ka mea, he wahine mea kane ia.
- ⁴ Aka, aole i hoopili o Abimeleka ia ia: i aku la oia, E ka Haku, e pepehi mai no hoi oe i ka lahuikanaka hala ole?
- ⁵ Aole anei ia i olelo mai ia'u, O ko'u kaikuwahine ia! a o ka wahine, oia ka i i mai, He kaikunane keia no'u: ma ka manao pono o kuu naau a me ka hala ole o kuu mau lima ka'u i hana aku ai i keia.
- ⁶ I mai la ke Akua ia ia ma ka moeuhane, Oiaio. ke ike nei au, ua hana aku oe i keia ma ka manao pono o kou naau; a ua hoopaa no hoi au ia oe, i ole oe e hana hewa mai ia'u: nolaila, aole au i ae aku ia oe e hoopa ia ia.
- ⁷ No ia mea hoi, e hoihoi aku na ua kanaka la i kana wahine; no ka mea, he kaula ia, a nana no e pule mai nou, i ola ai oe: a i ole oe e hoihoi mai ia ia, alaila e ike pono oe, he oiaio e make no oe, o oe a me ou poe a pau.
- ⁸ Ala ae la o Abimeleka i kakahiaka nui, houluulu ae la i kana poe kauwa a pau, a hai aku la i keia mau mea maloko o ko lakou mau pepeiao: a makau loa iho la na kanaka.
- ⁹ Alaila, kahea mai la o Abimeleka ia Aberahama, i mai la ia ia, Heaha kau i hana mai ai ia makou? Heaha hoi ko'u hala in oe, i hooili

mai ai oe iluna iho o'u a o ko'u aupuni ka hewa nui? Ua hana mai oe ia'u i na mea pono ole ke hanaia.

- 10** Ninau mai la o Abimeleka ia Aberahama, Heaha kau i ike mai ai, i hana iho ai oe i keia mea?
- 11** I aku la o Aberahama, No ka mea, i iho la au ma kuu naau, He oiaio, aole ka makau i ke Akua ma keia wahi; a e pepehi mai auanei lakou ia'u no kuu wahine.
- 12** He oiaio hoi, o ko'u kaiku wahine no ia, ke kaikamahine a kuu makuakane, aole nae ia ke kaikamahine a kuu maku wahine, a lilo mai la ia i wahine na'u.
- 13** A i ka manawa a ke Akua i hooanwana mai ai ia'u mai ka hale o ko'u makuakane mai, i aku la au ia ia nei, Eia kou lokomaikai au e hoike mai ai ia'u: i na wahi a pau e hiki aku ai kana, e olelo aku oe no'u, O ko'u kaikunane ia.
- 14** Lawe ae la o Abimeleka i na hipa, me na bipikane, i na kauwakane a me na kauwawahine, a haawi mai la ia Aberahama, a hoihoi mai la oia ia Sara kana wahine nana.
- 15** I mai la o Abimeleka, Aia hoi, imua ou ko'u aina, e noho ma kahi i makemake ai oe.
- 16** I mai la hoi oia ia Sara, Aia hoi, ua haawi iho nei au i na apana kala he tausani na kou kaikunane: aia hoi, he mea pale maka ia nou imua o ka poe a pau me oe, a me na mea a pau: pela oia i aoia mai ai.
- 17** Pule aku la o Aberahama i ke Akua: a hoola mai la ke Akua ia Abimeleka, me kana wahine

a me kana poe kauwawahine; a hanaukeiki lakou.

18 No ka mea, ua papaniia e Iehova na opu o na wahine a pau o ka hale o Abimeleka, no Sara ka wahine a Aberahama.

21

1 I KE mai la o Iehova ia Sara e like me kana i i mai ai; a hana mai la o Iehova ia Sara e like me kana i olelo mai ai.

2 No ka mea, hapai ae la o Sara, a hanau mai la he keikikane na Aberahama i kona wa elemakule; i ka manawa a ke Akua i olelo mai ai ia ia.

3 Kapaaku la o Aberahama i ka inoa o kana keiki i hanau nana, i ka mea a Sara i hanau ai nana, o Isaaka.

4 I ka po awalu, okipoepoe ae la o Aberahama i kana keiki ia Isaaka e like me ka ke Akua i kauoha mai ai ia ia.

5 Hookahi haneri makahiki o Aberahama i ka wa i hanau ai o Isaaka nana.

6 I mai la o Sara, Ua hoakaaka mai no ke Akua ia'u, a e akaaka pu hoi me au ka poe lohe a pau.

7 I mai la hoi oia, Owai ka mea i olelo ia Aberahama, e hanai auanei o Sara i na keiki i ka waiu? no ka mea, ua hanau iho nei au i keikikane nana i kona wa elemakule.

8 Nui ae la na keiki nei, a ukuhi ia: a hana iho la o Aberahama i ka ahaaina nui, i ka la a Isaaka i haalele ai i ka waiu.

- ⁹ Ike aku la o Sara i ke keiki a Hagara no Aigupita,
i ka mea ana i hanau ai na Aberahama, e
hoomaewaewa ana.
- ¹⁰ No ia mea, i mai la oia ia Aberahama, E hookuke
aku oe i ua kauwawahine la a me kana
keiki: no ka mea, aole e hooili pu ia'ku ka
waiwai i ke keiki a ua kauwawahine la me
ka'u keiki, me Isaaka.
- ¹¹ He mea ehaeha loa ia i ka manao o Aberahama,
no kana keiki.
- ¹² I mai la ke Akua ia Aberahama, Mai hoe-
haeha oe i kou naau no ke keiki, a no kau
kauwawahine, e hoolohe aku oe i ka leo o
Sara i ka mea a pau ana i olelo mai ai ia
oe; no ka mea, e kapai'a'ku kau poe mamo
mamuli o Isaaka.
- ¹³ A e hoolilo auanei hoi au i ke keiki a ke
kauwawahine i lahuikanaka, no ka mea, o
kau keiki ia.
- ¹⁴ Ala ae la o Aberahama i ke kakahiaka nui, lalau
aku la ia i ka berena a me ka wai iloko o ka
hue a haawi ae la ia Hagara, a kau aku la
maluna o kona poohiwi, a me ke keiki no
hoi, a kuu aku la ia ia: hele aku no ia, a
kuewa wale ae la maloko o ka waonahele o
Beeresaba.
- ¹⁵ A pau ae la ka wai iloko o ka huewai, waiho iho
la ia i ke keiki malalo o kekahia laau uuku.
- ¹⁶ Hele aku la ia, a noho iho la i kahi kupono ia ia, e
mamaao aku ana e like me ka pana ana o ka
pua: no ka mea, i iho la ia, Aole au e pono ke
ike i ka make ana o ke keiki Noho aku la ia i

kahi kupono, a hookiekie ae la ia i kona leo,
a uwe iho la.

¹⁷ Hoolohe mai la ke Akua i ka leo o ke keiki; a kahea mai la ka anela o ke Akua ia Hagara mai ka lani mai, i mai la ia ia, Heaha kau e Hagara? mai makau oe; no ka mea, ua hoolohe mai no ke Akua i ka leo o ke keiki ma kona wahī i waiho ai.

¹⁸ E ku ae oe, e kaikai ae i ke keiki, a e hoopaa aku kou lima ia ia; no ka mea, e hoolilo auanei au ia ia i lahuikanaka nui.

¹⁹ Hookaakaa ae la ke Akua i kona mau maka, a ike aku la ia i kekahi luawai: hele aku la ia, ukuhi iho la a piha ka huewai i ka wai, a hooinu iho la i ke keiki.

²⁰ Me ua keiki nei no ke Akua, a nui ae la ia, a noho iho la ma ka waonahele, a lilo ae la ia i kanaka pana pua,

²¹ Noho iho la ia ma ka waonahele o Parana: a lawe ae la kona makuwahine i wahine nana, no Aigupita mai.

²² Ia manawa, olelo mai la o Abimeleka laua o Pikola kona luna koa ia Aberahama, i ka i ana mai, Me oe no ke Akua i na mea a pau au e hana nei:

²³ Nolaila hoi, e hoohiki oe no'u ano ma ke Akua, aole oe e hoopunipuni mai ia'u, aole i ka'u keiki, aole hoi i ka'u moopuna: e like me ka lokomaikai a'u i hana aku ai ia oe, pela hoi oe e hana mai ai ia'u, a i ko ka aina au i noho iho ai.

²⁴ I aku la o Aberahama, E hoohiki no wau.

²⁵ Ao aku la hoi o Aberahama ia Abimeleka no ka luawai a na kauwa a Abimeleka i kaili aku ai.

- ²⁶ I mai la o Abimeleka, Aole au i ike i ka men nana
i hana ia mea: aole hoi oe i hai mai; aole hoi
au i lohe a hiki i keia la.
- ²⁷ Lalau aku la o Aberahama i na hipa a me na
bipikane, a haawi aku la ia mau mea no
Abimeleka; a hoopaa iho la laua a elua i
berita.
- ²⁸ A hoonoho aku la o Aberahama i na hipa keiki
wahine i ehiku ma kahi kaawale.
- ²⁹ Ninau mai la o Abimeleka ia Aberahama, I me
aha keia mau hipa keiki wahine ehiku, au i
hoonoho iho ai ma kahi kaawale!
- ³⁰ I aku la keia, No ka mea, e lawe oe i keia mau
hipa keiki wahine ehiku na kuu lima aku, i
mea hoike maka no'u, na'u no i eli iho i keia
luawai.
- ³¹ Nolaila, kapa iho la oia ia wahi, o Beereseba; no
ka mea, ilaila i hoohiki aku ai laua a elua.
- ³² Pela no laua i hoopaa iho ai i berita ma Beere-
seba: alaila, ku ae la o Abimeleka laua o
Pikola kona luna koa, a hoi hou aku la laua
i ka aina o ko Pilisetia.
- ³³ Kanu iho la o Aberahama i laau ma Beereseba,
a kahea aku la ilaila i ka inoa o Iehova ke
Akua mau loa.
- ³⁴ Noho iho la o Aberahama ma ka aina o ko
Pilisetia i na la he nui loa.

22

- ¹ MAHOPE mai o ia mau mea, hoao mai la ke Akua
ia Aberahama, i mai la ia ia, E Aberahama:
iaku la kela, Eia no wau.
- ² I mai la oia, E lawe aku oe i kau keiki i kau
ponoi, ia Isaaka, i kau mea au e aloha nei,

a e hele aku oe i ka aina o Moria; malaila oe e kaumaha aku ai ia ia i mohaikuni maluna o kekahia puu a'u e hoike aku ai ia oe.

- ³ Ala ae la o Aberahama i kakahiaka nui, hoee aku la ia i ka noho maluna o kona hoki, kono pu ae la i na kanaka ui elua ona me ia, a me Isaaka kana keiki, kaka iho la i ka wahie no ka mohaikuni, ku ae la a hele aku la i kahi a ke Akua i i mai ai ia ia.
- ⁴ I ke kolu o ka la alawa ae la na maka o Aberahama, a ike aku la ia wahi mamao aku.
- ⁵ I aku la o Aberahama i kona mau kanaka ui, E noho iho olua maanei me ka hoki, a hele no maua me ke keiki i o e hoomana ai; a hoi hou mai io olua nei.
- ⁶ Lawe ae la o Aberahama i ka wahie no ka mohaikuni, a kau iho la maluna o kana keiki o Isaaka, lawe aku la ia i ke ahi, a me ka pahi ma kona lima, a haele pu aku la laua.
- ⁷ Olelo aku la o Isaaka i kona makuakane, ia Aberahama, E kuu makua: i mai la kela, Eia wan, e kuu keiki. I aku la ia, Eia ke ahi, a me ka wahie; auhea hoi ke keikihipa i mohaikuni?
- ⁸ I mai la o Aberahama, E kuu keiki, na ke Akua no e hoomakaukau i keikihipa nana i mohaikuni: a haele pu aku la laua.
- ⁹ A hiki aku la laua i kahi a ke Akua i i mai ai ia ia; hana iho la o Aberahama i kuahu ilaila, kau pono aku la i ka wahie maluna, hikii iho la ia i kana keiki ia Isaaka, a kau aku la ia ia ma ke kuahu maluna o ka wahie.
- ¹⁰ O aku la ko Aberahama lima, a lalau i ka pahi e pepehi i kana keiki.

- 11** Kahea mai la ka anela o Iehova mai ka lani mai,
i mai la, E Aberahama! e Aberahama! I aku
la kela, Eia wau.
- 12** I mai la ia, Mai kau aku oe i kou lima maluna o
ke keiki, aole hoi e mea iki aku ia ia: no ka
mea, ke ike nei au, ua makau oe i ke Akua:
no ka mea, aole oe i aua i kau keiki, i kau
keiki ponoi ia'u.
- 13** Alawa ae la na maka o Aberahama iluna, ike
aku la, aia hoi, ma kona kua he hipakane,
ua hihi kona pepeiaohao i ka nahelehele:
hele aku la o Aberahama, lalau aku la i
ua hipakane la, a kaumaha aku la ia ia i
mohaikuni, i kala no kana keiki.
- 14** Kapa aku la o Aberahama i ka inoa o ia wahi,
O Iehova-iire: me ia i oleloia mai ai a
hiki i keia la, Ma ka mauna o Iehova e
hoomakaukauia'i.
- 15** Kahea hou mai la ka anela o Iehova ia Abera-
hama mai ka lani mai,
- 16** I mai la, Ke olelo mai nei o Iehova, Ma o'u nei au
i hoohiki iho ai, no kau hana ana i keia mea,
aoles hoi i aua i kau keiki, i kau keiki ponoi;
- 17** E hoopomaikai nui aku no au ia oe, a e hoonui
loa aku hoi au i kau poe mamo e like me na
hoku o ka lani, a me na one ma kahakai; a e
lilo auanei i kau poe mamo ka ipuka o kona
poe enemi:
- 18** A ma kou mamo e hoopomaikaiia'i na
lahuikanaka a pau o ka honua; no ka mea,
ua hoolohe mai oe i ko'u leo.
- 19** Hoi hou aku la o Aberahama i kona mau kanaka
ui, ku ae la laua a hele pu aku la i Beereseba:
a noho iho la o Aberahama i Beereseba.

- ²⁰ Mahope mai o ia mau mea, haiia mai ia Aberahama, i ka i ana mai, Aia hoi, o Mileka, ua hanau no hoi oia i na keiki na kou kaikuaana na Nahora;
- ²¹ O Huza kana hiapo, o Buza kona kaikaina, a o Kemuela ka makuakane o Arama,
- ²² O Keseda, a o Hazo, a o Piledasa, a o Iidelapa, a o Betuela.
- ²³ Na Betuela o Rebeka: o keia mau mea ewalu ka Mileka i hanau ai na Nahora ke kaikuaana o Aberahama.
- ²⁴ Na kana haiawahine hoi, o Reuma kona inoa, nana hoi i hanau mai o Teba, o Gehama, o Tahasa, a o Maaka.

23

- ¹ HOOKAHI haneri na makahiki me ka iwakalukumamahiku o Sara: oia na makahiki o keola ana o Sara.
- ² A make aku la o Sara ma Kiriatareba, oia o Heberona ma ka aina o Kanaana; a hele mai la o Aberahama e uwe a e kanikau ia Sara.
- ³ Ka ae la o Aberahama iluna, mai ke alo ae o kana mea i make, olelo aku la ia i na mamo a Heta, i aku la,
- ⁴ He malihini no wau e noho wale ana me oukou: e haawi mai i ilina iwaena o oukou, i lilo ia no'u, i kanu aku au i kuu mea i make, mai ko'u mau maka aku.
- ⁵ Olelo mai na mamo a Heta ia Aberahama, i mai la ia ia,
- ⁶ E hoolohe mai oe i ka makou, e kuu haku: he alii nui no oe iwaena o makou; ma ka ilina maikai loa o makou, e kanu iho ai oe i kau

mea make: aole e aua kekahi o makou i kona ilina ia oe, i ole oe e kanu i kou mea make.

⁷ Ka ae la o Aberahama, a kulou iho la imua o na kanaka o ka aina, o na mamo a Heta.

⁸ Kamailio aku la ia me lakou, i aku la, Ina o ko oukou manao ia, i kanu iho ai au i kuu mea make mai o'u mau maka aku; e hoolohe mai, a e noi aka oukou ia Eperona ke keiki a Zohara no'u;

⁹ I haawi mai ai oia i ke ana o Makepela no'u; nona no ia, aia no ma ka palena o kana mahinaai; no na kala e pono ke kuai, e haawi mai no oia ia wahi no'u i ilina iwaena o oukou.

¹⁰ Noho pa iho la o Eperona me na mamo a Heta: olelo mai la o Eperona ka Heta ia Aberahama, ma ka lohe o na mamo a Heta, a o ka poe a pau i komo ma ka ipuka o ke kulankauhale, i mai la,

¹¹ E kuu haku, e hoolohe mai oe ia'u: ke haawi wale aku nei au i ka mahinaai a me ke ana maloko, nou, ke haawi aku nei au nou ia wahi: imua o na keiki a o'u poe kanaka, ke haawi aku nei au nou ia wahi: e kanu aku oe i kau mea make.

¹² Kulou iho la o Aberahama ilalo, imua o na kanaka o ia aina.

¹³ I aku la oia ia Eperona ma ka lohe o na kanaka o ia aina, i ka i ana, Ke noi aku nei au ia oe, e hoolohe mai oe ia'u, Ina e ae mai oe, e haawi aku no wau i ke kala no ua mahinaai la; e lawe oe i ka'u, a e kanu no wau i kau mea make ilaila.

¹⁴ Olelo mai la o Eperona ia Aberahama, i mai la ia ia,

- 15 E kuu haku, e hoolohe mai ia'u, eha haneri sekela kala ke kumukuai o ia aina; heaha hoi ia iwaena o kaua? e kanu hoi oe i kau mea make.
- 16 Ae mai la o Aberahama ia Eperona; a kaupouna iho la o Aberahama no Eperona i ke kala ana i olelo ai ma ka lohe o na mamo a Heta, eha haneri sekela kala, he kala pono i ka poe kuai.
- 17 A ua hoolilo paa ia ka mahinaai a Eperona ma Makepela, ma ke alo o Mamere, o ka mahinaai me ke ana maloko, a me na laau a pau o na mahinaai la, a e puni ana ma na palena a pau,
- 18 No Aberahama i wahi nona ma ke alo o na mamo a Heta, imua hoi o ka poe a pau i komo ma ka ipuka o kona kulanakauhale.
- 19 Mahope iho, kanu iho la o Aberahama i kana wahine ia Sara iloko o ke ana ma ka mahinaai o Makepela ma ke alo o Mamere: oia o Heberona i ka aina o Kanaana.
- 20 Ua hoolilo paa ia ka mahinaai a me ke ana maloko, no Aberahama i ilina nona, e na mamo a Heta.

24

- 1 U A elemakule o Aberahama, ua nui no hoi kona mau la, a ua hoopomaikai o Iehova ia Aberahama i na mea a pau.
- 2 I aku la o Aberahama i ke kauwa kahiko o kona hale, i ka mea ia ia ka malama i kona mea a

pau, E, e kau mai oe i kou lima malalo iho o ko'u uha:

- ³ A na'u no e haawi aku ia oe e hoohiki ma o Iehova la, ma ke Akua o ka lani, a ke Akua o ka honua; i lawe ole ai oe i wahine na ka'u keiki na Isaaka, no na kaikamahine a ko Kanaana ka poe a'u o noho nei iwaena.
- ⁴ Aka, e hele aku oe i ko'u aina, a i ko'u poe hoahanau, a e lawe mai i wahine na ka'u keiki na Isaaka.
- ⁵ I mai la ua kauwa nei ia ia, Ina paha aole e makemake ka wahine e hahai mai ia'u a hiki i keia aina: e pono anei ia'u e kai aku i kau keiki i ka aina au i hele mai nei?
- ⁶ Papa aku la o Aberahama ia ia, E ao oe, mai kai aku oe i ka'u keiki malaila.
- ⁷ Na Iehova ke Akua o ka lani, nana au i lawe, mai ka hale mai o ko'u makuakane, a mai ka aina mai o ko'u poe hoahanau, a olelo mai ia'u, a hoohiki mai no hoi ia'u, i ka i ana mai, E haawi auanei au i keia aina no kau poe mamo; nana no e hoouna aku i kona anela mamua ou, a e lawe mai oe i wahine na ka'u keiki mailaila mai.
- ⁸ A i makemake ole ka wahine e hahai mai ia oe, alaila e hala ole oe i keia hoohiki ana no'u: aka, mai kai aku oe i ka'u keiki ilaila.
- ⁹ A kau iho la ke kauwa i kona lima malalo iho o ka uha o Aberahama kona haku, a hoohiki iho la nona ma ia mea.
- ¹⁰ Lalau aku la ua kauwa la i na kamelo o kona haku he umi, no ka mea, ma kona lima ka waiwai a pau o kona haku: ku ae la ia, a hele

aku la i Mesopotamia, i ke kulanakauhale o Nahora.

¹¹ Hookukuli iho la ia i kona mau kamelo mawaho o ke kulanakauhale, ma ka luawai, i ke ahiahi, i ka manawa e hele mai ai na wahine e huki wai.

¹² I aku la ia, E Iehova ke Akua o kuu haku o Aberahama, ke pule aku nei au ia oe, e hoopomaikai mai oe ia'u i keia la, a e lokomaikai mai oe i kuu haku ia Aberahama,

¹³ Eia au ke ku nei ma ka luawai; a e hele mai ana na kaikamahine a na kanaka o ke kulanakauhale e huki i ka wai:

¹⁴ E ae mai oe, o ke kaikamahine a'u e olelo aku ai, Ke noi aku nei au ia oe, e kuu iho oe i kou bakeke, i inu ai au; a e i mai oia, E inu oe, a e hoohainu hoi au i na kamelo: oia no ka mea au i koho ai na kau kauwa na Isaaka; ilaila au e ike ai i kau lokomaikai ana mai i kuu haku.

¹⁵ Aole ia i hooki iho i kana olelo ana, Aia hoi, hiki mai la o Rebeka, ka mea i hanau na Betuela, na ke keikikane a Mileka a ka wahine a Nahora, ko Aberahama kaikuaana, me kona bakeke maluna o kona poohiwi.

¹⁶ Ua maikai ka maka o ua kaikamahine la ke nanaia'ku, he wahine puupaa, aole i ikeia e kekah i kane: iho iho la ia ma ka luawai, hoopihia iho la i kona bakeke, a hoi mai la iluna.

¹⁷ Holo aku la ua kauwa la e halawai me ia, i aku la, E, ke noi aku nei au ia oe, e ho mai no'u i wahi wai o kou bakeke e inu.

- 18 I mai la kela, E inu oe, e kuu haku a wikiwiki
oia i kuu iho i kona bakeke ma kona lima,
a hoohainu mai la ia ia.
- 19 A pau kana hoohainu ana ia ia, i mai la ia, E huki
hoi au i ka wai no kou mau kamelo, a pau ko
lakou inu ana.
- 20 Wikiwiki ae la ia, a ninini iho la i ka wai o kona
bakeke iloko o ke pa, a holo hou ae la i ka
luawai e huki ai, a huki mai la ia no kona
poe kamelo a pau.
- 21 Mahalo iho la ka naau o ua kanaka la ia ia,
aole ia i ekemu aku, i mea e ike ai oia, i ka
hoopomaikai ana mai paha o Iehova i kona
hele ana mai, aole paha.
- 22 A pau ka inu ana o na kamelo, lawe ae la ua
kanaka la i kekahī apo gula no ka ihu, he
hapalua o ka sekela ma ke kaupouna ana,
me na kupee gula elua no kona mau lima,
he umi [na sekela] ma ke kaupouna ana;
- 23 Ninau aku la ia, He kaikamahine oe nawai? ke
noi aku nei au ia oe, e hai mai ia'u: a he
wahi kaawale no anei iloko o ka hale o kou
makuakane e moe ai makou?
- 24 I mai la kela ia ia, Owau no ke kaikamahine a
Betuela a ke keiki a Mileka, ana i hanau ai
na Nahora.
- 25 I hou mai la hoi kela ia ia, He mauu maloo no a
he ai na na holoholona ia makou a nui, a he
wahi no hoi e moe ai.
- 26 Kulou iho la ke poo o ua kanaka la, a hoomaikai
aku la ia Iehova;
- 27 I aku la, E hoomaikaiia'ku o Iehova ke Akua o
kuu haku o Aberahama, aole ia i hoonele
mai i kuu haku i kona aloha a me kona

oiaio: ma ke alanui wau, a ua alakai aku o Iehova ia'u ma ka hale o na hoahanau o kuu haku.

²⁸ Holo aku la ua kaikamahine la, a hai aku la i ko ka hale o kona makuwahine ia mau mea.

²⁹ He kaikunane ko Rebeka, o Labana kona inoa; a holo mai la o Labana iwaho i ua kanaka la, ma ka luawai.

³⁰ A ike aku la ia i ke apo no ka ihu, a me na kupee lima ma na lima o kona kaikuwahine, a lohe aku la ia i ka olelo a kona kaikuwahine a Rebeka, i ka i ana mai, Pela i olelo mai ai ke kanaka ia'u; hele mai la ia i ua kanaka nei; aia hoi, ku iho la ia me na kamelo ma ka luawai.

³¹ I mai la ia, E ka mea i alohaia e Iehova, e komo mai oe; heaha kau e ku wale nei iwaho? no ka mea, ua hoomakaukau iho nei au i ka hale, a me ka wahi no na kamelo.

³² Komo aku la ua kanaka la iloko o ka hale: wehe ae la ia i na kamelo, a haawi aku la i ka mauu maloo a me ka mea ai na na kamelo, a me ka wai e holoi i kona mau wawae, a me na wawae o na kanaka me ia.

³³ A laweia mai ka ai nana: i aku la oia, Aole au e ai, a hai e aku au mamua i ka'u mea i hele mai nei. I mai la kela, E hai mai.

³⁴ I aku la ia, Owau no ke kauwa a Aberahama.

³⁵ Ua hoopomaikai nui mai o Iehova i kuu haku; a ua lilo ia i mea nui: ua haawi mai ia nana i hipa, a me na bipi, i ke kala a me ke gula, i na kauwakane a me na kauwawahine, i na kamelo a me na hoki.

- 36 A hanau mai la o Sara ka wahine a kuu haku
i keikikane nana i kona wa lu wahine, a ua
haawi aku kela i kona waiwai a pau nona.
- 37 A ua haawi mai kuu haku ia'u e hoohiki, i ka i
ana mai, Mai lawe oe i wahine na kuu keiki
no na kaikamahine a ko Kanaana, nona
keia wahi a'u e noho nei:
- 38 Aka, e hele oe i ka ohana a kuu maknakane,
a i ko'u poe hoahanau, a e lawe mai oe i
wahine na kuu keiki.
- 39 I aku la au i kuu haku, Ina paha aole e make-
make ka wahine e hahai mai ia'u.
- 40 I mai la kela ia'u, Na Iehova, na ka Mea imua
ona ko'u hele ana, nana no e hoouna aku
i kona anela me oe, a e hoopomaikai i kou
hele ana; a e lawe mai oe i wahine na kuu
keiki no ko'u poe hoahanau, a no ka ohana
a ko'u makuakane:
- 41 Alaila, e hala ole oe i kuu hoohiki ana, ke hiki
aku oe i ko'u poe hoahanau, a haawi ole mai
lakou ia oe, alaila e hala ole oe i kuu hoohiki
ana.
- 42 A hiki mai la au i keia la i ka luawai, i aku la, E
Iehova ke Akua o kuu haku o Aberahama,
ina oe e hoopomaikai mai i kuu hele ana e
hele nei:
- 43 Eia wau, ke ku nei ma ka luawai, a i ka manawa
e hele mai ai ka wahine puupaa e huki wai
ai, a e i aku au ia ia, Ke noi aku nei au ia oe,
e haawi mai no'u i wahi wai o kou bakeke e
inu;
- 44 A e olelo mai oia ia'u, E inu oe, a e huki hoi au no
kou mau kamelo; oia ka wahine a Iehova i
koho ai na ke keiki a ko'u haku.
- 45 Aole au i hooki iho i ka olelo ana iloko o kuu
naau, aia hoi, puka mai la o Rebeka, me

kona bakeke maluna o kona poohiwi; iho iho la ia ma ka luawai, a huki mai la: i aku la au ia ia, Ke noi aku nei au ia oe, e haawi mai no'u e inu.

46 Wikiwiki iho la ia, a kuu iho la i kona bakeke mailuna iho ona, i mai la, E inu oe, a e hooinu hoi au i kou mau kamelo: inu iho la no au, a hooinu aku la hoi oia i na kamelo.

47 Ninau aku la au ia ia, iaku la, He kaikamahine oe nawai? I mai la kela, He kaikamahine na Betuela ke keiki a Nahora, na ka mea a Mileka i hanau ai nana: a lou aku la au i ke apo ma kona ihu, a me na kupee lima ma kona mau lima.

48 Kulou iho la au i kuu poo, a hoomana aku la ia Iehova, a hoomaikai aku la ia Iehova i ke Akua o kun haku o Aberahama, nana au i alakai ma ke ala pono, i lawe au i ke kaikamahine a ka hoahanau o kuu haku i wahine na kana keiki.

49 Ano la, a i manao lokomaikai io mai oukou i kuu haku, e hai mai ia'u: a i ole, e hai mai hoi; i huli aku ai au i ka akau paha, i ka hema paha.

50 Alaila, olelo mai la o Labana laua o Betuela, i mai la, No Iehova mai ia mea; aole e hiki ia maua ke olelo aku ia oe he hewa, aole hoi he pono.

51 Aia hoi o Rebeka imua o kou alo, e lawe oe ia ia a e hele aku, i lilo ai ia i wahine na ke keiki a kou haku, e like me ka Iehova i olelo mai ai.

52 A lohe ae la ke kanwa a Aberahama i ka laua olelo, hoomana aku la ia ia Iehova, [e kulou ana] i ka honua.

- 53 Lawe mai la ua kauwa la i na mea kala a me na
 mea gula, a me na aahu, a haawi aku la ia
 mau mea no Rebeka; haawi aku la hoi oia
 i na mea maikai na kona kaikunane a me
 kona makuwahine.
- 54 Ai iho la lakou a inu hoi, oia a me na kanaka
 me ia, a moe iho la ia po. Ala ae la lakou i
 kakahiaka, i aku la ia, E kuu aku oukou ia'u
 e hele i ko'u haku.
- 55 I mai la kona kaikunane laua o kona
 makuwahine, E noho no ke kaikamahine
 me makou i kekahi mau la, i umi paha: a
 mahope aku e hele no ia.
- 56 I aku la kela ia laua, Mai keakea mai olua ia'u, no
 ka mea, ua hoopomaikai mai o Iehova i kuu
 hele ana mai; e kuu aku oukou ia'u e hele
 aku ai i ko'u haku.
- 57 I mai la laua, E hea aku maua i ke kaikamahine,
 a e ninau aku ia ia.
- 58 Hea aku la laua ia Rebeka, ninau aku la ia ia, E
 aku oe e hele pu me keia kanaka? I mai la
 kela, E hele wau.
- 59 Kuu aku la laua ia Rebeka o ko laua
 kaikuwahine, me kona kahu, a me ke
 kauwa a Aberahama, a me na kanaka
 ona.
- 60 Hoomaikai aku la laua ia Rebeka, i aku la, O
 oe no ko maua kaikuwahine, e lilo oe i
 makuwahine o na tausani miliona: e lilo
 hoi no kau poe mamo, ka pukapa o ka poe
 inaina aku ia lakou.
- 61 Ku ae la o Rebeka, me kona mau wahine, holo
 mai la lakou maluna o na kamelo, e hahai
 ana i ua kanaka la: a lawe ae la ua kauwa la
 ia Rebeka, a hoi mai la.

- ⁶² I hele mai la o Isaaka ma ke alanui o ka punawai Lahairoi: no ka mea, i noho no ia ma ka aina kukuluhema.
- ⁶³ Hele aku la o Isaaka ma ke kula e noonoo ai i ka wa ahiahi: alawa ae la kona mau maka iluna, aia hoi na kamelo e hoi mai ana.
- ⁶⁴ Nana mai la o Rebeka, a ike mai la oia ia Isaaka, lele iho la ia mai luna iho o ke kamelo.
- ⁶⁵ No ka mea, ua ninau aku ia i ua kauwa la, Owai ia kanaka e hele mai ana i ke kula e halawai me kakou? a ua i mai ke kauwa, O kuu haku no ia: no ia mea, lawe ae la ia i ka pale, a hooouhi iho la ia ia iho.
- ⁶⁶ A hai mai la ua kauwa la ia Isaaka i na mea a pau ana i hana'i.
- ⁶⁷ Alakai aku la o Isaaka ia ia maloko o ka halelewa o kona makuwahine o Sara; lawe aku la oia ia Rebeka, a lilo iho la ia i wahine nana, a aloha ae la oia ia ia. A ua hooluoluia o Isaaka no kona makuwahine.

25

- ¹ LAWE hou ae la o Aberahama i wahine nana, o Ketura kona inoa.
- ² O na keiki ana i hanau ai nana, o Zimerama, o Iokesana, o Medana, o Midiana, o Isebaka a o Sua.
- ³ Na Iokesana o Seba, a o Dedana. Eia ka poe mamo a Dedana, o ka Asurima, Ka Letusima, a me ka Leumima.
- ⁴ O na keiki a Midiana; o Epa, o Epera, o Hanoka, o Abida, a o Eledaa. O keia poe a pau na Ketura mai.

- ⁵ Kauoha mai la o Aberahama i kona waiwai a pau ia Isaaka.
- ⁶ Aka, haawi aku la o Aberahama i na makana na na keikikane a na haiawahine a Aberahama, a hookuu aku la ia lakou, i kona wa e ola ana, mai kana keiki o Isaaka aku, e hele i ka aina o ka hikina.
- ⁷ Eia na la o na makahiki o ko Aberahama ola ana, hookahi haneri a me kanahikukumamalima.
- ⁸ Alaila kaliia'ku ke ea o Aberahama, a make iho la ia i ka wa elemakule maikai; he kanaka kahiko loa ia, a ua nui na la ona, a ua huiia'ku ia me kona poe kanaka.
- ⁹ Na kana mau keiki na Isaaka laua o Isemaela i kanu aku ia ia maloko o ke ana o Makepela, ma ka mahinaai a Eperona ke keiki a Zohara no ka Heta, ma ke alo o Mamere,
- ¹⁰ Ma ka mahinaai a Aberahama i kuai ai me na mamo a Heta: ilaila i kanuia'i o Aberahama, a me Sara o kana wahine.
- ¹¹ Mahope mai o ka make ana o Aberahama, hoopomaikai mai la ke Akua ia Isaaka; a noho iho la o Isaaka ma ka luawai o Lahairoi.
- ¹² Eia ka mooolelo no Isemaela, no ke keikikane a Aberahama, o ka mea a Hagara no Aigupita ke kauwawahine a Sara i hanau ai na Aberahama:
- ¹³ Eia hoi na inoa o na keikikane a Isemaela, ma ko lakou mau inoa, e like me ko lakou hanau ana: o Nebaiota kana hiapo; o Kedara, o Adebeela, o Mibesama,

- 14 O Misama, o Duma, o Masa.
- 15 Hadara, o Tema, o Ietura, o Napisa, a o Kedema.
- 16 Oia na keikikane a Isemaela, oia hoi ko lakou mau inoa; ma ko lakou mau kauhale, a ma ko lakou mau kulalahale; he umiku-mamalua mau alii e like me ko lakou mau lahuikanaka.
- 17 Eia na makahiki o ke ola ana o Isemaela, hookahi haneri na makahiki me kanakolukumamahiku: ua kailiia'ku kona ea, a make iho la ia; a ua huiia aku ia me kona poe kanaka.
- 18 Noho iho la lakou mai Havila a hiki i Sura, ma ke alo o Aigupita, i kou hele ana i Asuria; pela oia I noho ai ma ke alo o kona poe hoahanau a pau.
- 19 Eia ka mooolelo no Isaaka no ke keiki a Aberahama: Na Aberahama o Isaaka:
- 20 He kanaha na makahiki o Isaaka i kona wa i lawe ai ia Rebeka ke kaikamahine a Betuela no Suria, a ke kaiku wahine o Labana no Suria, i wahine nana.
- 21 Nonoi aku la o Isaaka ia Iehova no kana wahine, no ka mea, ua pa oia: a hoolohe mai la ke Akua ia ia, a hapai ae la kana wahine o Rebeka.
- 22 Oni pu ae la na keiki iloko ona; i iho la ia, A i pela ia, i aha keia mea a'u? A hele aku la ia e ninau ia Iehova.
- 23 I mai la o Iehova ia ia, Elua no lahuikanaka iloko o kou opu, elua hoi poe kanaka e puka mai ana noloko mai o kou opu, a e oi aku ka ikaika o kekahi poe i ko kekahi poe; a

e hookauwa aku ka hanau mua i ka hanau
hope.

- 24 A hiki mai kona manawa e hanau ai, aia hoi, he
mau mahoe iloko o kona opu.
- 25 A puka mai la ka mua, ua huluhulu, a ulaula,
e like me ka aahu huluhulu, a kapa iho la
lakou i kona inoa, o Esau.
- 26 Mahope iho, puka mai la kona kaikaina, a paa
aku la kona lima i ke kuekue wawae o Esau;
a kapaia kona inoa, o Iakoba. He kanaono
na makahiki o Isaaka i ko Rebeka manawa
i hanau ai laua.
- 27 Nui ae la ua mau keiki la: he kanaka akamai
o Esau i ka hahai holoholona hihiu, he
kanaka no ka nahelehele: aka, he kanaka
noho malie o Iakoba, e noho ana ma na
halelewa.
- 28 Aloha aku la o Isaaka ia Esau, no ka mea, ai iho
la ia i ka io o ua mea hihiu: a o Rebeka ka i
aloha ia Iakoba.
- 29 Hoolapalapa iho la o Iakoba i ka mea ai: a hoi
mai la o Esau mai ka nahelehele mai, a ua
nawaliwali ia.
- 30 I mai la o Esau ia Iakoba, Ke noi aku nei au ia
oe, e ho mai na'u e ai ia mea ulaula; no ka
mea, ua nawaliwali au: nolaila ua kapaia
kona inoa o Edoma.
- 31 I aku la o Iakoba, E kuai kaua i keia la, i lilo mai
ia'u kau pono o ka hanau mua.
- 32 I iho la o Esau, Eia wau ua kokoke e make, a
heaha auanei ko'u pomaikai i keia pono o
ka hanau mua?

³³ I aku la o Iakoba E hoohiki oe na'u i keia la; a hoohiki aku la ia nana: a kuai lilo mai la ia i kana pono o ka hanau mua, na Iakoba.

³⁴ Alaila, haawi aku la o Iakoba na Esau i ka berena a me na papapa i hoolapalapaia; ai iho la ia a inu hoi, ku ae la ia a hele aku la i kona wahi i hele ai: pela o Esau i hoowahawaha'i i kana pono o ka hanau mua.

26

¹ HE wi no ma ia aina, he okoa ka wi mua i hiki mai ai i ka wa ia Aberahama. A hele aku la o Isaaka io Abimeleka la, i ke alii o ko Pilisetia ma Gerara.

² Ikea aku la o Iehova e ia, i mai La, Mai hele oe ilalo i Aigupita, E noho iho ma ka aina a'u e hai aku ai ia oe:

³ E noho oe ma keia aina, a me oe pu no wau, a e hoopomaikai aku no wau ia oe: no ka mea, e haawi aku auanei au nou, a no kau poe mamo i keia mau aina a pau; a e hooko auanei au i ka hoohiki ana a'u i hoohiki ai i kou makuakane ia Aberahama.

⁴ A e hoonui aku au i kau poe mamo e like me na hoku o ka lani, a e haawi aku. no wau i keia mau aina a pau no kau poe mamo; a i kau mamo e hoopomaikaiia'i na lahuikanaka a pau o ka honua:

⁵ No ka mea, i hoolohe mai no o Aberahama i ko'u leo, a i malama hoi i ka'u mau kauoha, i ka'u mau olelo, a me ko'u mau kanawai.

⁶ A noho iho la o Isaaka ma Gerara.

- ⁷ Ninau mai la na kanaka o ia wahi ia ia no kana wahine; i aku la ia, O ko'u kaikuwahine no ia: no ka mea, makau iho la ia i ka i aku, Oia ka'u wahine; o pepehi mai na kanaka o ia wahi ia'u no Rebeka; no ka mea, he maikai ia ke nanaia'ku.
- ⁸ Ia ia i noho ai ma ia wahi a liuliu, nana mai la o Abimeleka o ke alii o ko Pilisetia, ma ka puka makani, ike mai la ia, aia hoi, o Isaaka e lealea ana me kana wahine, me Rebeka.
- ⁹ Hea mai la o Abimeleka ia Isaaka, i mai la, Aia hoi, he oiaio no, o kau wahine no ia; a pehea hoi oe i olelo mai ai, O ko'u kaikuwahine ia? I aku la o Isaaka ia ia, No ka mea, i iho la au, E make paha uanei au nona.
- ¹⁰ I mai la o Abimeleka, Heaha keia au i hana mai ai ia makou? Ina i moe wale paha kekahī o na kanaka me kau wahine, ina ua hooili mai oe i ka hala maluna o makou.
- ¹¹ Kauoha aku o Abimeleka i na kanaka a pau, i ka i ana, O ka mea hoopāaku i keia kanaka, a i kana wahine paha, he oiaio e make ia.
- ¹² Lulu hua iho la o Isaaka ma ia aina, a loaa pahaneri mai la ia ia makahiki: a hoopōmaikai mai la o Iehova ia ia.
- ¹³ Lilo ae la ua kanaka la i mea nui, mahuahua ae la ia, ulu ae la, a lilo i kanaka nui loa:
- ¹⁴ No ka mea, nana na hipā, a me na bipi, a me na kanaka he nui loa: a huahuwa mai la ko Pilisetia ia ia.
- ¹⁵ A o na punawai a pau i eliia e na kauwa a kona makuakane, i ka wa ia Aberahama, huna ae la ko Pilisetia ia mau mea i ka hoopiha i ka lepo.

- 16 Olelo mai la o Abimeleka ia Isaaka, E hele aku oe mai o makou aku, no ka mea, ua nui loa aku kau, i ka makou.
- 17 Hele aku la o Isaaka, a kukulu iho la i kona halelewa ma ke awawa o Gerara, a noho iho la ilaila.
- 18 Eli hou iho la o Isaaka i na luawai a lakou i eli iho ai i ka wa ia Aberahama o kona makuakane; no ka mea, ua huna iho ko Pilisetia ia mau mea mahope o ka make ana o Aberahama: a kapa iho la ia i ko lakou mau inoa, ma na inoa a kona makuakane i kapa iho ai.
- 19 Eli iho la na kanwa a Isaaka ma ke awawa, a loaa iho la ka punawai ilaila, he wai mau.
- 20 Hakaka mai la na kahu bipi no Gerara me na kahu bipi o Isaaka, i ka i ana mai, No makou ia wai: a kapa iho la ia i ka inoa o ua luawai la, o Eseka, no ko lakou hakaka ana mai me ia.
- 21 Eli iho la hoi lakou i ka luawai hou, a hakaka mai no hoi lakou no ia mea: a kapa iho la oia i kona inoa, o Sitenā.
- 22 Neenee aku la ia mai ia wahi aku, a eli iho la i ka luawai hou; aole no lakou i hakaka mai no ia mea: a kapa iho la oia i kona inoa, o i Rehobota: i iho la ia, ano hoi, ua haawi mai o Iehova i kahi akea no kakou; a e hoohua auanei kakou ma ka aina.
- 23 A mahope aku, pii aku la ia malaila aku a Beereseba.

- 24 Ikea ae la o Iehova e ia ia po iho, i mai la,
 Owau no ke Akua o Aberahama o kou
 makuakane: mai makau oe, owau no me
 oe, a e hoopomaikai no au ia oe a e hoonui
 hoi i kau poe mamo no ka'u kauwa, no
 Aberahama.
- 25 Hana iho la ia i kuahu malaila, a kahea aku la
 ia i ka inoa o Iehova, a kukulu iho la i kona
 halelewa ilaila: ilaila hoi na kauwa a Isaaka
 i eli iho ai i ka luawai.
- 26 Alaila, hele mai la io na la o Abimeleka mai Ger-
 ara mai, oia me Ahuzata kekahi hoalauna
 ona, a me Pikola ka luna koa o kona poe
 kaua.
- 27 I aku la o Isaaka ia lakou, Heaha ka oukou i hele
 mai ai io'u nei, no ka mea, ke inaina mai nei
 oukou ia'u, a ua hookuke mai nei oukou ia'u
 mai o oukou aku.
- 28 Olelo mai la lakou, Ua ike io makou, aia no o
 Iehova me oe: olelo ae la makou, I hoohiki
 ana mawaena o kakou, o makou nei, a on la,
 a e hoopaa makou i berita me oe;
- 29 I hana ino ole mai oe ia makou, me makou i
 hoopaa ole aku ai ia oe, o ka maikai wale no
 ka makou i hana aku ai ia oe, a ua hoihoi
 aku ia oe me ka maluhia: o oe io no ka mea
 i hoopomaikaiia e Iehova.
- 30 Hana iho la ia i ahaaina na lakou, ai iho la lakou
 a inu hoi.
- 31 Ala ae la lakou i kakahiaka nui, a hoohiki iho
 la laua, i kekahi i kekahi: hookuu aku la o
 Isaaka ia lakou, a hoi hou aku la lakou mai
 ona aku la me ke kuikahi.

- ³² Ia la hookahi no, hele mai la na kauwa a Isaaka, a hai mai la ia ia no ka luawai a lakou i eli iho ai, i mai la ia ia, Ua loaa ia makou ka wai.
- ³³ Kapa iho la oia ia wahi, o Seba: nolaila, o Beerezeba ka inoa o ia kulanakauhale a hiki i keia la.
- ³⁴ Hookahi kanaha na makahiki o Esau ia ia i lawe ai ia Iehudita ke kaikamahine a Beeri no ka Heta, a me Basemata ke kaikamahine a Elona no ka Heta, i mau wahine nana:
- ³⁵ He mau mea ehaeha laua no ka naau o Isaaka a me Rebeka.

27

- ¹ I KO Isaaka manawa i elemakule ai, a powehi-wehi ai kona mau maka, a hiki ole ia ia ke ike aku; hea aku la oia ia Esau i kana keiki mua, iaku la ia ia, E kuu keiki: i mai la kela, Eia wau.
- ² I aku la oia, Eia hoi, ua elemakule au, aole hoi au i ike i kuu la e make ai:
- ³ Ano hoi, e lawe oe i kau mau mea pana, i kau aapua a me kau kakaka, e hele aku oe i ka naheliheliheliheli e imi i kahi io na'u;
- ⁴ A e hana oe i mea ono na'u i ka mea hoi a'u i ono ai, a e lawe mai oe i o'u nei, i paina au, a i hoomaikai aku kuu uhane ia oe mamua o kuu make ana.
- ⁵ Lohe ae la o Rebeka i ka wa a Isaaka i olelo aku ai ia Esau i kana keiki A hele aku o Esau i ka naheliheliheliheli e imi aku a e lawe mai i ka io o ka holoholona hihiu.

- ⁶ Olelo aku la o Rebeka ia Iakoba i kana keiki, i
aku la, Aia hoi, ua lohe iho nei au i kou
makuakane e olelo ana i kou kaikuaana ia
Esau, i ka i ana ae,
- ⁷ E lawe mai oe io'u nei i io holoholona hihiu,
a e hana i ka mea ono na'u, i paina au,
a i hoomaikai hoi au ia oe imua o Iehova
mamua o kuu make ana.
- ⁸ Ano hoi, e kuu keiki, e hoolohe mai oe i ko'u leo,
ma ka mea a'u e kauoha aku nei ia oe.
- ⁹ E hele koke aku oe i ka poe holoholona, a e lawe
mai i na keiki kao maikai i elua; a na'u no
e hana i ka mea ono na kou makuakane, i
kana mea i ono ai:
- ¹⁰ A e halihali aku oe ia mea i kou makuakane, i ai
oho ia, a i hoomaikai mai oia ia oe mamua o
kona make ana.
- ¹¹ Olelo mai la o Iakoba ia Rebeka i kona
makuwahine, Aia hoi, he kanaka huluhulu
o Esau kuu kai kuaana, a he kanaka pahee
no wau:
- ¹² A e hana mai paha kuu makuakane ia'u, a e
ikea auanei au e ia he mea hoopunipuni; a
e hooili mai au i ka hoinoia maluna iho o'u,
aoles ka hoomaikaiia,
- ¹³ I aku la kona makuwahine ia ia, Maluna iho o'u
kou hoinoia, e kuu keiki; e hoolohe wale
mai oe i ko'u leo, e kii aku, a e lawe mai io'u
nei.
- ¹⁴ Kii aku la ia, a lawe mai la ia mau mea i kona
makuwahine: a na kona makuwahine i
hana i ka mea ono, a kona makuakane i ono
ai.
- ¹⁵ Lawe ae la o Rebeka i ka aahu maikai o kana
keiki mua o Esau, i ka mea e waiho ana iloko

o ka hale me ia, a hoaahu iho la ia Iakoba i kana keiki muli iho ia mea.

¹⁶ A hoopili aku la o Rebeka i na ili o na keiki kao maluna o kona mau lima, a me ka pahee o kona a-i.

¹⁷ Haawi aku la ia i ka mea ono, a me ka berena ana i hoomakaukau ai, iloko o ka lima o Iakoba o kana keiki.

¹⁸ A hele aku la ia i kona makuakane, i aku la, E kuu makuakane: i mai la kela, Eia no wau; owai la oe, e kuu keiki?

¹⁹ I aku la o Iakoba i kona makuakane, Owau no o Esau, o kau makahiapo; ua hana iho nei au i kau mea i kauoha mai ai; ke noi aku nei au, e ala mai oe, e noho a e ai iho i ka'u io o ka mea hihiu, i hoomaikai mai kou uhane ia'u.

²⁰ I mai la o Isaaka i kana keiki, Pehea ka emoole o ka loaa ana o ia mea ia oe, e kuu keiki? I aku la kela, No ka mea, na Iehova na kou Akua i hoohalawai ia mea me au.

²¹ I mai la o Isaaka ia Iakoba, Ke noi aku nei au ia oe, e neenee mai a kokoke, i hana aku au ia oe, e kuu keiki, i ike au o ka'u keiki o Esau paha oe, aole paha.

²² Neenee aku la o Iakoba io Isaaka la i kona makuakane: a hana mai la oia ia ia, i mai la, O ka leo, ka leo no o Iakoba, aka, o na lima, na lima no o Esau.

²³ Aole no i ike a oia, no ka mea, ua huluhulu kona mau lima, e like me na lima o kona kaikuaana, o Esau: a hoomaikai mai oia ia ia.

²⁴ Ninau mai la oia ia ia, O oe io no anei o ka'u keiki o Esau? I aku la kela, Owau no.

- 25 I mai la oia, E lawe mai ia mea a kokoke ia'u, a e ai iho no wau i ka io mea hihiu a kuu keiki, i hoomaikai aku kuu uhane ia oe, Lawe aku la o Iakoba a kokoke, a ai iho la kela: lawe aku la hoi oia i ka waina, a inu iho la kela.
- 26 Olelo mai la kona makuakane o Isaaka ia ia, E hele mai oe a honi ia'u, e kuu keiki.
- 27 Hele aku la o Iakoba, a honi ae la ia ia: honi iho la o Isaaka i ke ala o kona aahu, hoomaikai mai la ia ia, i mai la, Aia, o ke ala o kuu keiki, ua like me ke ala o ka mahinaai a Iehova i hoomaikai ai:
- 28 E haawi mai ke Akua ia oe i ka hau no ka lani mai, me ka momona o ka honua, a me ka palaoa a me ka waina he nui:
- 29 E hookauwa mai na kanaka nau, a e moe iho na lahuikanaka imua ou, o lilo oe i haku maluna o kou poe hoahanau, a e moe iho na keiki o kou makuwahine imua ou: e hoinoia'ku na mea a pau e hoino mai ia oe, a e hoopomaikaiia'ku ka mea hoomaikai ia oe.
- 30 A oki ae la ka hoomaikai ana mai a Isaaka ia Iakoba, aneane hoi ole mai o Iakoba mai ke alo mai o Isaaka o kona makuakane, puka mai la hoi o Esau o kona kaikuaana mai kona imi mea hihiu ana.
- 31 Hana no hoi oia i ka mea ono, a lawe mai hoi ia mea i kona makuakane, i aku la ia i kona makuakane, E ala mai oe, e kuu makuakane, a e ai iho i ka io mea hihiu a kana keiki, i hoomaikai mai kou uhane ia'u.
- 32 Ninau mai la o Isaaka o kona makuakane ia ia, Owai oe? Iaku la kela, Owau no o kau keiki, o kau makahiapo, o Esau.

- 33 Haalulu nui loa iho la o Isaaka, i mai la, Owai?
 auhea hoi ka mea i kii i ka io mea hihiu, a i lawe mai hoi io'u nei, a ua ai iho nei au a pau, mamua o kou hiki ana mai, a ua hoomaikai au ia ia? Oiaio, oia ke hoomaikaiia.
- 34 A lohe ae la o Esau i ka olelo a kona makuakane, uwe iho la ia me ka uwe nui loa, i aku la ia i kona makuakane, E hoomaikai mai ia'u, ia'u hoi, e kuu makuakane,
- 35 I mai la kela, Ua hele mai nei kou kaikaina me ka maalea, a ua lawe aku i kou hoomaikaiia,
- 36 I aku la oia, Aole anei i pono ke kapa ana ia ia o Iakoba? no ka mea, eia ka lua o kona kaili ana i ko'u pono: kaili aku la oia i ko ka hanauumua pono o'u; eia hoi, ano, ua kaili ae la oia i ko'u hoomaikaiia. I aku la hoi o Esau, Aole anei oe i malama no'u kekahi hoomaikai ana?
- 37 Olelo mai la o Isaaka ia Esau, Aia hoi, ua hoolilo aku au ia ia i haku nou, a ua haawi aku no wau i kona poe hoahanau a pau i poe kauwa nana; ua malama aku hoi au ia ia i ka palaoa a me ka waina: a heaha ka'u e hana aku ai nau, e kuu keiki?
- 38 I aku la o Esau i kona makuakane, Hookahi wale no anei au hoomaikai ana, e kuu makuakane? e hoomaikai mai oe ia'u hoi, e kuu makuakane. Hookiekie ae la o Esau i kona leo, a uwe iho la.
- 39 Olelo mai la o Isaaka, kona makuakane, i mai la ia ia, Aia hoi, ma ka aina momona kou noho ana, a ma kahi o ka hau o ka lani mai luna iho.

40 I kau pahikaua e ola auanei oe, a e hookauwa
aku oe na kou kaikaina: a i ka manawa e
loaa'i ia oe ke alii ana, alaila e haihai iho oe
i kana anamo ma kou a-i.

41 Inaina aku la o Esau ia Iakoba, no ka hoomaikai
ana a kona makuakane i hoomaikai aku ai
ia ia: i iho la o Esau iloko o kona naau,
Ua kokoke mai na la e kanikau ai i kuu
makuakane; alaila au e pepehi ai i kuu
kaikaina ia Iakoba.

42 Ua haiia'ku keia olelo ana a Esau ia Rebeka:
hoouna aku la ia e hea ia Iakoba i kana
keiki muli iho, i aku la ia ia, Aia hoi, o kou
kaikuaana o Esau, e hooluolu ana oia ia ia
ihou nou, e pepehi iho ia oe.

43 Ano hoi, e kuu keiki, e hoolohe mai oe i kuu lee;
e ku ae oe, e holo aku io Labana la, i kuu
kaikunane ma Harana:

44 E noho me ia i kekahi mau la, a huli ae ka inaina
o kou kaikuaana mai ou aku la;

45 A huli ae ka inaina o kou kaikuaana mai ou aku
la, a poina ia ia kau mea i hana aku ai ia ia:
alaila e hoouna aku no wau e hoihoi mai ia
oe: no ke aha la e hooneleia mai au ia olua
a elua i ka la hookahi?

46 Olelo aku la o Rebeka ia Isaaka, Ua pauaho
no wau i kuu ola ana, no na kaikamahine
a ka Heta: ina e lawe o Iakoba i kekahi
kaikamahine a ka Heta i wahine nana, e like
me na kaikamahine o ka aina, pehea la wau
e pono ai i kuu ola aua?

28

- ¹ HEA aku la o Isaaka ia Iakoba, hoomaikai aku la ia ia, kauoha aku la ia ia, i aku la, Mai lawe oe i wahine nau no na kaikamahine a ko Kanaana,
- ² E ku ae, e hele aku oe i Padanarama, i ka hale o Betuela o ka makuakane o kou makuwahine; a e lawe oe i wahine nau nolaila, no na kaikamahine a Labana a ke kaikunane o kou makuwahine.
- ³ E hoomaikai mai ke Akua mana ia oe, e hoohua mai kela ia oe, e hoomahuahua hoi ia oe, i lilo oe i poe kanaka he nui:
- ⁴ E haawi mai hoi oia nou i ka pomaikai o Aberahama, nou, a no kau poe mamo me oe; i hooiliia nou ka aina au e noho malihini nei, ka mea a ke Akua i haawi mai ai no Aberahama.
- ⁵ Hoouna aku la o Isaaka ia Iakoba: a hele aku la ia i Padauarama io Labana la, i ke keiki a Betuela no Suria, i ke kaikunane o Rebeka, o ka makuwahine o Iakoba laua o Esau.
- ⁶ A ike iho o Esau, ua hoomaikai mai o Isaaka ia Iakoba, a ua hoouna aku ia ia e hele i Padanarama, e lawe i wahine nana mai ia wahi mai; a i kana hoomaikai ana ia ia, kauoha aku la ia, i ka i ana, Mai lawe oe i wahine nau no na kaikamahine a ko Kanaana;
- ⁷ A ua hoolohe mai o Iakoba i kona makuakane, a me kona makuwahine, a ua hala aku la i Padanarama;
- ⁸ A ike iho la o Esau, aole i oluolu o Isaaka o kona makuakane i na kaikamahine a ko Kanaana;

- ⁹ Alaila, hele aku la o Esau io Isemaela la, a hui mai la me kana mau wahine, ia Mahalata i ke kaikamahine a Isemaela a ke keiki a Aberahama, oia ke kaiku wahine o Nebaiota, i wahine nana.
- ¹⁰ Hele aku la o Iakoba mai Beereseba aku, i kona hele ana i Harana.
- ¹¹ A hiki aku la ia i kau wahi, a noho iho la ilaila i ka po; no ka mea, ua napoo ka la: lawe ae la ia i kekahi o na pohaku o ia wahi i uluna nona, a moe iho la ilaila.
- ¹² Moe iho la ia i ka uhane; aia hoi, ku mai la kekahī ala haka maluna o ka honua, a hiki aku la kona welau i ka lani: aia hoi, ua ikeā na anela o ke Akua i ka pii ana ae, a i ka iho ana mai maluna o ka haka.
- ¹³ Aia hoi, ku mai la o Iehova maluna ae o ka haka, i mai la, Owau no Iehova ke Akua o Aberahama o kou kupunakane, a ke Akua o Isaaka: e haawi aku no au i ka aina au e moe iho ai nou, a no kau poe mamo;
- ¹⁴ A e like auanei ka nui o kau poe mamo me ka lepo o ka honua, a e palahalaha ana ae oe i ke komohana, i ka hikina, i ke kukulu akau, a i ke kukulu hema: ia oe no a i kau poe mamo e hoopomaikaiia'i na ohana a pau o ka honua.
- ¹⁵ Aia hoi, me oe no wau, a e malama auanei ia oe i na wahi a pau au e hele ai, a e hoihoi mai no wau ia oe i keia aina; no ka mea, aole au e haalele ia oe, a pau i ka hanaia e au ka mea a'u i olelo aku ai ia oe.

- ¹⁶ Ala ae la o Iakoba mai kona hiamoe ana, i iho la ia. He oiaio, maanei no o Iehova, aole nae au i ike.
- ¹⁷ Eehia iho la ia, i iho la, He wahi eehia keia! o ka hale wale no keia no ke Akua, o ka ipuka hoi keia o ka lani.
- ¹⁸ Ala ae la o Iakoba i kakahiaka nui, lalau aku la ia i ka pohaku ana i uluna ai, hooku ae la i eho, a ninini iho la i ka aila maluna o kona welau.
- ¹⁹ Kapa iho la ia i ka inoa o ia wahi, o i Betela: o Luza ka inoa mamua o ua kulanakauhale la.
- ²⁰ Hoohiki aku la o Iakoba i ka hoohiki ana, i aku la, Ina e noho pu ke Akua me au, a e malama mai ia'u ma keia ala a'u e hele nei, a e haawi mai i ai na'u e ai ai, a i kapa hoi e aahu ai,
- ²¹ A hoi hou mai au i ka hale o ko'u makuakane me ka maluhia; alaila o Iehova no ko'u Akua:
- ²² A o keia pohaku a'u i hooku ae nei i kukulu, a e lilo auanei ia i hale no ke Akua: a e haawi io aku no wau nou i ka hapaumi o na mea a pau au e haawi mai ai ia'u.

29

- ¹ A LAILA, hele aku la o Iakoba i. kona hele ana, a hiki aku la i ka aina o na kanaka o ka hikina.
- ² Nana aku la ia, aia hoi, he luawai ma ke kula, a me na ohana hipa ekolu e moe ana ilaila: no ka mea, ua hoohainuia na ohana holoholona i ka wai o ua luawai la: a aia maluna o ka waha o ka luawai he pohaku nui.
- ³ Ilaila i hoakoakoia'i na ohana holoholona a pau: olokaa ae la lakou i ka pohaku mai ka waha

ae o ka luawai, a hoohainu iho la i na hipa;
a kau hou iho la i ka pohaku maluna o ka
waha o ka luawai, ma kona wahi.

⁴ I aku la o Iakoba ia lakou, E kuu mau hoahanau,
noheia oukou? I mai la lakou, No Harana
makou.

⁵ I aku la ia ia lakou, Ua ike anei oukou ia Labana,
ka moopuna a Nahora? I mai la lakou, Ua
ike no makou.

⁶ I aku la ia ia lakou, E ola ana anei oia? I mai la
lakou, E ola ana no, aia hoi, ke hele mai la
o Rahela, o kana kaikamahine me ka pua
hipa.

⁷ I aku la ia, Aia hoi, he la okoa keia; aole i hiki ka
manawa e houluulu ai i na bipi: e hoohainu
oukou i na hipa, a hele e hanai.

⁸ I mai la lakou, Aole makou e hiki, a pau na ohana
hipa i ka houluuluia, a olokaa ae lakou i
ka pohaku, mai ka waha mai o ka luawai;
alaila makou e hoohainu i na hipa.

⁹ Ia ia i olelo ai me lakou, hiki mai la o Rahela
me na hipa a kona makuakane: no ka mea,
nana lakou i malama.

¹⁰ A ike aku la o Iakoba ia Rahela, ke kaikamahine
a Labana, o ke kaikunane o kona
makuwahine, a me ka poe hipa a Labana, o
ke kaikunane o kona makuwahine, neenee
aku la o Iakoba, olokaa ae la ia i ka pohaku
mai ka waha ae o ka luawai, a hoohainu iho
la i ka poe hipa a Labana, o ke kaikunane o
kona makuwahine.

¹¹ Honiaku la o Iakoba ia Rahela, hookiekie ae la
ia i kona leo, a uwe iho la.

- ¹² Hai aku la o Iakoba ia Rahela, he hoahanau ia no kona makuakane, a he keiki na Rebeka: holo aku la kela, a haiaku la i kona makuakane.
- ¹³ A lohe ae la o Labana i ka olelo no Iakoba no ke keikikane a kona kaiku wahine, holo mai la ia e halawai me ia, apo mai la ia ia, honi ae la, a kaiaku la ia ia i kona hale. Haiaku la oia ia Labana ia mau mea a pau.
- ¹⁴ Olelo mai la o Labana ia ia, He oiaio, o oe no kuu iwi, a me kuu io. A noho pu iho la oia me ia, hookahi malama.
- ¹⁵ Olelo mai la o Labana ia Iakoba, E hookauwa wale anei oe na'u, no kou pili hoahanau ana ia'u? e hai mai oe ia'u i kau uku.
- ¹⁶ Elua mau kaikamahine a Labana, o Lea ka inoa o ka mua, a o Rahela ka inoa o ka muli iho.
- ¹⁷ He makawai ko Lea; aka, ua maikai o Rahela ke nanaaku, a ua maikai kona helehelena.
- ¹⁸ Alohaaku la o Iakoba ia Rahela: iaku la ia, E hooikaikaaku no au i kau hana i na makahiki ehiku no Rahela, no kau kaikamahine muli iho.
- ¹⁹ Imai la o Labana, E aho no'u ke haawiaku ia ia nau, aole na ke kanaka e ae; enoho pu oe me au.
- ²⁰ Hooikaikaaku la o Iakoba i na makahiki ehiku no Rahela; a he mau la uuku wale no ia i kona manao, no kona aloha ia ia.
- ²¹ Iaku la o Iakoba ia Labana, E haawi mai oe i ka'u wahine, i komo ai au iloko io na la, no ka mea, ua hala ae nei ko'u mau la.

- 22 Houluulu ae la o Labana i na kanaka a pau o ia wahi, a hana iho la i ka ahaaina,
- 23 A ahiahi iho la, lalau aku la ia i kana kaikamahine ia Lea, a lawe mai la ia ia io Iakoba la, a komo aku la ia io na la.
- 24 Haawi aku la o Labana ia Zilepa i kona kaikamahine i kauwawahine na kana kaikamahine na Lea.
- 25 A ao ae la, aia hoi, o Lea ka ia: i aku la o Iakoba ia Labana, Heaha keia mea au i hana mai ai ia'u? aole anei o Rahela ka'u i hooikaika aku ai nau? No ke aha hoi oe i hoopunipuni mai ai ia'u?
- 26 I mai la o Labana, Aole pela e pono ke hana ma ko makou aina, ke haawi e aku i ka hanau hope mamua o ka hanau mua.
- 27 E hoopau oe i ko ia nei hebedoma, alaila e haawi hoi makou ia Rahela nau, no ka hooikaika ana au e hooikaika ai me au, i na makahiki hou aku i ehiku.
- 28 Pela no o Iakoba i hana aku ai, a hoopau ae la i ko ia la hebedoma: a haawi aku la hoi oia ia Rahela i kana kaikamahine i wahine nana.
- 29 Haawi mai la o Labana ia Bileha i kona kaikamahine, i kauwawahine na Rahela, na kana kaikamahine.
- 30 Komo aku la hoi oia io Rahela la, a oi aku la kona aloha ia Rahela mamua o kona aloha ia Lea; a hooikaika aku la ia me Labana i na makahiki hou aku i ehiku.
- 31 A ike iho la o Iehova, ua hoowahawahaia o Lea, hoohua iho la ia i kona opu: aka, ua pa o Rahela.
- 32 Hapai iho la o Lea, a hanau mai la he keikikane, a kapa iho la ia i kona inoa o I Reubena: no

ka mea, i mai la ia, He oiaio, ua nana mai o Iehova i kuu popilikia; ano hoi, e aloha mai auanei ka'u kane ia'u.

³³ Hapai hou iho la ia, a hanau mai la he keikikane; i mai la, No ka mea, ua lohe o Iehova i kuu hoowahawahaia, nolaila, ua haawi mai hoi oia i keia keikikane: kapa iho la ia i kona inoa, o I Simeona.

³⁴ Hapai hou iho la ia, a hanau mai la, he keikikane; i mai la, I keia manawa no, e hoopiliia mai auanei ka'u kane ia'u; no ka mea, ua hanau no wau i na keikikane ekolu nana: no ia mea i kapaia'i kona inoa, o I Levi.

³⁵ Hapai hou iho la ia, a hanau mai la he keikikane: i mai la ia, Ano no, e hoolea aku wau ia Iehova; nolaila, kapa iho la ia i kona inoa, o I Iuda; a oki iho la kona hanau ana.

30

¹ A IKE ae la o Rahela, aole ia i hanau i na keiki na Iakoba, huahuwa aku la o Rahela i kona kaikaana; i mai la ia ia Iakoba, E haawi, mai oe i keiki na'u, o make au.

² Hoaaia ka inaina o Iakoba ia Rahela; i aku la ia, Owau no anei ka panihakahaka no ke Akua, nana i aua mai ka hua o kou opu?

³ I mai la ia, Aia hoi kuu kauwawahine o Bileha, e komoaku oe io na la; a e hanau mai auanei ia maluna o kuu mau kuli, i keiki ai hoi au ma ona la.

⁴ Haawi mai la oia ia Bileha i kana kauwawahine, i wahine nana: a komoaku la o Iakoba io na la.

- ⁵ Hapai iho la o Bileha, a hanau mai la, he keikikane na Iakoba.
- ⁶ I mai la o Rahela, Ua hoapono mai ke Akua ia'u, ua hoolohe mai hoi ia i ko'u leo, a ua haawi mai ia i keiki na'u: nolaila, kapa iho la ia i kona inoa, o I Dana.
- ⁷ Hapai hou iho la o Bileha ke kauwawahine a Rahela, a hanau mai la, o ka lua ia o kana keikikane na Iakoba.
- ⁸ I mai la o Rahela, Me na hakoko nui ka'u i hakoko pu ai me kuu kaikuaana, a ua lanakila au: a kapa iho la ia i kona inoa, o I Napetali.
- ⁹ A ike iho la o Lea, ua oki kona hanau ana, lalau aku la ia ia Zilepa, i kana kauwawahine, a haawiaku la ia ia i wahine na Iakoba.
- ¹⁰ A hanau mai la o Zilepa ke kauwawahine a Lea i keikikane na Iakoba.
- ¹¹ I mai la o Lea, Pomaikai; a kapa iho la ia i kona inoa, o I Gada,
- ¹² Hanau mai la hoi o Zilepa o ke kauwawahine a Lea i ka lua o ke keikikane na Iakoba.
- ¹³ I mai la o Lea, Pomaikai no wau, no ka mea, e hoomaikai mai auanei na kaikamahine ia'u: a kapa iho la i kona inoa o I Asera.
- ¹⁴ Hele aku la o Reubena i na la o ka ohi palaoa ana, a loaa ia ia ma ke kula na hua dudaima, a lawe mai la ia mau mea i kona makuwahine ia Lea. Alaila, i mai la o Rahela ia Lea, Ke noi aku nei au ia oe, o haawi mai na'u i kekahiau dudaima a kau keikikane.
- ¹⁵ I aku la kela ia ia, He mea uuku anei kou lawe anaaku i ka'u kane? a manao anei hoi oe o laweaku i na dudaima a kuu keiki? I mai la

o Rahela, Nolaila, e moe pu ia me oe i neia
po no na dudaima a kau keiki.

¹⁶ I ke ahiahi, hoi mai la o Iakoba mai ke kula mai,
a hele aku la o Lea e halawai me ia, iaku la,
E komo mai oe io'u nei; no ka mea, he oiao
no, ua hoolimalima au ia oe me na dudaima
a ka'u keiki. A moe pu iho la oia me ia ia po.

¹⁷ Hoolohe mai la ke Akua ia Lea a hapai iho la o
Lea, a hanau mai la na Iakoba i ka lima o
kana keikikane.

¹⁸ I mai la o Lea, Ua haawi mai la ke Akua i
ka'u uku, no kuu haawi ana aku i ka'u
kauwawahine na kuu kane: a kapa iho la ia
i kona inoa o I Isakara.

¹⁹ Hapai hoa iho la o Lea, a hanau mai na Iakoba i
ke ono o kana keikikane.

²⁰ I mai la o Lea, Ua haawi mai ke Akua ia'u i ka
haawina maikai; ano la, e noho pu auanei
ka'u kane me a'u, no ka mea, ua hanau no
au i na keikikane eono nana: a kapa iho la
ia i kona inoa o I Zebuluna.

²¹ A mahope iho, hanau mai la ia i kaikamahine, a
kapa iho la i kona inoa o I Dina.

²² Hoomanao mai la ke Akua ia Rahela, a hoolohe
mai la ke Akua ia ia, a hoohua mai la i kona
opu.

²³ Hapai iho la oia, a hanau mai la he keikikane:
i mai la ia, Ua lawe aku no ke Akua i kuu
hoinoia.

²⁴ Kapa iho la ia i kona inoa o I Iosepa; i iho la, E
haawi mai ke Akua i keikikane hou na'u.

- ²⁵ I ka manawa a Rahela i hanau ai ia Iosepa, i aku la o Iakoba ia Labana, E hoihoiaku oe ia'u, i heleaku ai au i ko'u wahi, a i ko'u aina.
- ²⁶ E haawi mai oe i ka'u mau wahine, a me ka'u mau kamalii, i na mea a'u i hooikaikaaku ai nau, a e kuu ae oe ia'u e hele: no ka mea, ua ike oe i ka hana au i hanaaku ai nau.
- ²⁷ I mai la o Labana ia ia, Ke noiaku nei au ia oe, ina i loaa ia'u ke aloha imua ou, e noho; ua ike no wau ma ka hoao ana, nou no ka Iehova i hoopomaikai mai ai ia'u.
- ²⁸ I mai la hoi oia, E hai mai oe i kau uku, a e haawiaku no wau.
- ²⁹ I aku la kela ia Labana, Ua ike no oe i ko'u hooikaika anaaku nau, a me ka pono o kau poe holoholona.
- ³⁰ No ka mea, he mea uuku kau mamua o ko'u hiki ana mai, a hoomahuahuaia'e ia he lehulehu loa: a ua hoopomaikai mai o Iehova ia oe, mahope mai o kuu hele ana mai: ano hoi, ahea la au e hoolako ai i ko ka hale o'u kekah?
- ³¹ I mai la oia, Heaha ka'u e ukuaku ai ia oe? Iaku la o Iakoba, Aole oe e uku mai ia'u i kekahimea: ina paha penei oe e hana mai ai ia'u, alailau e hana hou, a e malama hoi i kau poe holoholona:
- ³² E hele ae au iwaena o kau poe holoholona a pau i neila, a e hookaawaleaku i na holoholona kikokiko a onionio, a me na mea eleele a pau o ka poe hip, a me na mea onionio a kikokiko o ka poe kao: a oia ka'u uku.
- ³³ Pela e hoaponoaku ai ho'u pono ia'u i ka wa mahope, i ka wa e lilo mai ai ia i uku na'u imua o kou mau maka: o na mea a pau o

ka poe kao me au, aole i kikokiko, aole noi i eleele no ka poe hipa, oia ke oleloia he mea i aihueia.

³⁴ I mai la o Labana, Aia hoi, o ko'u makemake no ia, me kau i olelo mai ai.

³⁵ Ia la no, hookaaawale ae la oia i na kao kane a pau i onionio a i kikokiko, a me na kao wahine a pau i onionio a kikokiko, me na mea kiko keokeo a pau; a me na mea eleele o na mea keikihipa, a haawi aku la iloko o ka lima o kana mau keikikane.

³⁶ A hookaaawale ae la o Labana i na la hele i ekolu mawaena ona a o Iakoba: a hanai aku la o Iakoba i na poe holoholona a Labana i koe.

³⁷ Lawe ae la o Iakoba i na laau popela maka, me na laau alemone, a me na laau pelane, a ihi iho la i na kaha onionio keokeo ma ua mau laau la, i moakaka na wahi keokeo o na mau laau la.

³⁸ Kukulu iho la ia i na laau ana i ihi ai, imua o na holoholona, ma na pawai hooinu, i ka wa i hele ai lakou e inu, i hapai ai lakou i ka wa i hele ai lakou e inu.

³⁹ Hapai iho la na holoholona imua o na mau laau la, a hanau mai la i na keiki onionio, kikokiko, a me ke kikohukohu.

⁴⁰ Hookaaawale ae la o Iakoba i na keikihipa, a haliu ae la i na maka o ka poe holoholona ma na mea onionio, a me na mea eleele o ko Labana poe holoholona; hookaaawale ae la ia i kona mau poe holoholona, aole i hookokoke aku ia lakou me na holoholona a Labana.

- ⁴¹ I ka wa i ai ai na holoholona ikaika, alaila, waiho iho la o Iakoba i na laau imua o na makanā o na holoholona maloko o na pawaiinu, i hapai ai lakou imua o na laau.
- ⁴² Aka, ina he mau holoholona nawaliwali lakou, aole ia i waiho i na laau iloko; pela no, na Labana ka poe nawaliwali, a na Iakoba ka poe ikaika.
- ⁴³ A he nui loa ka waiwai o ua kanaka nei: ia ia na holoholona he nui wale, me na kauwawahine, a me na kauwakane, na kamelo, a me na hoki.

31

- ¹ LOHE aku la o Iakoba i na olelo a na keikikane a Labana, i ka i ana ae, Ua lawe aku la o Iakoba i na mea a pau a ko kakou makuakane, a ua loaa ia ia keia waiwai a pau no na mea a ko kakou makuakane.
- ² Nana aku la o Iakoba i ka maka o Labana, aole ia i maliu mai ia ia e like mamua.
- ³ Olelo mai la hoi o Iehova ia Iakoba, E hoi hou aku oe i ka aina o kou poe makua, a i na hoahanaou ou; a owau kekahipu me oe.
- ⁴ Hoouna aku la o Iakoba e kahea ia Rahela laua o Lea e hele mai ma ke kula i kona poe holoholona.
- ⁵ I aku la oia ia laua, Ua ike no wau i ka maka o ko olua makuakane, aole ia i maliu mai ia'u e like mamua: aka, me au no ke Akua o ko'u makuakane.
- ⁶ Ua ike hoi olua i ko'u malama i ana i ko olua makuakane me ko'u ikaika a pau.

- ⁷ A ua hoopunipuni mai ko olua makuakane ia'u, a he umi kana hoololi ana i ka'u uku: aka, aole ke Akua i ae mai e hoopoino mai ia ia'u.
- ⁸ Ina i olelo mai kela penei, O na mea kikokiko kau uku, alaila hanau mai la na holoholona i na mea kikokiko: a i olelo mai ia penei, O na mea onionio kau uku, alaila hanau mai la na holoholona a pau i na mea onionio.
- ⁹ Pela ke Akua i lawe ai i na holoholona a ko olua makuakane, a ua haawi mai ia'u.
- ¹⁰ A i ka manawa a ka poe holoholona i ko ai, nana aku la ko'u mau maka ma ka moeuhane, ike aku la, aia hoi, o na kao kane i lele aku maluna o na kao wahine ua onionio, a ua kikokiko, a me ke kikohukohu.
- ¹¹ Olelo mai la ka anela o ke Akua ia'u ma ka moeuhane, E Iakoba: i aku la au, Eia wau.
- ¹² I mai la kela, E nana aku oe e ike, o na kao kane e lele ana maluna o na kao wahine, ua onionio, ua kikokiko, a me ke kikohukohu: no ka mea, ua ike no wau i ka mea a pau a Labana i hana mai ai ia oe.
- ¹³ Owau no ke Akua no Betela, kahi au i poni ai i ka pohaku kukulu, kahi hoi au i hoohiki ai i ka hoohiki ia'u: ano hoi, e ku ae oe, e haalele aku i keia aina, a e hoi hou aku i ka aina o kou poe hoahanau.
- ¹⁴ Olelo mai la o Rahela laua o Lea, i mai la ia ia, Auhea kekahī kuleana, a o kekahī wai-wai hooili no maua ma ka hale o ko maua makuakane?
- ¹⁵ Aole anei i manaoia maua e ia, he mau mea e? no ka mea, ua lilo maua i ke kuaiia e ia, a ua pau loa hoi ko maua kala ia ia.

- ¹⁶ Nolaila, o ka waiwai a pau a ke Akua i lawe ae mai ko maua makuakane mai, no kakou ia a no na keiki a kakou: ano hoi, e hana aku oe i ka mea a ke Akua i olelo mai ai ia oe.
- ¹⁷ Alaila, ku ae la o Iakoba, hoee aku la i kana mau keiki a me kana mau wahine maluna o na kamelo;
- ¹⁸ A lawe aku la ia i kana poe holoholona a pau, a me kona waiwai a pau i loaa ia ia, o na holoholona ana, i loaa ia ia ma Padanarama, e hele aku ai io Isaaka la i kona makuakane, ma ka aina o Kanaana.
- ¹⁹ Ua hala aku la o Labana e ako i kana poe hipa: a aihue iho la o Rahela i na kii o kona makuakane.
- ²⁰ Puni aku la ka naau o Labana ka Suria, ia Iakoba, i ka hai ole aku ia ia i kona mahuka ana.
- ²¹ Pela oia i mahuka ai me kana mau mea a pau: ku ae la ia, hele mai la ma keia aoao o ka muliwai, a hele pololei mai la i ka mauna o Gileada.
- ²² I ke kolu o ka la, olelo aku la kekahi ia Labana, Ua mahuka aku o Iakoba.
- ²³ Kono aku la ia i kona poe hoahanau e hele pa me ia, alualu mai mahope ona i na la hele ehiku, a hiki mai la io Iakoba la ma ka mauna o Gileada.
- ²⁴ Hele mai la ke Akua io Labana la ka Suria ma ka moeuhane i ka po, i mai la ia ia, E ao ia oe iho, mai olelo aku oe ia Iakoba i ka mea aloha, aole hoi ka mea hoino.

- 25 Alaila loaa mai la o Iakoba ia Labana. Ua kukulu o Iakoba i kona halelewa ma ua mauna la: kukulu hoi o Labana me kona poe hoahanau ma ka mauna o Gileada.
- 26 Olelo mai la o Labana ia Iakoba, Heaha kau i hana'i i hoopunipuni mai ai oe ia'u, a i lawe aku ai hoi i ka'u mau kaikamahine, e like me na pio e ke kana?
- 27 No ke aha la oe i holo malu mai ai, me ka puni mai ia'u, aole hoi i hai mai ia'u, i hoihoi aku ai au ia oe me ka olioli a me na mele, me na pahukani a me na lira!
- 28 Aole hoi i ae mai oe ia'u e honi i ka'u mau moopuna a me na kaikamahine a'u? He lapuwale ka hana ana au i hana'i.
- 29 E hiki no i kuu lima ke hana aku ia oe i ke ino: aka, o ke Akua o kou makuakane i olelo mai ia'u, i ka po nei, i ka i ana, E ao oe, mai olelo aku oe ia Iakoba i ka mea aloha, aole hoi ka mea hoino.
- 30 Ano hoi, i ka hele ana ua hala aku la oe, no kou iini nui ana i ka hale o kou makuakane; no ke aha hoi oe i aihue ai i ko'u mau akua?
- 31 Olelo aku la o Iakoba ia Labana, i aku la, No ka mea, ua makau wau: i iho la au, E kaili aku paha oe i kau mau kaikamahine mai o'u aku nei.
- 32 A o ka mea e loaa ia oe, ia ia kou mau akua, aole ia e ola; imua o ko kana mau hoahanau e nana oe i kau maanei me au, a e lawe aku oe i ou la. No ka mea, aole i ike o Iakoba, na Rahela i aihue ia mau mea.
- 33 Komo aku la o Labana iloko o ka halelewa o Iakoba, a iloko o ka halelewa o Lea, iloko hoi o na halelewa o na kauwawahine elua,

aole i loaa. Alaila, hele aku la ia iwaho o ka halelewa o Lea, a komo aku la iloko o ka halelewa o Rahela.

- ³⁴ Ua lawe aku no o Rahela i ua mau kii la, a waiho pu iho la me na noho kamelo, a noho iho la maluna. Huli iho la o Labana i ka halelewa a pau, aole nae i loaa.
- ³⁵ I aku la o Rahela i kona makuakane, mai huhu mai ko'u haku i kuu hiki ole ke ku ae iluna; no ka mea, he mai wahine ko'u. Imi iho la oia, aole nae i loaa ia ia na kii.

- ³⁶ Ukiuki iho la o Iakoba, a ao aku la ia Labana: olelo aku la o Iakoba, i aku la ia Labana, Heaha ko'u hala? heaha hoi ko'u hewa, i alualu wela mai ai oe ia'o?

- ³⁷ A ua huli iho oe i ka'u ukana a pau, a heaha kau i loaa ai o na mea a pau o kou hale? e kau mai ianei imua o ko'u mau hoahanau a me kou mau hoahanau, i hooponopono mai ai lakou iwaena o kaua.

- ³⁸ He iwakalua na makahiki a'u i noho ai me oe; o kau poe hipa wahine a me kau poe kao wahine, aole lakou i hanau i ka wa, aole hoi au i ai i na hipa kane o kou poe holoholona.

- ³⁹ O na mea i haehaeia, aole au i lawe aku ion la; na'u no i uku aku: nau i lawe aku ia mea mai kuu lima aku, no ka mea i aihueia i ke ao, a i aihueia i ka po.

- ⁴⁰ Pela wau; i ke ao, ua wela au i ka la, a i ka po, ua make i ke anu: a holo aku la ka hiamoe mai o'u mau maka aku.

- ⁴¹ Pela wau i na makahiki he iwakalua maloko o kou hale; hooikaika au nau i na makahiki he umikumamaha no kau mau kaikamahine, a me na makahiki eono no

kou poe holoholona: a he umi kau hoololi
ana i ka'u uku.

42 Ina aole me au ke Akua o ko'u knpunakane, ke Akua o Aberahama, a o ka makau o Isaaka, he oiaio, ina ua hoihoi nele mai oe ia'u i neia manawa. Ua ike mai no ke Akua i ko'u popilikia, a me ka hana ana a ko u mau lima, a ua papa mai ia oe i ka po nei.

43 Olelo mai la o Labana ia Iakoba, i mai la, Na'u no keia mau kaikamahine, a na'u no keia mau kamalii, a na'u no hoi keia poe holoholona, a na'u no na mea a pau au e ike nei; a heaha ka'u mea e hiki ai i keia la ke hana aku i keia mau kaikamahine a'u, a me keia mau kamalii a lakou i hanau ai?

44 Nolaila ea, e hoopaa kaua i berita, owau a o oe, i mea hoikeike mawaena o kaua.

45 Lalau aku la o Iakoba i ka pohaku, a hooku ae la ia mea i kukulu.

46 I aku la hoi o Iakoba i kona poe hoahanau, E houluulu mai oukou i na pohaku; lawe mai la lakou i na pohaku, a hana iho la i ahu; a ai iho la lakou maluna o ua ahu la.

47 Kapa iho la o Labana ia ahu, o I Iegasaduha: kapa iho ia o Iakoba ia mea, o I Galeeda.

48 Olelo mai la o Labana, He mea hoikeike keia ahu pohaku mawaena o kaua i keia la. Nolaila i kapaia'i kona inoa o Galeeda.

49 A o I Mizepa hoi; no ka mea, i mai la ia, O Iehova ke kiai mai mawaena o kaua, i ko kaua manawa e noho kaawale ana.

50 Ina oe e hoopilikia i ka'u mau kaikamahine ina hoi oe e lawe i na wahine hou, he okoa keia mau kaikamahine a'u, aohe kanaka

me kaua; e ao oe, o ke Akua no ke ike maka mai mawaena o kaua.

⁵¹ I mai la o Labana ia Iakoba, E nana i keia ahu, e nana hoi i keia pohaku kukulu a'u i hoolei aku ai mawaena o kaua;

⁵² He mea hoikeike keia ahu, he mea hoikeike hoi keia pohaku kukulu, i hele ole aku ai au ma keia aoao o keia ahu i ou la, aole hoi oe e hele mai ma keia aoao o ua ahu nei a me keia pohaku kukulu i o'u nei, e hana ino.

⁵³ O ke Akua o Aberahama, a o ke Akua o Nahora, ke Akua o ko laua makuakane, e hooponopono mawaena o kaua. A hoohiki aku la o Iakoba ma ka Makau o kona makuakane o Isaaka.

⁵⁴ Alaila, kaumaha aku la o Iakoba i ka mohai maluna o ia mauna, a kahea aku la i kona poe hoahanau e ai i ka berena: ai iho la lakou i ka berena, a moe iho la ia po ma ka mauna.

⁵⁵ I kakahiaka nui, aia ae ia o Labana, honi ae la i kana mau moopuna a me kana mau kaikamahine, a hoomaikai iho la ia lakou; hele aku la o Labana, a hoi aku la i kona wahi.

32

¹ HELE aku la o Iakoba i kona hele ana, a halawai mai la na anela o ke Akua me ia.

² A ike aku la o Iakoba ia lakou, i aku la ia, O ka pualii kaua keia o ke Akua: a kapa iho la ia i ka inoa o ia wahi, o I Mahanaima.

- ³ Hoouna aku la o Iakoba i na elele imua ona io Esau la i kona kaikuaana, ma ka aina o Seira, oia ka aina o Edoma.
- ⁴ Kauoha aku la ia ia lakou, i aku la, Penei ka oukou e olelo aku ai i kuu haku, ia Esau; Ke i mai nei o kau kauwa o Iakoba penei, Ua noho pu au me Labana, ua kali aku no wau ilaila a hiki i neia manawa.
- ⁵ Ia'u no na bipi, na hoki, na holoholona, me na kauwakane a me na kauwawahine; a ua hoouna aku no wau e hai aku i kuu haku, i loaa ia'u ke alohaia imua o kou maka.
- ⁶ Hoi hou mai la na elele io Iakoba la, i mai la, Hele aku la makou i kou kaikuaana io Esau la; a ke hele mai nei hoi oia e halawai me oe, a me ia na haneri kanaka eha.
- ⁷ Alaila, makau nui iho la o Iakoba, a ua pilikia loa: mahele ae la oia i na kanaka me ia, i na holoholona, i na bipi a me na kamelo, elua poe;
- ⁸ I aku la, Ina e hele mai o Esau, a pepehi mai i kekahi poe, alaila e pakete ka poe i koe.
- ⁹ I aku la o Iakoba, E ke Akua o kun kupunakane o Aberahama, ke Akua o kuu makuakane o Isaaka, e Iehova, ka mea nana i olelo mai ia'u, E hoi hou aku oe i kou aina, a i kou poe hoahanau, a e lokomaikai aku no au ia oe:
- ¹⁰ Aole au e pono no na lokomaikai a pau a me ka oiaio a pau au i hoike mai ai, i kau kauwa nei; no ka mea, me kuu kookoo iho i hele mai ai au ma keia kapa o loredane; a ua lilo no wau ano i elua poe.

- 11 Ke pule aku nei au ia oe, e hoopakele ae ae ia'u mai ka lima aku o kuu kaikuaana, mai ka lima o Esau: no ka mea, ke makau nei au ia ia, o hele mai nei oia e pepehi mai ia'u me ka makuwahine a me na kamalii.
- 12 Ua olelo mai oe, E lokomaikai io no wau ia oe, a e hoonui au i kau poe mamo e like me ke one o ke kai, aole e pau lakou i ka heluia no ka lehulehu.
- 13 Moe iho la ia malaila ia po; lalau aku la ia i na mea i loaa i kona lima, i makana na kona kaikuaana, na Esau,
- 14 I elua haneri kao wahine, me na kao kane he iwakalua; elua haneri hipa wahine, me na hipa kane he iwakalua,
- 15 He kanakolu kamelo waiu, me ka lakou mau keiki; he kanaha bipi wahine, me na bipi kane he umi; he iwakalua hoki wahine a me na hokikeiki he umi.
- 16 Haawi aku la oia ia mau mea i ka lima o kana poe kauwa, a kaawale kekahi poe me kahi poe; i aku la ia i kana poe kauwa, E hele e aku oukou mamua o'u, a e hookaawale i kahi poe me kahi poe.
- 17 Kauoha aku la ia i ka mea i hele mamua, i aku la, A halawai mai ko'u kaikuaana o Esau me oe, a ninau mai ia oe, i ka i ana mai, Nowai oe? Mahe a oe e hele nei? Nawai hoi keia poe mamua ou?
- 18 Alaila, e olelo aku oe, Na kau kauwa, na Iakoba lakou nei, ua hoounaia mai, i makana na ko'u haku na Esau: eia ae hoi oia mahope o makou.

- ¹⁹ Pela hoi oia i kauoha aku ai i ka lua a me ke kolu,
a me ka poe a pau i hahai mahope o na pua
holoholona, i ka i ana, Pela hoi oukou e olelo
aku ai ia Esau, i ka wa e loaa'i ia oukou ia.
- ²⁰ E i aku hoi oukou, Eia ae kau kauwa o Iakoba
mahope o makou. No ka mea, i iho la ia, E
hoolaulea aku au ia ia i ka makana e hele
la mamua o'u, a mahope iho e ike aku au i
kona maka; a e maliu mai paha ia ia'u.
- ²¹ Pela i hele aku ai ka makana ma kela kapa imua
ona: a moe pu iho la oia ia po me ka huakai.
- ²² Ala ae la oia ia po, lalau aku la ia i kana mau
wahine elua, me kana mau kauwawahine
elua, a me kana mau keiki kane he umiku-
mamakahī, a hele aku la ma kahi papau o
Iaboka ma kela kapa.
- ²³ Lalau aku la ia ia lakou, hoouna aku la ia lakou
ma kela kapa o ke kahawai, a hoouka aku la
hoi i kana mau mea a pau.
- ²⁴ O Iakoba wale no i koe: a hakoko mai la kekahī
kanaka me ia, a wehe ae la ke alaula o ke ao.
- ²⁵ A ike iho la kela, aole ia i lanakila maluna ona,
papai mai la ia i ka hena o kona uha, a ua
kaapeke ae la ka huamoa o ko Iakoba uha, i
kona hakoko ana me ia.
- ²⁶ I mai la kela, E kuu ae oe ia'u, no ka mea, ke wehe
mai la ke alaula. I aku la oia, Aole au e kuu
aku ia oe, a hoomaikai mai oe ia'u.
- ²⁷ Ninau mai la kela ia ia, Owai kou inoa? I aku la
oia, O Iakoba.
- ²⁸ I mai la kela, Aole e hea hou ia kou inoa, o
Iakoba; aka, o Israela: no ka mea, he

ikaika kou imua o ke Akua; a e lanakila hoi
oe maluna o na kanaka.

²⁹ Ninau aku la o Iakoba, i aku la, Ke noi aku nei
au ia oe, e hai mai oe ia'u i kou inoa. I mai la
kela, Heaha kau i ninau mai ai i ko'u inoa?
A hoomaikai mai la kela ia ia ilaila.

³⁰ Kapa aku la o Iakoba i ka inoa o ia wahi o i
Peniela: No ka mea, ua ike iho nei au i ke
Akua, he maka no he maka, a ua malamaia
kuu ola.

³¹ Puka mai la ka la maluna ona i kona hele ana ae
maluna o Penuela, kapeke ae la oia maluna
o kona uha.

³² No ia mea, aole e ai na mamo a Israela i ke
olona i eake, ka mea ma ka uha, a hiki i keia
la: no ka mea, papai mai la kela i ka hena o
ko Iakoba uha ma ke olona i eake.

33

¹ NANA aku la na maka o Iakoba, ike aku la, aia
hoi, ua hiki mai o Esau me na haneri kanaka
eha. A puunaue aku la ia i na kamalii ia Lea,
a ia Rahela, a i na kauwawahine elua.

² Hoonoho aku la ia i na kauwawahine me na keiki
a laua mamua, ia Lea hoi me kana mau
keiki mahope iho, a ia Rahela me Iosepa
mahope loa.

³ Hele e aku la ia mamua o lakou; kulou pahiku
ihohi la ia ma ka honua, a hiki aku la ia i kona
kaikuaana.

⁴ Holo mai la o Esau e halawai me ia, apo mai la ia
ia, kau iho la ma kona a-i, a honi iho la ia ia:
a uwe iho la laua.

- ⁵ Alawa ae la kona mau maka, ike ae i na wahine a me na kamalii; ninau mai la ia, Owai lakou nei me oe? I aku la kela, O lakou no na keiki a ke Akua i haawi lokomaikai mai ai i kau kauwa.
- ⁶ Alaila neenee mai la na kauwawahine, o laua me na keiki a laua, a kulou iho la lakou.
- ⁷ Neenee mai la hoi o Lea me kana mau keiki, a kulou iho la lakou: a mahope iho, neenee mai la o Iosepa me Rahela, a kulou iho la laua.
- ⁸ Ninau mai la kela, Heaha ia oe kela poe nui a pau i halawai me au? I aku la oia, He mea ia e loaa mai ai ke aloha o kuu haku.
- ⁹ I mai la kela, He nui no ka'u, e kuu kaikaina, ia oe no kau mea.
- ¹⁰ I aku la o Iakoba, Aole, ke noi aku nei au ia oe, ina i loaa ia'u ke alohaia imua on, e lawe oe i ka'u makana ma ko'u lima: no ka mea, ua ike iho nei au i kou maka, e like me kuu ike ana i ka maka o ke Akua, a ua oluolu mai oe ia'u.
- ¹¹ Ke noi aku nei au ia oe, e lawe oe i ka'u hoomaikai ana i haawiiia ku nau; no ka mea, ua lokomaikai mai ke Akua ia'u, a no ka mea, ua lako hoi au. Koi aku la oia ia ia, a lawe hoi kela.
- ¹² I mai la kela, e neenee aku kakou i ko kakou hele ana, a e hele hoi au imua ou.
- ¹³ I aku la oia ia ia, Ua ike no kuu haku, he palupalu na kamalii, a me au no na hipa hapai a me na bipi hapai: ina e hoolalelaleia lakou i ka la hookahi, e pau ka ohana holoholona i ka make.
- ¹⁴ Ke noi aku nei au ia oe, e hele e aku kuu haku mamua o kana kauwa ma kela kapa; a na'u

no e hele malie aku, e like me ka hiki ana o na holoholona a me na kamalii ke hele imua o'u, a hiki aku au i kuu haku ma Seira.

¹⁵ I mai la o Esau, E pono paha na'u e waiho me oe i kekahi poe kanaka o'u. I aku la ia, No ke aha hoi ia? ina e loaa ia'u ke alohaia imua o kuu haku.

¹⁶ A hoi hou aku la o Esau ia la i kona hele ana i Seira.

¹⁷ Hele aku la o Iakoba i Sukota, a kukulu ia i hale nona, a hana iho la i hale kamala no kona poe holoholona: nolaila, i kapaia'i ka inoa o ia wahi, o i Sukota.

¹⁸ Hele pomaikai aku la o Iakoba i kekahi kulanakauhale o Sekema, ma ka aina o Kanaana ia ia i hoi mai ai mai Padanarama mai, a kukulu iho la ia i kona halelewa imua o ua kulanakauhale la.

¹⁹ Kuai aku la ia i kauwahi o ka aina, kahi ana i kukulu ai i kona halelewa, ma ka lima o na keiki a Hamora a ka makuakane o Sekema, i na apana kala he haneri.

²⁰ Malaila oia i hana'i i kuahu, a kapa iho la i kona inoa, o Elelohe-Israela.

34

¹ HELE aku la o Dina o ke kaikamahine a Lea i hanau ai na Iakoba, e ike i na kaikamahine o ia aina.

² A ike mai la o Sekema o ke keiki a Hamora no ka Hivi ke alii o ua aina la ia ia, lalau aku la kela ia ia, moe iho la me ia, a hoohaumia ia ia.

- ³ Hoopili mai la kona naau ia Dina i ke kaikamahine a Iakoba; aloha mai la ia i ua kaikamahine la, a olelo oluolu mai la i ua kaikamahine la.
- ⁴ Olelo aku la o Sekema i kona makuakane ia Hamora, E kii aku oe i ua kaikamahine la, i wahine na'u.
- ⁵ Lohe ae la o Iakoba ua hoohaumia oia i kana kaikamahine ia Dina: aia no kana mau keikikane ma ke kula me kona poe holoholona; a noho olelo ole la o Iakoba, a hoi mai la lakou.
- ⁶ Hele aku la o Hamora, ka makuakane o Sekema iwaho io Iakoba la e kamailio me ia.
- ⁷ A lohe ae la na keiki a Iakoba, hoi mai la lakou mai ke kela mai: ehaeha loa ka naau o ua poe kanaka la, a huhu loa iho la lakou, no ka mea, ua hana mai ia i ka mea kolohe i ka Israela, i ka moe ana me ke kaikamahine a Iakoba; ka mea pono ole ke hanaia pela.
- ⁸ Kamailio mai la o Hamora me lakou, i mai la, Ua pili ka naau o kuu keikikane i ka oukou kaikamahine: ke noi aku nei au ia oukou, e haawi mai ia ia i wahine nana.
- ⁹ E mare mai oukou me makou; e haawi mai i na kaikamahine a oukou na makou, a e lawe hoi i na kaikamahine a makou na oukou.
- ¹⁰ E noho pu oukou me makou: imua hoi o ko oukou alo ka aina: e noho oukou, a e kuai hoi iloko, a e hoolilo i ka aina no oukou.
- ¹¹ Olelo mai la hoi o Sekema i ko Dina makuakane a me kona mau kaikunane, E lokomaikai mai oukou ia'u, a e haawi aku hoi au i ka oukou mea e olelo mai ai ia'u.

- ¹² E hoonui loa oukou i ka'u mea e uku aku ai, a me ka makana, a e haawi aku no au e like me ka oukou e olelo mai ai: aka, e haawi mai i ke kaikamahine i wahine na'u.
- ¹³ Olelo hoopunipuni aku la na keikikane a Iakoba ia Sekema, a ia Hamora i kona makuakane, olelo lakou pela, no ka mea, ua hoohaumia oia ia Dina i ko lakou kaikuwahine.
- ¹⁴ Olelo aku la lakou ia laua, Aole e pono ia makou ke hana ia mea, ke haawi aku i ko makou kaikuwahine na ka mea i okipoepoe ole ia; no ka mea, he mea hoino ia no makou.
- ¹⁵ Penei wale no ka makou e ae aku ai ia olua, a i like auanei oukou me makou, i okipoepoeia na kane o oukou a pau;
- ¹⁶ Alaila makou e haawi aku ai i ka makou kaikamahine na oukou, a e lawe hoi i na kaikamahine a oukou na makou; a e noho pu me oukou, a lilo kakou i hookahi poe kanaka.
- ¹⁷ Aka, ke hoolohe ole oukou i ka makou, e okipoe-poeia'i; alaila e lawe aku makou i ka makou kaikamahine, a e hele.
- ¹⁸ A he oluolu ka lakou olelo ia Hamora, a me Sekema ke keiki a Hamora.
- ¹⁹ Aole i hoopanee aku na kanaka opiopio la i ka hana ana ia mea; no ka mea, he makemake kona i ke kaikamahine a Iakoba: a ua oi aku kona maikai imua o ko ka hale a pau o kona makuakane.
- ²⁰ Hele aku la o Hamora, laua o Sekema o kana keiki ma ka ipuka o ko laua kulanakauhale,

a kamailio pu iho la me na kanaka o ko laua
kulananakauhale, i kai ana aku,

- 21 Ea, ke noho malie nei keia poe kanaka me kakou; nolaila, e hoonoho kakou ia lakou ma ka aina, e piele lakou iloko; no ka mea, o ka aina, aia hoi, ua akea ia no lakou; e lawe kakou i na kaikamahine a lakou i wahine na kakou, a e haawi aku hoi kakou i na kaikamahine a kakou na lakou.
- 22 Penei wale no e ae mai ai ua poe kanaka la e noho me kakou, hookahi poe, i okipoepoeia na kane a pau o kakou, e like me lakou i okipoepoeia'i.
- 23 Aole anei e lilo na kakou ko lakou poe holoholona iki, ka lakou waiwai, a me na holoholona nui a pau a lakou? E ae wale aku no kakou ia lakou, a e noho pu auanei lakou me kakou.
- 24 Hoolohe aku la lakou ia Hamora a i kana keiki ia Sekema, o ka poe a pau i puka iwaho ma ka ipuka o kona kulananakauhale: a ua okipoepoeia na kane a pau, ka poe a pau i puka iwaho ma ka ipuka o kona kulananakauhale.
- 25 A i ke kolu o ka la, ia lakou i eha ai, o na keikikane elua a Iakoba, o Simeona laua o Levi, na kaikunane o Dina, lalau aku la laua i na pahikaua a laua, hele aku la laua i ua kulananakauhale la me ka makau ole, a pepehi aku la i na kane a pau.
- 26 Pepehi aku la laua ia Hamora, laua o Sekema o kana keiki me ka maka o ka pahikaua, lawe aku la hoi ia Dina iwaho o ka hale o Sekema, a hele aku la iwaho.

- ²⁷ Held mai la na keiki a Iakoba i ka poe i pepe-hiia, a lawe pio ae la i ka waiwai o ke kulanakauhale; no ka mea, ua hoohaumia lakou i ko lakou kaikuwahine.
- ²⁸ Lawe pio aku la hoi lakou i na hipa a lakou, a me na bipi a lakou, a me na hoki a lakou, me ko loko o ke kulanakauhale, a me ko ke kula,
- ²⁹ Me ko lakou waiwai a pau, me ka lakou kamalii a pau, a me na wahine a lakou, na pau ia lakou i ka hoopioia; a hao ae la lakou i na mea a pau o ka hale.
- ³⁰ Olelo aku la o Iakoba ia Simeona laua o Levi, Ua hoopilikia mai olua ia'u, i pilau aku ai au iwaena o na kanaka o ka aina nei, iwaena o ka Kanaana a me ka Perezi: a owau la e, he poe uuku ko'u, e hoakoakoa mai auanei lakou e ku e ia'u, a e pepehi mai ia'u, a e make auanei au me ko ka Hale o'u.
- ³¹ I mai la lakou, E pono anei e hana mai ia i ko makou kaikuwahine, me he wahine hookamaka la?

35

- ¹ OLELO mai la ke Akua ia Iakoba, E ku ae oe, e pii aku i Betela, ilaila e noho ai: ilaila oe e hana'i i kuahu no ke Akua i ike a oe i kou wa i mahuka ai mai ka maka o kou kaikuaana o Esau.
- ² Alaila, i aku la o Iakoba i ko ka hale ona, a i ka poe a pau me ia, E haalele oukou i na akua e iwaena o oukou, e huikala ia oukou iho, a e aahu iho i na kapa hou:

- ³ A e ku ae kakou, e pii aku i Betela; malaila au e hana'i i kuahu no ke Akua nana au i maliu mai i ka la o ko'u popilikia, a i hele pu me au i kuu ala i hele ai.
- ⁴ Haawi mai la lakou ia Iakoba i na akua e ma ko lakou lima, a me na apo ma na pepeiao o lakou: a huna iho la o Iakoba ia mau mea malalo o ka laau oka aia ma Sekema.
- ⁵ Hele aku la lakou: a kau mai la ka weliweli mai ke Akua mai maluna o na kulanakauhale ma kela aoao a keia aoao o lakou, a alualu ole mai la lakou i na keiki o Iakoba.
- ⁶ A hiki aku la o Iakoba ia Luza, oia hoi o Betela, ma ka aina o Kanaana, oia a me na kanaka a pau me ia.
- ⁷ Hana iho la ia i kuahu malaila, a kapa iho la ia wahi o i Ele-betela: no ka mea, ilaila ke Akua i ike a i e ia i kona wa i mahuka ai mai ka maka aku o kona kaikuaana.
- ⁸ Make iho la o Debora o ke kahu no Rebeka, a ua kanuia oia malalo o Betela malalo o kekahia laau oka: a ua kapaia ka inoa o ia wahi, o i Alona-bakuta.
- ⁹ Ikea hou ke Akua e Iakoba, i kona hoi ana mai, noloko mai o Padanarama, a hoomaikai mai la ia ia.
- ¹⁰ I mai la ke Akua ia ia, O Iakoba kou inoa: aole e hea hou ia kou inoa o Iakoba, aka, o Israela kou inoa: a kapa iho la oia i kona inoa o Israela.
- ¹¹ I mai la ke Akua ia ia, Owau no ke Akua Mana: a e hoohua ae oe, a e mahuahua; nau mai no kekahia lahuikanaka, a me na lahuikanaka;

a e puka mai auanei na alii mailoko mai o kou puhaka;

¹² A o ka aina a'u i haawi aku ai no Aberahama, a no Isaaka, e haawi aku hoi au nou, a no kau poe mamo mahope ou ka'u e haawi aku ai i ka aina.

¹³ A pii aku la ke Akua iluna mai ona aku la, ma kahi ana i kamailio pu ai me ia.

¹⁴ Hooku ae la o Iakoba i echo ma kahi ana i kamailio mai ai me ia, he echo pohaku: a ninini iho la ia i ka mohaiinu maluna; a ninini iho la hoi oia i ka aila maluna.

¹⁵ Kapa iho la o Iakoba i ka aina o kahi a ke Akua i olelo mai ai me ia, o Betela.

¹⁶ Hele aku la lakou mai Betela aku, a ua kokoke e hiki i Eperata, haakohi iho la o Rahela, a puua iho i ka hanau keiki ana.

¹⁷ A i kona puua ana, i aku la ka pale keiki ia ia, Mai makau oe, e loaa auanei ia oe keia keiki no hoi.

¹⁸ A i ka wa e kaili ana kona ea, (no ka mea, make no oia,) kapa iho la ia i kona inoa, i Benoni: aka, kapa aka la kona makuakane ia ia, o Beniamina.

¹⁹ Make iho la o Rahela, a kanuia oia ma ke alanui e hele ai i Eperata, oia o Betelehema.

²⁰ Hooku ae la o Israela, i pohaku echo maluna o kona he, oia ka echo no ka he o Rahela, a hiki i keia manawa.

²¹ Hele aku la o Israela, a kukulu iho la i kona halelewa ma o aku o ka halekiai o Edara.

- ²² A i ka noho ana o Iseraela ma ia aina, hele aka la o Reubena, a moe pu iho la me Bileha me ka haiawahine a kona makuakane; a lohe ae la o Iseraela. O na keikikane a Iakoba he umikumamalua:
- ²³ O na keikikane a Lea; o Reubena ka makahiapo a Iakoba, o Simeona, o Levi, o Iuda, o Isakara, a o Zebuluna.
- ²⁴ O na keikikane a Rahela; o Iosepa, a o Beni-amina.
- ²⁵ O na keikikane a Bileha, a ke kauwawahine a Rahela; o Dana, a o Napetali.
- ²⁶ O na keikikane a Zilepa, a ke kauwawahine a Lea; o Gada a o Asera. O lakou na keikikane a Iakoba, i hanau nana ma Padanarama.
- ²⁷ Hele aku la o Iakoba i kona makuakane ia Isaaka ma Mamere, ma ke kulanakauhale o Areba, (oia o Heberona,) kahi i noho ai o Aberahama a me Isaaka.
- ²⁸ A o na la o Isaaka, hookahi haneri makahiki a me kanawalu.
- ²⁹ Kuu aku la o Isaaka i ka uhane, a make iho la, a ua huiia'ku ia me kona poe kanaka: ua elemakule ia, a nui loa kona mau la: na kana mau keikikane na Esau ma laua o Iakoba oia i kanu.

36

¹ EIA ka mooolelo no Esau, oia o Edoma.

² Lawe ae la o Esau i kana mau wahine no na kaikamahine o Kanaana: o Ada, ke kaikamahine a Elona ka Heta, a me

- Aholibama ke kaikamahine a Ana, ke kaikamahine a Zibeona ka Hivi;
- ³ A o Basemata ke kaikamahine a Isemaela, a o ke kaiku wahine o Nebaiota.
- ⁴ Na Ada mai i hanau o Elipaza na Esau; a na Basemata i hanau o Reuela;
- ⁵ Na Aholibama i hanau o Ieusa, o Iaalamā, a o Kora: o lakou na keikikane a Esau, i hanau nana ma ka aina o Kanaana.
- ⁶ Lalau aku la o Esau i kana mau wahine, me kana mau keikikane, a me kana mau kaikamahine, a me na kanaka a pau o kona hale, i na holoholona liili, a me na holoholona nui, a me kona waiwai a pau i loaa ia ia ma ka aina o Kanaana; a hele aku la ma ka aina e, mai ka maka aku o kona kaikaina o Iakoba.
- ⁷ Aole i hiki ia laua ke noho pu, no ka nui loa o ko laua waiwai; aole i pono i ka aina, kahi a laua i noho malihini ai ke malama ia laua, no na holoholona a laua.
- ⁸ A noho aku la o Esau ma mauna Seira: a o Esau, oia no o Edoma.
- ⁹ Eia na hanauna o Esau, o ke kupuna no ka Edoma, ma mauna Seira.
- ¹⁰ Eia na inoa o na keikikane a Esau, o Elipaza, ke keiki a Ada, a ka wahine na Esau; o Reuela ke keiki a Basemata a ka wahine na Esau.
- ¹¹ O na keikikane a Elipaza, o Temana, o Omara, o Zepo, o Gatama, a o Kenaza.
- ¹² A o Timena ka haiawahine na Elipaza na ke keiki a Esau; a nana mai i hanau o Amaleka

na Elipaza: o lakou na keikikane a Ada, a ka wahine na Esau.

13 Eia na keikikane a Reuela; o Nahata, o Zera, o Sama, a o Miza: o lakou na keikikane a Basemata a ka wahine a Esau.

14 Eia na keikikane a Aholibama, a ke kaikamahine a Ana, ke kaikamahine a Zibeona, ka wahine a Esau: a nana i hanau mai o Ieusa, o Iaalama, a o Kora na Esau.

15 O lakou nei na makualii o na moopuna a Esau: o na keikikane a Elipaza a ka makahiapo na Esau, o Temana he makualii, o Omara he makualii, o Zepo he makualii, o Kenaza he makualii,

16 O Kora he makualii, o Gatama he makualii, a o Amaleka he makualii: o lakou na makualii na Elipaza ma ka aina o Edoma: o lakou hoi na keikikane a Ada.

17 Eia na keikikane a Reuela a ke keikikane a Esau; o Nahata he makualii, o Zera he makualii, o Sama, he makualii, a o Miza he makualii: o lakou na makualii na Reuela, ma ka aina o Edoma: o lakou na moopuna a Basemata, a ka wahine a Esau.

18 Eia na keikikane a Aholibama, a ka wahine na Esau; o Ieusa he makualii, o Iaalama he makualii, a o Kora he makualii: o lakou na makualii na Aholibama, ke kaikamahine a Ana, a ka wahine a Esau.

19 O lakou na keikikane a Esau, oia o Edoma; o lakou hoi na makualii o lakou.

- 20 Eia na keikikane a Seira ka Hori, i noho ma ia aina; o Lotara, o Sobala, o Zibeona, o Ana,
- 21 O Disona, o Ezera, a o Disana: o lakou na makualii o ka Hori, o na keikikane a Seira, ma ka aina o Edoma.
- 22 O na keiki a Lotana, o Hori a o Hemama; a o Timena ke kaiku wahine o Lotana.
- 23 Eia na keikikane a Sobala: Alevana, o Manahata, o Ebala, o Sepo, a o Onama.
- 24 Eia na keikikane a Zibeona, o Aia, laua o Ana: oia no ua Ana la i loaa ia ia na hoki ma ka waonahele, ia ia i hanai ai i na miula o kona makuakane o Zibeona.
- 25 Eia na keiki a Ana; o Disona, a o Aholibama ke kaikamahine a Ana.
- 26 Eia na keiki a Disona; o Hemedana, o Esebana, o Iterana, a o Kerana.
- 27 Eia na keiki a Ezera; o Bilehana, o Zaavana, a o Akana.
- 28 Eia na keiki a Disana; o Uza, a o Arana.
- 29 Eia na makualii o ka Hori, o Lotana he makualii, o Sobala he makualii, o Zibeona he makualii, a o Ana he makualii,
- 30 O Disona he makualii, o Ezera he makualii, a o Disana he makualii; o lakou na makualii na ka Hori, no ko lakou poe makualii ma ka aina o Seira.
- 31 Eia ka poe alii i noho alii ai ma ka aina o Edoma mamua o ka manawa i noho ai kekahia alii maluna o na mamo a Israela.
- 32 O Bela ke keikikane a Beora, noho alii ae la ia ma Edoma: a o Dinehaba ka inoa o kona kulanakauhale.

- 33 A make iho la o Bela, a noho alii ae la o Iobaba
ke keikikane a Zera no Bozera ma kona
hakahaka.
- 34 A make iho la o Iobaba, noho alii ae la o Husama,
no ka aina o Temani, ma kona wahi.
- 35 A make iho la o Husama, o Hadada, o ke keiki
a Bedada, nana i pepehi ia Midiana ma
ke kula o Moaba, a noho alii ae la ia ma
kona wahi: a o A vita ka inoa o kona ku
lanakauhale.
- 36 A make iho la o Hadada, noho alii ae la o Samela
no Masereka ma kona wahi.
- 37 A make iho la o Samela, noho alii ae la o Saula
no Rehobota o ka muliwai, ma kona wahi.
- 38 A make iho la o Saula, noho alii ae la o Baala-
hanana o ke keiki a Akebora ma kona wahi.
- 39 A make iho la o Baala-hanana ke keiki a Akeb
ora, noho alii ae la o Hadara ma kona wahi:
o Pau ka inoa o kona kulanakauhale; a o
Mehetabela ka inoa o kana wahine, oia ke
kaikamahine a Matereda, ke kaikamahine
a Mezahaba.
- 40 Eia na inoa o na makualii na Esau, e like me ko
lakou mau ohana, mamuli o ko lakou mau
wahi, ma ko lakou mau inoa; o Timena he
makualii, o Aleva he makualii, o Ieteta he
makualii,
- 41 O Aholibama he makualii, o Ela he makualii, o
Pinona he makualii,
- 42 O Kenaza he makualii, o Temana he makualii, o
Mibezara he makualii,
- 43 O Magediela he makualii, a o Irama he makualii;
o lakou na makualii na Edoma, e like me ko
lakou mau noho ana, ma ka aina i noho ai
lakou: oia o Esau ke kupuna no ko Edoma.

37

- ¹ NOHO aka la o Iakoba ma ka aina a kona makuakane i noho malihini ai, ma ka aina i Kanaana.
- ² Eia ka mooolelo no Iakoba. He umi ko Iosepa makahiki a me kumamahiku, e hanai ana oia i na holoholona me kona poe kaikuaana, e noho pu ana o ua keiki la me na keikikane a Bileha, a me na keikikane a Zilepa, na wahine a kona makuakane, a hai mai la o Iosepa i ka makuakane o lakou i ka lono ino o lakou.
- ³ Ua oi aku la ke aloha o Israela ia Iosepa mamua o kana mau keiki a pau, no ka mea, he keiki ia no kona wa elemakule: a hana iho la ia i kapakomo onionio nona.
- ⁴ A ike iho la kona poe kaikuaana i ke kela ana aku o ke aloha o ko lakou makuakane ia Iosepa mamua o kona poe hoahanau a pau, inaina aku la lakou ia Iosepa, aole i hiki ke olelo oluolu aku ia ia.
- ⁵ Moe iho la o Iosepa i ka moe, a hai aku la i kona poe kaikuaana, a nui hou mai la ko lakou inaina ana ia ia.
- ⁶ Iaku la ia ia lakou, Ea, e hoolohe mai oukou i keia moe a'u i moe ai.
- ⁷ Eia hoi, i ka pua ana a kakou i na pua, ma ka mahina ai, ala mai la ka'u pua, a kupono ae la iluna; a o ka oukou mau pua ka i ku poai mai la, a kulou iho la i ka'u pua.
- ⁸ Olelo mai la kona poe kaikuaana ia ia, E alii ana ka oe maluna o makou? O oe anei ka haku maluna o makou? Huhu nui aku la lakou ia ia i kana moe, a i kana olelo.

- ⁹ A mahope aku, moe hou iho la ia i ka moe, a hai hou aku la i kona poe kaikuaana, i aku la, Eia hoi, ua moe hou iho nei au i ka moe; a ua kulou mai ia'u ka la, a me ka mahina, a me na hoku he umikumamakahi.
- ¹⁰ Hai aku la ia i kona makuakane, a i kona poe kaikuaana. Papa mai la kona makuakane, i mai la ia ia, Heaha keia moe au i moe ai? E hele anei au iou la, a me kou makuwahine, a me kou poe hoahanau, e kulou ilalo i ka honua imua ou?
- ¹¹ Huahuwa ae la kona poe kaikuaana ia ia, a malama iho la kona makuakane i ua olelo la.
- ¹² Hele aku la kona poe kaikuaana i Sekema, e hanai i ka poe holoholona a ka makuakane o lakou.
- ¹³ Olelo aku la o Iserala ia Iosepa, Aia paha kou poe kaikuaana e hanai holoholona ana ma Sekema? Auhea oe? E hoouna ana au ia oe io lakou la. I mai la kela ia ia, Eia no wau.
- ¹⁴ I aku la oia ia ia, Ea, o hele oe e ike i ka pono o kou poe kaikuaana, a me ka pono o na holoholona, a e hai mai ia'u. Hoouna aka la oia ia ia, iwaho o ke awawa o Heberona, a hiki aku la ia i Sekema.
- ¹⁵ A loaa ia i kekahi kanaka, aia hoi, ua hele hewa ia i ke kula. Ninau mai la ua kanaka la ia ia, i mai la, Heaha kau mea e imi nei?
- ¹⁶ Olelo aku la ia, E imi ana au i ko'u poe kaikuaana: e hai mai oe ia'u i kahi a lakou e hanai ai i na holoholona.

- 17 Olelo mai la ia kanaka, Ua hala'ku la lakou: ua lohe au i ka olelo ana a lakou, E, e hele kakou i Dotana. Hahai aku la o Iosepa i kona poe kaikuaana, a loaa aku la lakou Dotana.
- 18 A ike mai la lakou ia ia ma kahi loihi aku, aole ia i lihi koke mai, ohumu iho la lakou ia ia, e make ia.
- 19 Olelo ae la lakou i kekahi i kekahi, Eia'e ka mea nana na moe, ke hele mai nei.
- 20 Ina kakou e pepehi ia ia a make loa, e hoolei ia ia iloko o kahi lua, a e olelo aku kakou, Na ka ilio hihiu ia i ai; alaila, e ike kakou i ka hope o kana mau moe.
- 21 A lohe ae la o Reubena, hoola ae la oia ia ia, mai ko lakou lima ae; i ae la, Mai pepehi kakou ia ia.
- 22 Olelo aku la o Reubena ia lakou, Mai hookahe i ke koko; e hoolei ia ia iloko o keia hua o ka aina waonahele. Mai kau i ka lima maluna ona. Manao iho la ia e hoopakele ia ia, mai ko lakou lima ae, a e hoihoi aku ia ia i kona makuakane.
- 23 A hiki aku la o Iosepa i kona poe kaikuaana, hao ae la lakou i ko Iosepa kapa, o ke kapa onionio maluna ona;
- 24 Lalau ae la lakou ia ia, hoolei aku la ia ia iloko o ka lua. Ua kaawale ka lua, aole he wai oloko.
- 25 A noho iho la lakou e ai i ka ai. Alawa'e la ko lakou maka, ike aku la, aia hoi kekahi poe mamo a Isemaela, e hele mai ana, mai Gileada mai, me ko lakou mau kamelo, ua

kaumaha i ka mea ala, a me ka bama, a me ka mura, e lawe hele ana i Aigupita.

²⁶ Olelo aku la o Inda i kona poe hoahanau, Heaha ka maikai, ke pepehi kakou i ko kakou kaikaina, a huna i kona koko?

²⁷ Ina kakou e kuai aku ia ia i ka Isemaela; mai kau ko kakou lima maluna ona; no ka mea, o ko kakou kaikaina no ia, a me ko kakou io. A hoolohe mai la kona poe hoahanau ia ia.

²⁸ Hele ae la ua poe kanaka kuai la, no Midiana, huki mai la lakou, a hapai ae la ia Iosepa, mai loko mai o ka lua, a kuai aku la ia ia, i ka Isemaela, i na hapakala, he iwakalua. A lawe ae la lakou ia Iosepa i Aigupita.

²⁹ A hoi mai la o Reubena i ka lua, aia hoi, aole o Iosepa iloko o ka lua: haehae iho la ia i kona kapa.

³⁰ A hoi aku la ia i kona poe hoahanau, iaku la, Aole loa ke keiki; a o wau, ihea la wau e hele ai?

³¹ Lawe ae la lakou i ke kapa o Iosepa, pepehi iho la lakou i ke kao keiki, a kupenu iho la i ke kapa i ke koko.

³² Hoouka aku la lakou i ua kapa onionio la, a hiki i ko lakou makuakane; iaku la, Ua loaa mai keia ia makou: e nana oe, o ke kapa paha o kau keiki, aole paha.

³³ Ike mai la kela, i mai la, Oia, o ke kapa no ia o ka'u keiki; ua pau o Iosepa i ka ilio hihiu, oiaio no, ua haehaeia o Iosepa.

- ³⁴ Haehae iho la o Israela i kona kapa, kaei ae la i ke kapa inoino ma kona puhaka, a kanikau iho la ia i kana keiki a nui na la.
- ³⁵ Ku mai la kana mau keikikane a pau, a me kana mau kaikamahine a pau, e hoonana ia ia. Hoole aku la kela, aole e na; i aku la, E kanikau no au, a hiki au ilalo i ka lua i kuu keiki la. Pela i uwe ai kona makuakane ia ia.
- ³⁶ A kuai aku la ko Midiana ia ia i Aigupita, ia Potipara, he luna na Parao, oia ka luna o ka poe koa.

38

- ¹ I A manawa no, iho aku la o Iuda mai kona poe hoahanau aku, a kipa aku la i kekahi kanaka no Adulama, o Hira kona inoa.
- ² Ike aku la o luda i ke kaikamahine a kekahi mamo a Kanaana ilaila, o Sua kona inoa, lawe ae la oia ia ia, a komo aku la io na la.
- ³ Hapai iho la oia, a hanau mai la he keikikane; a kapa iho la ia i kona inoa, o Era.
- ⁴ Hapai hou iho la oia, a hanau mai la he keikikane; a kapa iho la ia i kona inoa, o Onana.
- ⁵ Hapai hou iho la oia a hanau mai la he keikikane; a kapa iho la ia i kona inoa, o Sela: ma Keziba oia i kona wa i hanau ai.
- ⁶ Lawe ae la o Iuda i wahine na Era, na kana hiapo, o Tamara kona inoa.
- ⁷ A ua hewa o Era, o ka hiapo a Iuda imua o Iehova; a pepehi iho la o Iehova ia ia.

- ⁸ I aku la o Iuda ia Onana, E komo aku oe i ka wahine a kou kaikuaana, e mare me ia, a e hooku ae i keiki na kou kaikuaana.
- ⁹ Ike iho la o Onana, aole nana ke keiki, alaila, i ka manawa ana i komo aku ai i ka wahine a kona kaikuaana, kiki iho la oia i ka mea ma ka honua, o haawi auanei ia i hua na kona kaikuaana.
- ¹⁰ A o ka mea ana i hana'i, ua hewa ia imua o Iehova: a nana hoi ia i pepehi.
- ¹¹ Alaila, i aku la o Iuda ia Tamara, E noho kane ole oe ma ka hale o kou makuakane, a ka manawa e nui ai kuu keikikane o Sela: no ka mea, i iho la ia, O make paha hoi oia, e like me kona mau kaikuaana. Hele aku la o Tamara a noho iho la ma ka hale o kona makuakane.
- ¹² A nui na la i hala, make iho la ke kaikamahine a Sua, o ka luda wahine; a pau ko Iuda kanikau ana, pii aku la ia i Timenata i kona poe ako hipa, oia a me kona makamaka o Hira no Adulama.
- ¹³ Hai aku la kekahi ia Tamara, Ea, e pii ana kou makuahunowaikane i Timenata e ako i kana hipa.
- ¹⁴ Wehe ae la ia i kona mau kapa makena, a uhi iho la ia ia iho i ka palemaka, aahu iho la ia ia iho, a noho iho la ma ka pukapa o Enaima ma kapa alanui e hele ai i Timenata: no ka mea, ike aku la ia, ua nui ae la o Sela, aole hoi i haawilia oia i wahine naua.
- ¹⁵ A ike aku la o Iuda ia ia, manao iho la ia he wahine hookamakama kela; no ka mea, ua paleia kona maka.

- 16** Kipa ae la ia io na la ma kapa alanui, i aku la,
 Ea, ke noi aku nei au ia oe, e ae mai ia'u e
 komoaku iou la; (no ka mea, aole ia i ike, o
 kana hunona wahine ia.) Ninau mai la kela,
 Heaha kau e haawi mai ai ia'u, i mea e komo
 mai ai oe i o'u nei?
- 17** I aku la ia, E hoouka aku au i wahi kao keiki no
 ka poe holoholona mai I mai la kela, Aole
 anei oe e haawi mai i hoailona, a hoouka
 mai oe ia mea?
- 18** I aku la oia, Heaha ka hoailona a'u e haawi aku
 ai ia oe? I mai la kela, O kou apolima, me
 kou kaula hoolewa, a me ke kookoo maloko
 o kou lima. Haawi aku la oia ia ia, a komo
 aku la io na la, a hapai iho la kela ma ona la.
- 19** Ku ae la ia, hele aku la, a waiho iho la i kona pale
 maka, a aahu hou iho la i kona mau kapa no
 ka noho wahine kanemake ana.
- 20** Hoouka aku la o Iuda i ke kao keiki ma ka lima o
 kona makamaka no Adulama, i loaa mai ai
 kana hooiaio mai ka lima mai o ka wahine:
 aole nae i loaa ua wahine la ia ia.
- 21** Ninau aku la ia i na kanaka o ia wahie, i aku la,
 Auhea la ka wahine hookamakama i noho
 ma Enaima, ma kapa alanui? I mai la lakou,
 Aohe wahine hookamakama ia nei.
- 22** Hoi hou aku la ia io Iuda la i aku la, Aohe i loaa
 ia ia'u; a ua i mai hoi na kanaka o ia wahie,
 aole wahine hookamakama ia nei.
- 23** I aku la o Iuda, E aho no e lilo ia mau mea nona, o
 hoohilahilaia kaua: aia hoi, hoouka aku no
 au i keia kao keiki, aole ka i loaa ka wahine
 ia oe.

- ²⁴ A hala na malama ekolu paha, hai mai la kekahi ia Iuda, i ka i ana, Ua moekolohe iho nei kau hunonawahine o Tamara; aia hoi, ua hapai oia ma ka moekolohe. Iaku la o Iuda, E kaiia mai oia, i puhiia'i ia i ke ahi.
- ²⁵ A kaiia'ku oia, hoouna mai la ia, i mai la i kona makuahunowaikane, Na ke kanaka nana keia mau mea au i hapai ai. I mai la hoi oia, E nana oe, ea, i ike i ka mea nana keia mau mea, o ke apolima, me ke kaula hoolewa, a me ke kookoo.
- ²⁶ A ike iho la o Iuda, i aku la, Ua oi aku kona pono i ko'u; no ka mea, aole au i haawi aku ia ia na kuu keiki na Sela. Aole hoi o Iuda i ike hou ia ia.
- ²⁷ A i ka manawa o kona haakohi ana, aia hoi, he mau mahoe maloko o kona opu.
- ²⁸ A i ka hanau ana, puka mai la ka lima o kekahi; lalau aku la ka palekeiki i ua lima la a nakii iho la i ke kaula ulaula ilaila, i mai la, Eia ka hanau mua.
- ²⁹ A i ka huki hou ana o kona lima iloko, aia hoi, puka e mai la kona hoahanau: i aku la ke palekeiki, Heaha kau i poha wale mai? Maluna iho ou keia nahae: nolaila, kapa iho la ia i kona inoa o Pareza.
- ³⁰ Mahope iho puka mai la ke kaikaina, ia ia ke kaula ulaula ma kona lima: a ua kapaia kona inoa o Zara.

39

- ¹ U A laweia'ku la o Iosepa ilalo i Aigupita; kuaiia'ku la oia no Potipara, he luna na

Parao, he luna o ka poe koa, a he kanaka no Aigupita, mai na lima aku o ka Isemaela, nana ia i lawe aku ilalo.

- ² Me Iosepa no o Iehova, he kanaka ia i hoopomaikaiia, aia no ia ma ka hale o kona haku, he Aigupita.
- ³ Ike ae la kona haku, aia no o Iehova me Iosepa, a na Iehova no i pono ai ka hana a pau a kona lima.
- ⁴ A loaa ia Iosepa ka lokomaikaiia imua ona, a hookauwa aku ia nana, a hoolilo aku la oia ia ia i luna no kona ohua, a no kona waiwai a pau, a waiho aku la ia i kana mea a pau i kona lima.
- ⁵ Eia hoi kekahi, mai ka wa mai o kona hoolilo ana ia ia i luna no kona ohua, a maluna o kona mea a pau, hoopomaikai mai ke Akua i ko ka hale o ua kanaka Aigupita nei no Iosepa; a na Iehova no ka pomaikai o na mea a pau ona, ma ka hale, a ma ke kula.
- ⁶ A waiho iho la oia i kona mea a pau i na lima o Iosepa, aole ia i ike aku i kekahi mea nona, o ka ai ana i ai ai wale no. Ua maikai ke kino o Iosepa, he maikai no hoi ka maka.
- ⁷ A mahope iho o keia mau mea, ike mai la na maka o ka wahine a kona haku ia Iosepa, i mai la ia, E moe kaua.
- ⁸ Hoole aku la ia, i aku la i ka wahine a kona haku, Aia hoi, aole ike kuu haku i na mea ia'u ma keia hale, ua waiho mai nei ko'u haku i kana mea a pau i kuu lima:
- ⁹ Aohe mea nui e ae oloko o keia hale, owau wale no; aole keia i paa aku i kekahi mea ia'u, o

oe wale no, no ka mea, o kana wahine no oe. Pehe la wau e hana'i i keia hewa nui, a hana ino aku i ke Akua?

- 10 Koi mai la oia ia Iosepa i keia la a i keia la, aole loa ia i hoolohe iki aku ia ia, e moe me ia, a e noho me ia.
- 11 Ia manawa iho, komo ae la o Iosepa iloko o ka hale, e hana i kana hana, aohe kanaka o ka hale iloko.
- 12 Apo mai la kela ia ia ma ke kapa ona, i mai la, E moe kaua. Haalele iho la ia i kona kapa ma ka lima ona, holo aku la a hiki iwaho.
- 13 A ike aku la ua wahine la, ua haalele ia i kona kapa ma kona lima, a ua holo aku la iwaho,
- 14 Kahea aku la ua wahine la i na kanaka o kona hale, olelo aku la ia lakou, i aku la, E nana oukou, ua lawe mai nei kela i ke kanaka no ka poe Hebera io kakou nei, e hoomae-waewa mai ia kakou. Hele mai la oia io'u nei e moe me au, a kahea aku la au me ka leo nui;
- 15 A lohe mai la kela i kuu hookiekie ana i kuu leo iluna, a i kuu hea ana aku, haalele iho nei oia i ke kapa ona ia'u, holo aku la a hiki iwaho.
- 16 Malama iho la ua wahine la i kona kapa, a hoi mai la kona haku i ka hale.
- 17 Olelo aku la ua wahine la ia ia i keia mau olelo, i aku la, O ko kauwa Hebera, au i lawe mai ai io kakou nei, ua komo mai ia io'u nei e hoomae-waewa mai ia'u.
- 18 A hookiekie au i kuu leo iluna a kahea aku au, alaila, haalele iho la ia i ke kapa ona ia'u, a holo aku la iwaho.

- ¹⁹ A lohe ae la kona haku i ka olelo a kana wahine
i olelo mai ni ia ia, i ka i ana mai, E like me
keia mau olelo i hana mai ai kau kauwa ia'u;
nui iho la ka huhu ona.
- ²⁰ Lalau mai la ka haku o Iosepa ia in, hahao aku
la ia ia iloko o ka halepaahao, i kahi i paa ai
ka poe paa o ke alii, a paa no ia maluila ma
ka halepaahao.
- ²¹ Me Iosepa no o Iehova, aloha nui mai la ia ia, a
haawi mai la ia ia i ka pono imua o na maka
o ka mea nana i malama ka halepaahao.
- ²² Waiho ae la ka mea nana i malama ka halepaa-
hao i ka poe paa a pau oloko o ka halepaa-
hao i ka lima o Iosepa, a o na mea a pau i
hanaia malaila, nana no ia i hana.
- ²³ Aole hoi i nana aku ka luna o ka halepaahao i
kekahi mea malalo iho o kona lima, no ka
mea, aia no o Iehova me ia, a hoopomaikai
mai la o Iehova i ka hana a pau ana i hana'i.

40

- ¹ A MAHOPE iho o keia mau mea, hewa ka mea
lawe kiahā, a me ka mea kahuai o ke alii o
Aigupita, i ko laua haku, i ke alii o Aigupita.
- ² Huhu aku la Parao i kana mau luna elua, i ka luna
lawe kiahā, a me ka luna kahuai.
- ³ A hahao aku la oia ia laua iloko o kahi paa o ka
hale o ka luna koa, ma ka halepaahao i kahi
o Iosepa i paa ai.
- ⁴ Kauoha aku la ka luna koa ia Iosepa no laua,
nana e malama mai laua, a nui na la a laua
i paa ai.

- ⁵ Moe iho la laua a elua i ka moe, i ka po hookahi ko laua moe ana, ma ka oiaio ke ano o ko laua moe, o ka mea lawe kiahā, a me ka mea kahuai o ke alii o Aigupita, o na mea i paa ma ka halepaahao.
- ⁶ A ao ae la, hele aku la o Iosepa io laua la, nana aku la ia laua, aia hoi, ua kaumaha iho la laua.
- ⁷ Ninau aku la ia i ua mau luna la me ia, ana i malama'i ma kahi paa o ka hale o kona haku, i aku la, No ke aha la i inoino ai na maka o olua i keia la?
- ⁸ I aku la laua ia ia, Ua moe maua i ka moe, aohe mea nana e hai mai ke ano o ia mea. I aku la o Iosepa ia laua, Aole anei na ke Akua ke ano oiaio? e hoike mai olua ia'u.
- ⁹ Hai aku la ka luna lawe kiahā i kana moe ia Iosepa, i aku la ia ia, O kuu moe, aia hoi, he kumu waina imua o'u.
- ¹⁰ Ekolu manamana o ke kumu waina; me he mea opuu mai la ia, a mohala mai la ka pua; a hua mai la ka hua waina pala.
- ¹¹ Ma kuu lima ke kiahā o Parao, a lawe ae la au i na hua waina, kowi iho la ia lakou iloko o ke kiahā o Parao, a haawi aku la au i ke kiahā i ko Parao lima.
- ¹² Olelo aku la o Iosepa ia ia, Eia ke ano oiaio o ia mea: o na manamana ekolu, ekolu ia la.
- ¹³ I na la ekolu, e hookiekie ae o Parao i kou poo iluna, a e hoihoi aku ia oe i kou wahī mamua, alaila, e haawi aku oe i ke kiahā o Parao iloko o kona lima, e like me kau hana'na mamua, i ka wa ia oe ka lawe kiahā.

- 14 A pomaikai oe, ea, e hoomanao mai oe ia'u, alaila, ke noi aku nei au, e hana lokomaikai mai oe ia'u. E haiaku oe ia'u ia Parao, e laweia'ku hoi au iwaho o keia hale.
- 15 No ka mea, ua aihue io ia mai au, noloko mai o ka aina o ka poe Hebera; ia nei hoi, aole au i hana i mea i hahaoia'i e lakou iloko o ka lua.
- 16 A ike mai la ka luna kahuai, ua hoike mai kela i ke ano ma ka maikai, olelo mai la oia ia Iosepa, He moe no hoi ka'u, aia hoi, he mau hinai palaoa keokeo ekolu iluna o kuu poo.
- 17 A iloko o ka hinai maluna iho, o na mea ai a pau i kahuia na Parao. Ai mai la na manu ia mau mea noloko mai o ka hinai maluna o kuu poo.
- 18 Olelo aku la Iosepa, i aku la, Eia ke ano o ia mea. O na hinai ekolu, ekolu ia la.
- 19 I na la ekolu, e hookiekie aku o Parao i kou poo mai ou aku, a e kaawe aku hoi ia oe iluna o ka laau; a e ai mai na manu i kou io.
- 20 A i ke kolu o ka la, i ka la o Parao i hanau ai, hana iho la ia i ka ahaaina na na kauwa ana a pau: hookiekie ae la ia i ke poo o ka luna lawe kiahia a me ka luna kahuai, mawaena o na kauwa ana.
- 21 Hoihoi aku la ia i ka luna lawe kiahia i kona lawe kiahia ana; a haawi aku la ia i ke kiahia i ko Parao lima.
- 22 Kauaku la ia i ka luna kahuai iluna, e like me ka Iosepa hai ana mai ia laua.
- 23 Aole hoi i hoomanao mai ka luna lawe kiahia ia Iosepa, aka, hoopoina iho la ia ia.

41

- ¹ MAHOPE o na makahiki elua, moe iho la o Parao, aia hoi, ku iho la ia ma kapa o ka muliwai.
- ² Aia hoi, hoea mai la, mai loko mai o ka muliwai, ehiku bipi maikai, kaha ke kino, ai iho la lakou ma kahi weuweu.
- ³ Hoea hou mai la, mahope mai o lakou, mai loko mai o ka muliwai, ehiku bipi inoino, a olala ke kino, a ku pu mai la lakou me kela mau bipi, ma kapa o ka muliwai.
- ⁴ Ai iho la na bipi ehiku inoino a olala ke kino, i na bipi maikai a kaha ke kino; a hikilele mai o Parao.
- ⁵ Hiamoe hou iho la ia, a loaa ka moe, aia hoi, hua mai la na opuu palaoa ehiku i ke kumu hookahi, he ohaha a he maikai.
- ⁶ Aia hoi, hua hou mai la mahope mai o lakou, na opuu hou ehiku, he wiwi, a mae i ka makani mai ka hikina mai.
- ⁷ Ai iho la na opuu wiwi ehiku i na opuu ehiku i ohaha a nui. A hikilele mai la o Parao, aia hoi, he moe nana.
- ⁸ A ao ae la anoninoni iho la kona naau; hoouna aku la ia e kii i na kilo a pau o Aigupita, a me na kanaka naauao a pau o ia wahie; a hai aku la o Parao ia lakou i kana mau moe; aohe mea nana i hoakaka mai i ke ano o ua mau moe nei a Parao.
- ⁹ Alaila olelo aku la ka luna lawe kiaha ia Parao, i aku la, Ke hoomanao nei au i keia la i kuu hewa.
- ¹⁰ Mamua, huhu mai o Parao i kana mau kauwa, a hahao aku la ia maua me ka luna kahuai iloko o ka halepaahao, i kahi o ka luna koa.

- ¹¹ I ka po hookahi no, moe iho la maua i ka moe,
owau a me kela, e like me ka hoike ana mai
i ka moe ana i moe ai.
- ¹² Ilaila kekahī kanaka opiopio me maua, he
Hebera, he kauwa ia na ka luna koa; hai aku
la maua ia ia, a hai mai la kela ia maua i ke
ano o ka maua mau moe. He oiaio ke ano
ana i hoike mai ai ia maua.
- ¹³ E like me kana i hoike mai ai, oiaio no ia.
Hoihoiia mai au i ko'u wahi, a kaaweia kela.
- ¹⁴ Alaila hoouna aku la o Parao, e kii ia Iosepa:
hoolalelale ae la lakou ia ia, mai kahi paa
mai; kahi ae la oia i ka umiumi, komo iho
la ia i ke kapa hou, a hele aku la io Parao la.
- ¹⁵ Olelo mai la o Parao ia Iosepa, Ua moe au i ka
moe, aohe mea nana e hoakaka mai ke ano,
ua lohe au nou, aia lohe oe i ka moe, e hiki
ia oe ke hai i ke ano.
- ¹⁶ Olelo aku la o Iosepa ia Parao, iaku la, Aole na'u
ia, na ke Akua no e hai lokomaikai mai ia
Parao.
- ¹⁷ Iaku la o Parao ia Iosepa, Ma kuu moe ana, ku
aku la au ma kapa o ka muliwai.
- ¹⁸ Aia hoi, hoea mai la, mai loko mai o ka muliwai,
ehiku bipi kaha a maikai ke nana aku, a ai
ihohi la ma kahi weuwewu.
- ¹⁹ Aia hoi, hoea hou mai la, mahope mai o lakou
na bipi ehiku he wiwi, a inoino loa ke nana
aku, olala ke kino, aole i ikeia ka mea e like
me lakou ma ka aina a pau o Aigupita, no ka
ino.
- ²⁰ Ai iho la na bipi wiwi a olala, i na bipi kaha ehiku
i hoea mua mai ai.

- ²¹ A komo iho la lakou iloko o ko lakou opu, aole hoi i ikeia ko lakou komo ana iloko o ka opu, no ka mea, ua mau no ko lakou ino, e like mamua. A hikilele ae la au.
- ²² A ike aku la au ma kuu moe, aia hoi, ehiku opuu palaoa ma ke kumu hookahi, he ohaha a he maikai.
- ²³ Aia hoi, kupu hou mai la mahope mai o lakou, ehiku opuu hou, he mimino, he wiwi, a mae i ka makani mai ka hikina mai.
- ²⁴ Pau ae la na opuu ohaha maikai ehiku i na opuu wiwi. A hai aku la au i ka poe akamai, aohe mea nana i hoakaka mai.
- ²⁵ Olelo aku la o Iosepa ia Parao, O ka moe a Parao, hookahi no ia; ua hoike mai ke Akua ia Parao i kana mea e hana mai ana.
- ²⁶ O ua mau bipi maikai la ehiku, ehiku ia makahiki; a o ua mau opuu palaoa maikai la ehiku, ehiku ia makahiki; hookahi no ia moe.
- ²⁷ A o ua mau bipi wiwi inoino la ehiku, i ea mai ai mahope o lakou, ehiku ia makahiki; a o na opuu palaoa wiwi a mae i ka makani no ka hikina mai, ehiku makahiki ia o ke kau wi.
- ²⁸ Eia no ka'u mea i hai aku ai ia Parao: ua hoike mai ke Akua ia Parao i kana mea e hana mai ana.
- ²⁹ Aia hoi, e hiki mai ana na makahiki ehiku, he mau makahiki ai nui ma ka aina a pau o Aigupita.
- ³⁰ A mahope iho o lakou, e hiki mai auanei na makahiki ehiku e wi ai, a e poinaia auanei ke ola a pau, ma ka aina i Aigupita, e oki loa ka aina i ka wi.

- 31 Aole e ikeia ke ola ma ka aina, no ka wi e hiki ana mahope, no ka mea, e kaumaha loa ia.
- 32 Ua papaluia ka moe a Parao, no ka mea, ua paa ia manao o ke Akua, a ua kokoke e hana io mai no ke Akua.
- 33 No keia mea, pono e imi o Parao i kekahi kanaka naauao a me ke akamai, a e hoonoho ia ia maluna o ka aina o Aigupita a pau loa.
- 34 E pono ia Parao e hoomakaukau, a e hoonoho i poe luna no ka aina, a e ohi lakou i ka hapalima o ka ai ma ka aina o Aigupita, ia mau makahiki momona ehiku:
- 35 A e hoiliili mai lakou i ka ai a pau o na makahiki maikai e hiki mai ana, a e hoahu mai i palaoa malalo o ka lima o Parao, a e malama hoi lakou i ka ai iloko o na kulanakauhale.
- 36 He ai malama ia no ka aina, no na makahiki wi ehiku, e hiki mai ana ma ka aina o Aigupita, i make ole ai ka aina i ka wi.
- 37 Ua maikai ia mea i ka maka o Parao, a i ka maka o kana mau kauwa a pau.
- 38 Olelo ae la o Parao i kana mau kauwa, E loaa anei ia kakou kekahi kanaka e like me ia nei, ke kanaka iloko ona ka Uhane o ke Akua?
- 39 A olelo aku la o Parao ia Iosepa, No ka mea, ua hoike mai ke Akua ia mea a pau ia oe, aohe mea e ae e like me oe, ka naauao a me ke akamai.
- 40 O oe no maluna o ko'u hale, a ma kau olelo e hoolohe ai ko'u kanaka a pau, aka, o ka nohoalii wale no ka'u maluna ou.

- ⁴¹ Olelo aku la o Parao ia Iosepa, E nana oe,
ua hoonoho au ia oe maluna o ka aina o
Aigupita a pau.
- ⁴² Unuhi aku la Parao i ke komo ona, mai kona lima
aku, a hookomo aku la i ka lima o Iosepa, a
kahiko ae la oia ia ia i ka lole keokeo maikai,
a hoolei aku la i ka lei gula ma kona a-i.
- ⁴³ Hooholoholo iho la oia ia ia ma ka lua o ke kaa
ona, hea mai la lakou imua ona, E kukuli
ihoh. Hoonoho aku la oia ia ia maluna o ka
aina a pau o Aigupita.
- ⁴⁴ I aku la o Parao ia Iosepa, Owau no o Parao. A
i ole oe e ae aku, aole loa e hapai kekahi
kanaka i kona lima, a me kona wawae, ma
ka aina a pau o Aigupita.
- ⁴⁵ Kapa aku la o Parao i ka inoa o Iosepa, o Sape-
napanaea; a haawi aku la oia ia Asenata, i ke
kaikamahine a Potipera a ke kahuna o Ona,
i wahine nana. A hele aku la o Iosepa a puni
ka aina o Aigupita.
- ⁴⁶ He kanakolu ko Iosepa mau makahiki, i ka wa
ana i ku ai imua o Parao o ke alii o Aigupita.
A hoi aku la o Iosepa mai ke alo aku o Parao,
a hele aku la i ka aina o Aigupita a pau.
- ⁴⁷ A i na makahiki ai ehiku, hua mai la ka hua o ka
honua a nui loa.
- ⁴⁸ Hoiliili mai la ia i ka ai a pau o na makahiki
ehiku ma ka aina o Aigupita, a waiho iho la
ia i ka ai maloko o na kulanakauhale, o ka ai
o na mahinaai e pili ana i ua kulanakauhale
la; waiho iho la ia maloko olaila.

- 49 Hoiliili mai la o Iosepa i ka palaoa e like me ke one o ke kai ka nui loa, a oki iho la ka helu no ka hiki ole ke helu aku.
- 50 A hanau iho la ka Iosepa mau keikikane elua, mamua o ka hiki ana o na makahiki wi, na Asenata, ke kaikamahine a Potipera a ke kahuna o Ona i hanau nana.
- 51 Kapa aku la o Iosepa i ka inoa o ka hiapo, o Manase, no ka mea, ua haawi mai ke Akua ia'u i ka hoopoina i ko'u luhi, a me na mea a pau o ka hale o ko'u makuakane.
- 52 A o ka inoa o ka muli mai, kapa aku la ia, o Eperaima: No ka mea, ua hoopalahalaha mai ke Akua ia'u, ma ka aina o ko'u popilikia.
- 53 Pau ae la na makahiki momona ehiku i hiki mai ai ma ka aina o Aigupita.
- 54 Alaila, hiki mai la na makahiki wi ehiku, e like me ka Iosepa i olelo mai ai. He wi no ma na aina a pau, aka, he ai ma na aina a pau i Aigupita.
- 55 Oki loa iho la ka aina a pau i Aigupita, i ka wi, a uwe aku la na kanaka ia Parao i ka ai. Olelo aku la o Parao i na kanaka a pau o Aigupita, O hele aku io Iosepa la; a i kana olelo ana mai ia oukou, malaila aku oukou.
- 56 A ua puni i ka wi na aina a pau; a wehe ae la o Iosepa i na halepapaa a pau, a kuai aku la na na kanaka o Aigupita; a ikaika nui mai la ka wi ma ka aina o Aigupita.

⁵⁷ A hele mai la ko na aina a pau i Aigupita io Iosepa la e kuai: no ka mea, ua nui loa ka wi ma na aina a pau.

42

¹ A IKE ae la o Iakoba, he ai ma Aigupita, olelo aku la o Iakoba i kana poe keikikane, O ke aha ka oukou e nana aku nei, kekahī i kekahī?

² Olelo aku la ia, Aia hoi, ua lohe au, ho ai ma Aigupita, E iho aku oukou ilaila, e kuai i ai na kakou, i ola kakou, aole e make.

³ Hele aku la ka poe kaikuaana o Iosepa he umi ilalo i Aigupita e kuai i ai.

⁴ A o Beniamina, ke kaikaina o Iosepa, aole o Iakoba i hoouna aku ia ia me kona poe kaikunana, no ka mea, i olelo iho la ia, O poino kela.

⁵ Hele pu ae la na keiki a Israela iwaena o ka poe hele, e kuai i ai, no ka mea, ua wi loa ka aina o Kanaana.

⁶ O Iosepa no ke kiaaina olaila, a nana no i kuai na na kanaka a pau o ia aina. Hele mai la ka poe kaikuaana o Iosepa, a kulou iho la lakou imua ona, me na maka i ka honua.

⁷ A nana aku la o Iosepa i kona poe kaikuaana, ike ae la oia ia lakou, a hoohuahualau aku oia ia lakou, olelo koikoi aku la oia ia lakou, i aku la ia lakou, Nohea mai oukou? Olelo mai la lakou, No ka aina o Kanaana mai, e kuai i ai.

⁸ Ua ike no o Iosepa i kona poe kaikuaana, aole nae lakou i ike ia ia.

- ⁹ Hoomanao iho la o Iosepa i na moe ana i moe ai no lakou, i aku la oia ia lakou, He poe kiu oukou; ua hele mai oukou e nana i ka hemahema o ka aina.
- ¹⁰ Olelo mai la lakou ia ia, Aole ia, e kuu haku. I hele mai kau poe kauwa e kuai i ai.
- ¹¹ He poe keiki makou a pau na ke kanaka hookahi; he poe kanaka pono, aole he poe kin makou o kau poe kauwa.
- ¹² Olelo aku la ia ia lakou, Aole, ua hele mai nei oukou e nana i ka hemahema o ka aina.
- ¹³ Olelo mai la lakou, O kau poe kauwa, he umi makou a me kumamalua o ko makou hanauna, na keiki a ke kanaka hookahi i ka aina o Kanaana, aia hoi ka muli loa i keia la me ka makuakane o makou, a o kekahī hoi, aole ia.
- ¹⁴ Olelo aku la o Iosepa ia lakou, Oia hoi ka'u i olelo aku nei ia oukou, he poe kiu oukou.
- ¹⁵ I keia mea e ikeia ai oukou, ma ke ola o Parao, aole oukou e hoi aku, ke hiki ole mai ko oukou kaikaina.
- ¹⁶ E hoouna ae i kekahī o oukou e kii i ko oukou kaikaina, a e paa oukou, i ikeia ka oukou olelo a me ka pono io o oukou, aka, i ole, ma ke ola o Parao, he poe kiu io no oukou.
- ¹⁷ A hoakoakoa mai la oia ia lakou a pau iloko o kahi paa, a ekolu la.
- ¹⁸ A i ka po akolu, olelo aku la o Iosepa ia lakou, E hana oukou i keia, i ola oukou; ua makau wau i ke Akua.
- ¹⁹ Ina he poe kanaka pono oukou, e paaia kekahī o oukou i ka halepaahao: e hoi aku oukou e halihali i ai na ka wi o ko oukou mau hale:

- ²⁰ A e lawe mai i ko oukou kaikaina io'u nei, pela e oiaio ai ka oukou olelo, alaila, aole oukou e make. Hana mai la lakou pela.
- ²¹ Olelo ae la lakou kekahī i kekahī, Ua hewa io kakou i ko kakou kaikaina, no ka mea, ua ike kakou i ka ehaeha o kona naau, i ka manawa ana i noi mai ai ia kakou, aole kakou i hoolohe aku; no ia mea, ua hiki mai keia popilikia io kakou nei.
- ²² A olelo aku la o Reubena ia lakou, i aku la, Aole anei au i olelo aku ia oukou, i ka i ana aku, Mai hana hewa aku i ke keiki? Aole oukou i hoolohe mai. Aia hoi, no ia mea, ua imiia mai ko ia la koko.
- ²³ Aole i ike lakou ua lohe pono o Iosepa ia lakou, no ka mea, ua olelo aku oia ia lakou, ma ke kanaka hoohalike olelo.
- ²⁴ Haliu aku la ia, mai o lakou la, a uwe iho la; haliu hou mai la oia ia lakou, kamailio pu me lakou, a lawe mai la oia ia Simeona, mai o lakou mai la, a hana paa iho la ia ia mamua o ko lakou mau maka.
- ²⁵ Alaila, kauoha aku la o Iosepa, e uhao i ka ai i na eke a lakou a piha, a e hoihoi i ka moni a lakou iloko o ka lakou mau eke, a e haawi aku i o na lakou no ke alanui. Pela oia i hana aku ai ia lakou.
- ²⁶ Hooili ae la lakou i ka ai iluna iho o ko lakou mau hoki, a hele aku la.
- ²⁷ A i ka wehe ana o kekahī i kana eke, e haawi aku i ai na kona hoki, ma kahi oioina, ike ae la ia i kana moni, no ka mea, aia hoi ia ma ka waha o kana eke.

- 28 A olelo aku la ia i kona poe hoahanau, E, ua hoi-hoia mai ka'u moni; eia hoi ia iloko o ka'u eke. Hikilele iho la ko lakou naau, haalulu iho la lakou, i aku la kekahī i kekahī, Heaha keia mea a ke Akua i hana mai ai ia kakou?
- 29 A hiki lakou io Iakoba la, i ko lakou makuakane i ka aina o Kanaana, hai aku la lakou ia ia i na mea a pau i loaa'i ia lakou; i aku la,
- 30 O ke kanaka, ka haku o ka aina i olelo koikoi mai ai ia makou; ua kuhi mai kela ia makou, he poe kiu no ka aina.
- 31 A olelo aku la makou ia ia, He poe pono makou; aohe makou he kiu.
- 32 He poe hanauna makou, he umi a me kumamalua, na keiki a ko makou makuakane; aole kekahī, a o ka muli loa, aia no ia i keia la me ko makou makuakane, i ka aina o Kanaana.
- 33 A o ke kanaka, ka haku o ka aina, olelo mai la ia makou, I keia mea e ikeia'i he poe kanaka pono oukou, E waiho mai oukou i kekahī hoahanau o oukou me au, a e lawe i ai na ka wi o ko oukou mau hale, a e hoi aku:
- 34 A e lawe mai oukou i ko oukou kaikaina io'u nei; alaila, ike au ia oukou, aohe kiu, he poe kanaka maikai no oukou; a e kuu aku au ia oukou i ko oukou hoahanau, a e kuai oukou iloko o keia aina.
- 35 A i ka ninini ana aku a lakou i ka lakou mau eke, aia hoi, iloko o na eke a lakou, ka lakou mau laulau moni a pau. A ike ae la lakou a me ko lakou makuakane i na laulau moni, makau nui iho la lakou.

- ³⁶ A olelo mai la o Iakoba ko lakou makuakane ia lakou, Ua hoonele mai oukou ia'u i ka'u mau keiki. O Iosepa, aole ia, a o Simeona, aole ia, a e lawe aku ana oukou ia Beniamina. Ke pale mai nei keia mau mea a pau ia'u.
- ³⁷ Olelo aku la o Reubena i kona makuakane, i aku la, E pepehi mai oe i ka'u mau keiki elua, ke hoihoi ole mai au ia ia nei iou la; e haawi mai oe ia ia nei i kuu lima, na'u ia e hoihoi hou mai iou la.
- ³⁸ Olelo mai la ia, Aole e iho aku ka'u keiki me oukou ilaila, no ka mea, ua make kona kaikuaana, oia nei wale no koe: ina poino keia, ma ke alanui a oukou e hele ai, alaila, lawe iho oukou i ko'u oho hina i ka lua me ke kaniuhu.

43

- ¹ A OKI loa iho la ka aina i ka wi.
- ² A pau i ka aiia e lakou ka ai a lakou i lawe mai ai, mai Aigupita mai, olelo mai la ko lakou makuakane ia lakou, O hele hou oukou, e kuai i wahi ai iki na kakou.
- ³ A olelo aku la o Iuda ia ia, i aku la, Ua olelo ikaika mai ua kanaka la ia makou, ua i mai, Aole oukou e ike i kuu maka, ke hele ole mai ko oukou kaikaina me oukou.
- ⁴ A i hoouna oe i ko makou kaikaina me makou, alaila, hele aku makou ilalo, e kuai i ai nau.
- ⁵ Aka, i hoouna ole oe ia ia, aole makou e hele aku ilalo, no ka mea, ua olelo mai ua kanaka la ia makou, Aole oukou e ike i kuu maka, ke hele ole mai ko oukou kaikaina me oukou.

- ⁶ Olelo mai la o Iseraela, No ke aha la onkou i hana
ino mai ai ia'u, i ka hai aku i ua kanaka la i
ko oukou kaikaina?
- ⁷ Olelo aku la lakou, I ninau ikaika mai no
ua kanaka la ia makou, i ko makou hoa-
hanaau, i mai la, Ke ola la no anei ko oukou
makuakane? He kaikaina e anei, ko oukou?
A hai aku la makou ia ia ma ke ano o keia
mau olelo. Ua ike pono anei makou, e i
mai ana ia, E lawe mai ilalo nei i ko oukou
kaikaina?
- ⁸ Olelo aku la o Iuda ia Iseraela i kona makuakane,
E kuu mai oe i ke keiki me au, alaila ku ae
makou e hele aku; i ola kakou; aole e make
o makou, a o oe, a me ka kakou poe kamalii.
- ⁹ Owau no ka panai nona; ma ko'u lima, e imi mai
oe ia ia; i hoihoi ole mai au ia ia iou la, a e
hoonoho ia ia mamua ou, no'u mau loa aku
no ka hewa.
- ¹⁰ Ina aole makou i hookaulua, ina ua hoi hou mai
makou, mai ka lua o ka hele ana.
- ¹¹ Olelo aku la ko lakou makuakane o Iseraela ia
lakou, Ina pela mai, e hana i keia; e ahu
i ko ka aina hua maikai iloko o ka oukou
mau eke, a e lawe aku ilalo i makana na ua
kanaka la; i wahi bama iki, a i wahi meli
iki, a i mea ala kahi, a me ka mura, a i hua
pisetakia, a i alemona.
- ¹² A e papalua i na kala ma ko oukou lima; a o ke
kala i hoihoiia mai, maloko o ka waha o ka
oukou mau eke, e halihali hou aku oukou ia
mea, i ko oukou mau lima; malia paha, aole
i ikeia.
- ¹³ E lawe aku hoi oukou i ko oukou kaikaina, a e ku
nui iluna, e hele hou aku i ua kanaka la.

¹⁴ A na ke Akua mana loa e haawi mai ke aloha no oukou mamua o ua kanaka la, i kuu mai ia i kela hoahanau o oukou, a ia Beniamina hoi A i nele au i kuu mau keiki, ua nele au.

¹⁵ Lawe ae la na kanaka i ua makana la, a lawe papalua no hoi lakou i ke kala ma ko lakou lima, a ia Beniamina hoi; ku ae la lakou, a hele aku la ilalo i Aigupita, a ku aku la imua o Iosepa.

¹⁶ A ike mai la o Iosepa ia Beniamina me lakou, olelo ae la ia i ka luna o kona hale, E alakai oe i keia poe kanaka i ka hale, e kalua i holoholona, a e hoomakaukau hoi; no ka mea, e ai pu keia poe kanaka me au i ke awakea.

¹⁷ Hana mai la ke kanaka e like me ka Iosepa olelo ana ae; a alakai aku la ia i ua poe kanaka la, iloko o ka hale o Iosepa.

¹⁸ Makau iho la ua poe kanaka la, no ka mea, ua alakaiia'ku la lakou iloko o ka hale o Iosepa, a olelo ae la lakou, No ka moni i hoihoiia'i iloko o ka kakou mau eke i ka manawa mamua, nolaila kakou i alakaiia mai ai iloko nei, i hoolawehala mai oia ia kakou a lele mai iluna o kakou, a e hana paa hoi ia kakou, i poe kauwa, a me ko kakou mau hoki.

¹⁹ Hookokoke aku la lakou i ka luna o ko Iosepa hale, a kamailio pu lakou me ia ma ka puka o ka hale;

²⁰ I aku la lakou, E kuu haku e, i ko makou hele ana mai mamua, ua hele mai makou e kuai i ai.

- ²¹ A hiki aku la makou i kahi oioina, wehe ae la makou i ka makou mau eke, aia hoi ka moni a pau a makou iloko o ka waha o na eke a makou. A ua halihali hou mai makou ia mea ma ko makou mau lima.
- ²² A ua halihali mai no hoi makou ilalo nei i na moni e ae ma ko makou mau lima e kuai i ai; aole ike makou i ka mea nana i waiho ka moni a makou iloko o ka makou mau eke.
- ²³ Olelo mai la kela, Aloha oukou, mai makau; na ko oukou Akua, ke Akua o ko oukou makuakane, nana i haawi ka waiwai na oukou iloko o ka oukou mau eke: ua hiki mai ka oukou moni ia'u. Alakai mai la oia ia Simeona io lakou la.
- ²⁴ Alakai ae la ua kanaka la i ka poe kanaka iloko o ko Iosepa hale, a haawi mai la ia lakou i ka wai, holoi iho la lakou i ko lakou mau wawae, a haawi mai la hoi ia i ai na na hoki o lakou.
- ²⁵ Hoomakaukau iho la lakou i ka makana i ka hele ana mai o Iosepa i ke awakea; no ka mea, ua lohe lakou, e ai ana lakou i ka ai ilaila.
- ²⁶ A hoi mai la o Iosepa i kona hale, halihali mai la lakou iloko o ka hale i ka makana nana, na ko lakou lima i paa ai, a kulou iho la lakou imua ona ilalo i ka honua.
- ²⁷ Ninau mai la ia ia lakou i ko lakou noho ana, i aku la, Pehea ko oukou makuakane, o ka elemakule a oukou i olelo mai ai? Ke ola la no ia, ea?
- ²⁸ Olelo aku la lakou, E noho pomaikai ana no kau kauwa, ka makuakane o makou, ke ola la no ia. A kulou iho la lakou a moe ilalo.

- ²⁹ Alawa ae la kona maka iluna, ike mai la i kona kaikaina ia Beniamina, ke keiki a kona makuwahine ponoi, a i mai la ia, O ko oukou kaikaina anei keia, a oukou i olelo mai ai ia'u? A olelo ae la hoi ia, E aloha mai ke Akua ia oe, e kuu keiki.
- ³⁰ Wikiwiki ae la o Iosepa; no ka mea, ua mokumokuahua kona manawa i kona kaikaina, imi ae la ia i kahi e uwe ai; komo ae la ia i kona keena maluna, a uwe iho la ilaila.
- ³¹ Holoi ae la ia i kona maka, hele aku la iwaho, a uumi iho la ia i kona aloha, a olelo aku la, E ho mai i ka ai.
- ³² Kau mai la lakou nana ma ke kaawale, a na lakou ma ke kaawale, a na ko Aigupita i ai pu me ia ma ke kaawale; no ka mea, aole e hiki i ko Aigupita, ke ai pu me na Hebera, he mea haumia ia i ko Aigupita.
- ³³ Noho iho la lakou imua ona, o ka hiapo e like me kona hanau mua ana, a o ka muli loa e like me kona hanau muli ana mai. Kahaha iho la ko lakou naau kekahī i kekahī.
- ³⁴ Lalau ae la ia i ka ai a haawi aku la ia lakou, mai kona alo aku, ua palimaia ka Beniamina i ka lakou. Inu pu lakou a olioli me ia.

44

- ¹ A KAUOHA aku la ia i ka luna o kona hale, i aku la, E uhao i ka ai iloko o na eke a ua mau kanaka la a piha, a e waiho i ka moni a lakou a pau maloko o ka waha o ka lakou mau eke.
- ² A e uhao hoi i kuu kiahā, i ke kiahā kala maloko o ka waha o ka eke a ka mea opio opio loa, a me

kana moni no ka ai. Hana mai la kela ma ka olelo a Iosepa i olelo aku ai.

³ A ao ae la, ua hoihoia'ku la ua poe kanaka la, a me ko lakou mau hoki.

⁴ A puka aku la lakou mawaho o ke kulananakauhale, aole i hiki i kahi loihī, alaila olelo aku la o Iosepa i kana luna, E ku oe, e alualu aku i ua poe kanaka la, a loaa lakou ia oe, e iaku ia lakou, No ke aha oukou i hoihoi mai ai i ka hewa no ka pono?

⁵ Aole anei keia o ka mea a ka'u haku i inu ai iloko? a i kilo ai hoi? Ua hewa oukou i ka hana ana pela.

⁶ A hiki aku la ia io lakou la, olelo aku la ia ia lakou i keia mau olelo.

⁷ Ninau mai la lakou ia ia, No ke aha la i olelo mai ai kuu haku i keia olelo? Aole loa e hiki i kou poe kauwa ke hana e like me ia.

⁸ Eia hoi, o ka moni a makou i loaa'i iloko o ka waha o ka makou mau eke, ua halihali hou mai makou ia nei ia oe mai loko mai o ka aina o Kanaana, Pehea hoi makou i aihue ai i ke kala, a i ke gula, noloko mai o ka hale o kou haku?

⁹ A i ikeia ia mea i kekahī o kou poe kauwa, e make ia, a e lilo makou i poe kauwa na kou haku.

¹⁰ Olelo aku la ia, Ae, e like me ka oukou olelo, pela no ia: o ka mea ua loaa me ke kiahā, e lilo ia i kauwa na'u, a e hala ole oukou.

¹¹ Kuu koke iho la lakou a pau i ka lakou mau eke ilalo i ka honua, a wehe ae la lakou i ka lakou mau eke.

- 12 A imi iho la kela, a hoomaka iho la ma ka hiapo,
a oki ae la ma ka muli loa, a loaa mai la ke
kiahā ma ka eke a Benamina.
- 13 Alaila haehae iho la lakou i ko lakou mau kapa,
a kau aku la kela kanaka keia kanaka i
ka ukana ma kana hoki, a hoi aku la i ke
kulananakauhale.
- 14 A hele aku la o Iuda a me kona poe hoahanau
i ka hale o Iosepa, aia no ia; a moe iho la
lakou imua ona ilalo i ka honua.
- 15 Ninau aku la o Iosepa ia lakou, Heaha keia mea
a oukou i hana mai nei? Aole anei oukou i
ike, e hiki i ke kanaka me a'u nei e kilokilo
aku?
- 16 Olelo aku la o Iuda, Pehea la makou e pane aku
ai ia oe, e kuu haku? Heaha ka makou e
olelo aku ai? Pehea makou e hoapono ai ia
makou iho? Ua loaa i ke Akua ka hewa o kau
poe kauwa; eia hoi, he poe kauwa makou na
ko'u haku. o makou, a me ka mea i loaa ke
kiahā ma koua lima.
- 17 Olelo mai la o Iosepa, Aole loa e hiki ia'u ke
hana pela; aka, o ke kanaka, i loaa'i ke kiahā
i kona lima, e lilo ia i kauwa na'u: a o
oukou, e hoi aku me ka maluhia i ko oukou
makuakane.
- 18 Alaila neenee aku la o Iuda io na la, i aku la,
Auwe, e kuu haku e! Ina e ae mai kuu haku
i kana kauwa nei, ke hai aku i kekahī olelo
ma kona pepeiao, aole hoi e wela mai kou
huhu i kau kauwa, no ka mea, ua like oe me
Parao.

- ¹⁹ Ninau mai la kuu haku i kau poe kauwa nei, i mai la, He makuakane anei ko oukou, a he kaikaina anei?
- ²⁰ A olelo aku la makou i kuu haku, He makuakane no ko makou, he kanaka kahiko, a me kahi keiki o kona wa elemakule, he mea nuku; a o kona kaikuaana, ua make ia, oia wale no ka i koe a kona makuwahine, a ua aloha kona makuakane ia ia.
- ²¹ A olelo mai la oe i kau poe kauwa, E lawe mai ia ia ilalo io'u nei, i ike aku kuu maka ia ia.
- ²² Alaila olelo aku la makou ia oe i kuu haku, Aole e hiki i ke keiki ke haalele i kona makuakane; no ka mea, ina e haalele ke keiki i kona makuakane, e make no ia.
- ²³ A olelo mai la oe i kau poe kauwa, A i hele ole mai ko oukou kaikaina me oukou, aole oukou e ike hou mai i kuu maka.
- ²⁴ A hiki aku la makou i kau kauwa i ko'u makuakane, hai aku la makou ia ia i ka olelo a kuu haku.
- ²⁵ A olelo mai la ko makou makuakane, O hele hou oukou e kuai i wahi ai iki na kakou.
- ²⁶ Olelo aku makou, Aole loa makou e hiki ke hele ilalo; aka, i hele pu ko makou kaikaina me makou, alaila e hele aku makou ilalo, no ka mea, aole e hiki ia makou ke ike aku i ka maka o ua kanaka la, ke hele pu ole ko makou kaikaina me makou.
- ²⁷ Alaila olelo mai la kau kauwa o ko'u makuakane ia makou, Ua ike oukou, ua hanau mai la ka'u wahine i na keiki elua na'u.
- ²⁸ A hele aku la kekahi mai o'u aku nei, a i aku la au, He oiaio no ua weluwelu ia; aole hoi au i ike hou aku ia ia.

- ²⁹ A i lawe aku oukou ia ia nei, mai o'u aku nei, a loohia ia i ka poino, alaila, e lawe aku oukou i ko'u oho hina ilalo i ka lua me ke kaniuhu.
- ³⁰ No keia mea hoi, ke hiki aku au i kau kauwa i ko'u makuakane, aole ke keiki me makou, ua pai pu ia kona ola me ke ola o ke Keiki;
- ³¹ A ike mai ia, aole ke keiki me makou, alaila, e make ia; a e lawe iho o kau poe kauwa i ke oho hina o kau kauwa o ko makou makuakane ilalo i ka lua me ke kaniuhu.
- ³² No ka mea, ua hoohiki au ia'u iho no ke keiki i ko'u makuakane, ua i aku au, A i hoihoi ole mai au ia ia iou la, no'u mau loa aku no ka hewa imua o ko'u makuakane.
- ³³ No keia mea hoi, e ae mai oe ia'u i noho au, kau kauwa i panai no ke keiki, i kanwa na kuu haku; e hoi aku hoi ke keiki me kona poe kaikuaana.
- ³⁴ No ka mea, peheia la au e hoi aku ai i kuu makuakane, aole ke keiki me au? o ike auanei au i ka mea ino e hiki mai ana maluna o kuu makuakane.

45

- ¹ A LAILA aole e hiki ia Iosepa ke uumi iho i ke aloha iloko ona imua o lako a pau, o ka poe i ku pu mai la me ia: a hea aku la ia, E hele aku na kanaka a pau iwaho, mai o'u aku nei. Aole i noho mai kekahī kanaka me ia, i ka manawa a Iosepa i hoike ai ia ia iho i kona poe hoahanau.
- ² Hooho ae la ia i kona leo me ka uwe nui ana: a lohe ae la na kanaka o Aigupita a lohe pu no ko ka hale o Parao.

- ³ Olelo aku la o Iosepa i kona poe hoahanau, Owau no o Iosepa; ke ola la no anei ko'u makuakane? Aole i hiki ke ekemu iki mai kona poe hoahanau ia ia: no ka mea, makau nui iho lakou imua ona.
- ⁴ A olelo aku la o Iosepa i kona poe hoahanau, E neenee mai oukou io'u nei. A neenee mai la lakou. Olelo aku la ia, Owau no o Iosepa, ko oukou kaikaina a oukou i kuai ai iloko o Aigupita.
- ⁵ Eia hoi, mai hookaumaha oukou, aole hoi e huhu oukou ia oukou iho i ka oukou kuai ana ia'u ia nei. No ka mea, na ke Akua au i hoouna mai mamua o oukou e hoola aku.
- ⁶ No ka mea, ua wi ae nei ka aina i keia mau makahiki elua; a elima hoi makahiki e koe, aole e mahi, aole hoi e ohi mai.
- ⁷ A ua hoouna mai ke Akua ia'u mamua o oukou, e hookoe aku ia oukou ma ka honua, a e hoola ia oukou i ke ola nui.
- ⁸ Aia hoi, aole na oukou i hoouna mai au ia nei, na ke Akua no, a ua hoolilo ae ia ia'u i makuakane no Parao, a i haku no kona hale a pau, a i kiaaina no Aigupita a pau.
- ⁹ E wikiwiki oukou, e hoi aku i ko'u makuakane, a e i aku ia ia, Penei i olelo mai ai kau keiki o Iosepa, Ua hoolilo mai ke Akua ia'u, i haku no ka aina o Aigupita a pau; e hele mai oe ilalo io'u nei, mai hookaulua aku oe.
- ¹⁰ A e noho oe ma ka aina o Gosena, a e kokoke mai oe me au, o oe, a me kau poe keiki, a me kau poe moopuna, a o kau poe hipa a me kau poe holoholona a me kou mea a pau loa.

- ¹¹ Ilaila au e malama'i ia oe: no ka mea, elima makahiki wi a koe; o ilihune oe, a me ko ka hale ou, a me kau mau mea a pau.
- ¹² Aia hoi, ua ike ko oukou mau maka, a me ka maka o ko'u kaikaina, o Beniamina, o ko'u waha no ka i olelo aku ia oukou.
- ¹³ A e hai aku oukou i ko'u makuakane i kuu hanohano a pau ma Aigupita nei, a i na mea a pau a oukou i ike ai: a e wikiwiki oukou e lawe mai i ko'u makuakane ilalo.
- ¹⁴ Kau iho la ia ma ka a-i o kona kaikaina, o Beniamina, a uwe iho la; a uwe iho la hoi o Beniamina ma kona a-i.
- ¹⁵ Honiaku la o Iosepa i kona poe hoahanau a pau, a uwe iho la iluna o lakou. A mahope iho o ia mea, kamailio pu kona poe hoahanau me ia.
- ¹⁶ Lohea iho la keia mea ma ka hale o Parao, oleloia iho la, Ua hiki mai na hoahanau o Iosepa. Ua pono hoi ia i na maka o Parao, a i na maka o kana poe kauwa.
- ¹⁷ Olelo mai la o Parao ia Iosepa, E i aku oe i kou poe hoahanau, E hana peneia, e kau i ko oukou mea ma na hoki a hoi aku a hiki i ka aina o Kanaana.
- ¹⁸ E kii i ko oukou makuakane, a me na mea o ko oukou hale, a e hele mai io'u nei, a na'u no e haawiaku na oukou i ka maikai o ka aina o Aigupita, a e ai hoi oukou i ka momona o ka aina.
- ¹⁹ Ua kauohaia oe, e hana hoi i keia, E lawe i mau kaa no oukou, mai ka aina o Aigupitaaku, no ka oukou kamalii a no ka oukou wahine, a e kii i ko oukou makuakane, a e hele mai.

- 20 Mai aua ko oukou mau maka ma ko oukou mea a pau; no ka mea, no oukou ka maikai o ka aina a pau ma Aigupita.
- 21 A hana iho la na keiki a Iseraela pela; a haawi aku la o Iosepa ia lakou i mau kaa e like me ka olelo a Parao, a haawi no hoi i o na lakou ma ke ala.
- 22 Haawi aku la hoi ia i kapa komo no lakou a pau; a ia Beniamina, haawi aku la oia ia ia, i ekolu haneri moni, a me na kapa komo elima.
- 23 A hoouna aku la ia no kona makuakane, he umi na hoki e lawe ana i na mea maikai o Aigupita, a he umi na hoki wahine, e lawe ana i ka palaoa a me ka ai i o na kona makuakane ma ke alanui.
- 24 Pela hoi i hoouna aku ai oia i kona poe hoahanau, a hoi aku la lakou. Olelo aku ia ia lakou, Mai paio oukou ma ke alanui.
- 25 A hoi aku la lakou, mai waho mai o Aigupita, a hiki aku la i ka aina o Kanaana, ia Iakoba, i ko lakou makuakane.
- 26 A hai aku la lakou ia ia, i aku la, E, ke ola la no o Iosepa, oia ke kiaaina o ka aina o Aigupita a pau. A maule iho la ko Iakoba naau, no ka mea, aole kela i manaoio i ka.
- 27 Alaila, hai aku la lakou ia ia i ka olelo a pau a Iosepa i olelo mai ai ia lakou. A ike aku la ia i na kaa a Iosepa i hoouna mai ai e lawe ia ia, pohala iho la ka naau o ko lakou makuakane.

²⁸ A olelo aku la Israela, Ua nui ia, na ola o Iosepa kuu keiki; e hele aku au e ike ia ia mamua o kuu make ana.

46

- ¹ HELE mai la o Israela me kana mau mea a pau loa, a hiki mai la i Beereseba, a mohai aku la ia i na mohai i ke Akua o kona makuakane o Isaaka.
- ² Olelo mai la ke Akua ia Israela ma ka hihio i ka po, i mai la, E Iakoba, e Iakoba. Iaku la keia, Eia no wau.
- ³ I mai la kela, Owau no ke Akua, o ke Akua o kou makuakane: mai makau oe ke iho ilalo i Aigupita; no ka mea, e hoolilo au ia oe i lahuikanaka nui malaila.
- ⁴ A e iho pu aku no au me oe i Aigupita; e oiaio no hoi, e lawe hou mai au ia oe malaila mai, a e kau no o Iosepa i kona lima ma kou mau maka.
- ⁵ Ala mai la o Iakoba mai Beereseba mai, a lawe ae la na keiki a Israela ia Iakoba, ko lakou makuakane, a me na kamalii, a me ka lakou mau wahine maluna o na kaa a Parao i hoouna aku ai e lawe ia lakou.
- ⁶ Lawe ae la lakou i ka lakou mau holoholona, a me ka waiwai a lakou i loaa ai ma ka aina ma Kanaana, a hele mai i Aigupita; o Iakoba, lakou pu me na keiki ana a pau:
- ⁷ O kana mau keikikane, a me ka lakou mau keikikane me ia, o kana mau kaikamahine, a me na kaikamahine a kana mau keikikane, a me kana mau hua a pau kana i lawe pu mai ai me ia i Aigupita.

- ⁸ Eia na inoa o na keikikane a Iseraela i hele i Aigupita; o Iakoba a me kana mau keikikane: o Reubena, ka Iakoba makahiapo.
- ⁹ A o na keikikane a Reubena; o Hanoka, o Palu, o Hezerona, a o Karemī.
- ¹⁰ O na keikikane a Simeona; o Iemuela, o Iamina, o Ohada, o Iakina, o Zohara, a o Saula, ke keiki a kekahi wahine no Kanaana.
- ¹¹ O na keikikane a Levi; o Geresona, o Kohata, a o Merari.
- ¹² O na keikikane a Iuda; o Era, o Onana, o Sela, o Pareza, a o Zara: aka, make iho la o Era laua o Onana ma ka aina o Kanaana. A o na keikikane a Pareza; o Hezerona a o Hamula.
- ¹³ O na keikikane a Isakara; o Tola, o Puva, o Ioba a o Simerona.
- ¹⁴ O na keikikane a Zebuluna; o Sereda, o Elona a o Iahelela.
- ¹⁵ O lakou na keikikane a Lea, ana i hanau ai na Iakoba ma Padanarama, a me kana kaikamahine o Dina: o kana poe keikikane a pau a me na kaikamahine, he kanakolukumamakolu o lakou.
- ¹⁶ O na keikikane a Gada; o Zipiona, o Hagi, o Suni, o Ezebona, o Eri, o Arodi, a o Areli.
- ¹⁷ O na keikikane a Asera; o Iimena, o Isua, o Isui, o Beria, a o Sera ko lakou kaikuwahine: a o na keikikane a Beria; o Hebera, a o Malekiela,

- ¹⁸ O lakou na keikikane a Zilepa, a Labana i haawi
aku ai i kana kaikamahine ia Lea: a o lakou
kana i hanau ai na Iakoba, he poe umiku-
mamaono.
- ¹⁹ O na keikikane a Rahela a ka wahine na Iakoba:
o Iosepa, a o Beniamina.
- ²⁰ A ua hanau na Iosepa ma ka aina o Aigupita,
o Manase a o Eperaima, a Asenata a ke
kaikamahine na Potipera ke kahuna no
Ona, i hanau ai nana.
- ²¹ A o na keikikane a Beniamina; o Bela, o Bekera,
o Asebelia, o Gera, o Naamana, o Ehi, o Rosa,
o Mupima, o Hupima, a o Areda.
- ²² O lakou na keiki a Rahela i hanau na Iakoba: a o
lakou a pau, he umikumamaha.
- ²³ O na keikikane a Dana; o na Husima.
- ²⁴ O na keiki a Napetali; o Iahezela, o Guni, o
Iezera, a o Silema.
- ²⁵ O lakou na keikikane a Bileha, a Labana i haawi
aku ai na Rahela na kana kaikamahine; a
hanau mai la oia ia laua na Iakoba: a o
lakou a pau, ehiku lakou.
- ²⁶ O na kanaka a pau i hele pu me Iakoba i
Aigupita, o ka poe mai loko mai o kona
puhaka; kanaono lakou, a me kumamaono,
aoles hoi i heluia na wahine a kana mau
keiki.
- ²⁷ A o na keiki a Iosepa, i hanauia nana ma
Aigupita, elua laua. O na kanaka a pau
ma ka hale o Iakoba i hele mai i Aigupita,
kanahiku lakou.

- 28 A hoouna aku la oia ia Iuda, mamua ona io Iosepa la, e kuhiknhi aku mamua ona i Gosena; a hiki mai la lakou i ka aina o Gosena.
- 29 A hoomakaukau ae la o Iosepa i ke kaa ona, piiaku la ia e halawai me Israela, me kona makuakane i Gosena, a ike aku la oia ia ia, kau iho la ia ma kona a-i, a uwe iho la ma kona a-i, a liuliu wale.
- 30 Olelo aku la o Israela ia Iosepa, Ano, e pono ia'u ka make, no kuu ike ana i kou maka, no ka mea, e ola ana oe.
- 31 Olelo aku la o Iosepa i kona poe hoahanau a me ka poe o kona makuakane, E, e pii aku au, e hoakaka aku ia Parao, a e hai aku au ia ia; O ko'u poe hoahanau, a me ka poe o ko'u makuakane i noho ai i ka aina o Kanaana, ua hele mai io'u nei:
- 32 He poe kanaka malama hipa lakou, he poe kanaka hanai holoholona, a ua hele mai lakou me ka lakou hipa, a me ka lakou holoholona, a me ka lakou mea a pau.
- 33 A hiki i ka wa e hea mai ai o Parao ia oukou, a e ninau mai, Heaha ka oukou oihana?
- 34 Alaila, e olelo aku, He poe kanaka hanai holoholona kau mau kauwa nei, mai ka wa kamalii mai, o makou, a me ko makou poe makua: i noho ai oukou ma ka aina, ma Gosena, no ka mea, he haumia i ko Aigupita, na kahuhipa a pau.

47

¹ HELE ae la o Iosepa, hai aku la ia Parao, i aku la, Ua hiki mai nei ko'u makuakane a me ko'u

poe hanauna, a me ka lakou hipa, a me ka lakou holoholona, a me ka lakou mea a pau, mai ka aina mai o Kanaana, aia hoi lakou ma ka aina, i Gosena.

- ² Lawe ae la ia i elima o kona poe hanauna, hoonoho iho la ia lakou imua o Parao.
- ³ Olelo mai la o Parao i na hoahanau o Iosepa, Heaha ka oukou oihana? I mai la lakou ia Parao, He poe kahuhipa kau poe kauwa nei, o makou a me ko makou poe makua.
- ⁴ I hou mai la lakou ia Parao, Ua hele mai nei makou e noho ma keia aina, no ka mea, aole ai na ka poe holoholona a kau poe kauwa, no ka nui o ka wi ma ka aina o Kanaana. No ia mea, ke noi aku nei makou ia oe, e noho makou ma ka aina i Gosena.
- ⁵ A olelo mai la o Parao ia Iosepa, i mai la, Ua hiki mai iou la kou makuakane a me na hoahanau ou.
- ⁶ O ka aina o Aigupita, eia no ia imua ou: i ka aina maikai nui, e hoonoho ai oe i kou makuakane a me na hoahanau ou: e noho iho lakou i ka aina o Gosena. A ina i ike oe i na kanaka akamai o lakou, e hoonoho oe ia lakou i mau kahu no ka'u poe holoholona,
- ⁷ Alakai mai la o Iosepa ia Iakoba i kona makuakane, a hoonoho mai la ia ia imua o Parao. Hoomaikai aku la o Iakoba ia Parao.
- ⁸ Ninau mai la o Parao ia Iakoba, Ehia la na makahiki o kou ola ana?
- ⁹ I aku la o Iakoba ia Parao, O na la o ko'u mau makahiki i noho malihini ai, hookahi ia haneri makahiki a me kanakolu. He hapa a he ino hoi na la o ko'u mau makahiki e ola nei; aole nae i loaa ia'u na la a me na

makahiki o ko'u poe kupuna i ko lakou noho malihini ana.

¹⁰ Hoomaikai aku la o Iakoba ia Parao, a hele aku la mai ke alo aku o Parao.

¹¹ Hoonoho iho la o Iosepa i kona makuakane a me kona poe hoahanau, a haawi aku la oia ia lakou i wahi e noho ai ma ka aina o Aigupita, i kahi aina maikai, i ka aina o Ramese, e like me ke kanoha ana mai a Parao.

¹² Malama aku la o Iosepa i kona makuakane, a me kona poe hoahanau, a me ka ohana a kona makuakane a pau i ka ai, e like me na waha o ka ohana.

¹³ Aole ai ma ka aina a pau, no ka mea, ua hanahana loa ka wi. Oki loa iho la ka aina o Aigupita a me ka aina o Kanaana i ka wi.

¹⁴ Hooiliili iho la o Iosepa i ke kala a pau loa ma ka aina o Aigupita, a ma ka aina o Kanaana, no ka ai a lakou i kuai ai; a lawe mai la o Iosepa i ke kala iloko o ka hale o Parao.

¹⁵ Pau iho la ko kala ma ka aina o Aigupita, a ma ka aina o Kanaana, a hele mai la ko Aigupita a pau io Iosepa la, i mai la, Ho mai i ai na makou, no ke aha la makou e make ai imua o kou alo i ka pau ana o ke kala?

¹⁶ I mai la Iosepa ia lakou, Ina i pau ke kala, ho mai i ka oukou holoholona, a e haawi aku au i ai na oukou no ka oukou holoholona.

¹⁷ Lawe mai la lakou i ka lakou holoholona ia Iosepa, a haawi aku la o Iosepa i ai na iakou, no na lio, a no na hipa, a no na bipi, a no na

hoki, a malama aku la oia ia lakou i ka ai ia makahiki, no ka lakou holoholona.

¹⁸ A pau ae la ia makahiki, hele mai la lakou ia ia, i ka lua o na makahiki, i mai la ia ia, Aole makou e huna mai ko makou haku aku, i ka pau ana o ko makou kala, a me ka makou holoholona ia oe i ko makou haku. Aohe mea i koe imua ou, o ko makou kino, a me ko makou aina wale no.

¹⁹ No ke aha la makou e make ai imua o kou mau maka, o makou a me ko makou aina! E kuai oe ia makou a me ko makou aina, no ka ai, a lilo makou a me ko makou aina i kauwa na Parao. E haawi mai hoi i hua, i ola makou, sole hoi e make, i ole ai e neoneo ka aina.

²⁰ Kuai iho la o Iosepa i ka aina a pau i Aigupita no Parao, no ka mea, kuai aku la na kanaka a pau o Aigupita i ko lakou aina, no ka mea, ua hauahana loa ka wi maluna o lakou, a lilo ae la ka aina no Parao.

²¹ A lawe ae la ia i kanaka o kekahikihi, a hoonoho ia lakou ma na kulanakauhale ma kela kihi o ka aina.

²² O ka aina o na kahuna, aole ia i kuai, no ka mea, na Parao mai, ka na kahuna, a ai iho la lakou i ka mea a Parao i haawi mai ai na lakou, no ia mea, aole lakou i kuai i ko lakou aina.

²³ Olelo iho o Iosepa i kanaka, Eia hoi, ua kuai au ia oukou i keia la no Parao, a me ko oukou aina; eia no ka hua na oukou e kanu i ka aina.

²⁴ Eia hoi kekahiki, i ka hua ana mai, e haawi oukou i ka hapalima na Parao, a koe no eha mau hapa na oukou, i mea kanu o ka aina, a i

mea ai na oukou, a na ko oukou kanaka, a i mea ai hoi na ka oukou kamalii.

25 I mai la lakou, Ua hoola mai oe ia makou, ina e loaa ia makou ka lokomaikaiia mai imua o na maka o ko'u haku, a e lilo auanei makou i poe kauwa na Parao.

26 Hoopaa iho la o Iosepa ia mea i kanawai, mai ia manawa mai, ma ka aina o Aigupita, na Parao ka hapalima o ka ai; o ka aina o na kahuna wale no ka i koe, aole ia i lilo na Parao.

27 Noho iho la o Israela, ma ka aina o Aigupita, i ka aina o Gosena, a loaa mai la ia lakou ka waiwai ilaila, a hanau mai la lakou, a lilo ae la i poe nui loa.

28 O na makahiki o ka noho ana o Iakoba i ka aina o Aigupita, he umikumamahiku: a o na makahiki a pau o ke ola ana o Iakoba, hookahi haneri makahiki a me kanahaku-mamahiku.

29 A kokoke aku la ka la e make ai o Israela, hea aku la ia i kana keiki ia Iosepa, i aku la ia ia, Ina i loaa mai ia'u ke alohaia imua o kou maka, e kau mai oe i kou lima malalo o ko'u uha. a e hana mai oe ia'u ma ka lokomaikai a me ka oiaio; ea, mai kanu oe ia'u ma Aigupita nei.

30 E moe au me o'u mau makua. E lawe oe ia'u mai Aigupita aku, a e kanu ia'u ma ko lakou ilina. I mai la kela, E hana no wau e like mo kau olelo.

31 I aku la keia, E hoohiki mai oe ia'u, a hoohiki iho la kela, a kulou hoomana iho la o Israela ma ke poo o kona wahi moe.

48

- ¹ A MAHOPE iho o keia mau mea, haiaku la kekahi ia Iosepa, Ua mai kou makuakane. Lawe ae la ia i kana mau keikikane, ia Manase laua o Eperaima.
- ² A hai ae la kekahi ia Iakoba, i ae la, Eia ae kau keiki o Iosepa, ke hele mai la iou nei. Hooikaika ae la o Israela, a noho iho la ma kahi moe.
- ³ Olelo aku la o Iakoba ia Iosepa, Ikeamai la ke Akua mana ia'u ma Luza, ma ka aina o Kanaana, a hoomaikai mai la ia ia'u.
- ⁴ Imai la, E hoomahuahua aku au ia oe; a e hoonui aku ia oe, a e hoolilo ia oe i lahuikanaka nui loa, a e haawi aku i keia aina, no kau poe mamo mahope ou, i hooilina mau loa.
- ⁵ A o na keiki au elua, i hanauia mai nau ma ka aiua i Aigupita nei, i ka wa mamua aku o ko'u hele ana mai ia oe i Aigupita nei, na'u no laua. O Eperaima a o Manase, e like me Reubena a me Simeona, pela no laua na'u.
- ⁶ A o kau mau keiki i hanauia mai nau, mahope mai o laua e kapaia lakou ma ka inoa o ko lakou mau kaikuaana ma ko lakou noho ana.
- ⁷ I ko'u hele ana mai, mai Padana mai, make ae la o Rahela ma ko'u aoao, ma ka aina o Kanaana, ma ke ala, kokoke e hikiaku i Eperata, a kanu iho la au ia ia malaila ma ke ala ma Eperata, oia hoi o Betelehema.
- ⁸ A ikeaku la o Israela i na keiki a Iosepa, ninauaku la ia, Owai laua nei?

- ⁹ I mai la o Iosepa i kona makuakane, O laua nei na keiki a'u, a ke Akua i haawi mai ai na'u ma keia wahi. I mai la kela, E hoonoho oe ia laua imua o'u, a e hoomaikai aku au ia laua.
- ¹⁰ Kaumaha no na maka o Israela, no ka elemakule, aole hiki ia ia ke nana; a hoonoho mai kela ia laua imua ona, a honi aku la oia ia laua, a puliki iho la.
- ¹¹ I ae la o Israela ia Iosepa, Aole au i manao e ike aku i kou maka, aia hoi, ua hoike mai ke Akua ia'u i kau mau keiki.
- ¹² A lawe mai la o Iosepa ia laua mawaena mai o kona mau kuli, a kulou iho la ia me ka maka ilalo i ka honua.
- ¹³ Lawe iho la o Iosepa ia laua a elua, ia Eperaima i kona lima akau, ma ka lima hemu o Israela, a ia Manase, i kona lima hemu ma ka lima akau o Israela, a hoonoho iho la ia laua imua ona.
- ¹⁴ Hohola aku la o Israela i kona lima akau, a kau iho la ma ke poo o Eperaima, oia hoi ke kaikaina, a i kona lima hemu hoi, ma ke poo o Manase: kau akamai no ia i kona lima; no ka mea, o Manase ka hanau mua.
- ¹⁵ Hoomaikai mai la oia ia Iosepa, i mai la, Na ke Akua, ka mea a ko'u mau makua o Aberahama a me Isaaka i hele ae imua ona, na ke Akua nana wau i malama mai, mai ko'u wa uuku a hiki loa mai i neia la;
- ¹⁶ Na ka Anela i hoopakele mai ia'u mai loko mai o ka hewa a pau, e hoomaikai ia mau keiki, a e heaia ko'u inoa maluna o laua, a me ka inoa o ko'u makua o Aberahama, a me Isaaka, a e laha loa laua i poe nui iwaena o ka honua.

- ¹⁷ A ike aku la o Iosepa, ua kauaku kona makuakane i kona lima akau ma ke poo o Eperaima, ua hewa ia i kona maka; hapai ae la ia i ka lima o kona makuakane e hoihoi ae, mai ke poe ae o Eperaima a i ke poo o Manase.
- ¹⁸ Iaku la o Iosepa i kona makuakane, Aole pela, e ko'u makuakane, o ke kaikuaana keia, e kau oe i kou lima akau maluna o kona poe.
- ¹⁹ Hoole mai la kona makuakane, i mai la, Ua ike au, e kuu keiki, ua ike au, e lilo no hoi ia i lahuikanaka a e nui no ia, aka, o kona kaikaina, e kela aku kona nui mamua o keia, a e lilo ana ia i lahuikanaka nui loa.
- ²⁰ Hoomaikai aku la oia ia laua ia la, iaku la, iloko ou e hoomaikai aku ka Israela, me ka i ana aku, E hoohalike mai ke Akua ia oe me Eperaima a me Manase. Hoonoho no oia ia Eperaima mamua o Manase.
- ²¹ I mai la o Israela ia Iosepa, Eia hoi, na kokoke au e make, a e noho ana no ke Akua me oukou, a e hoihoi aku no ia ia oukou i ka aina o ko oukou poe makua.
- ²² Ua haawi hoi au in oe i kekahipuu waiwai maluna o kou poe hanauna, i ka mea a'u i loaa ai ma ka lima o ka Amora, me kuu pahikaua a me kuu kakaka.

49

- ¹ KAHEA aku la o Iakoba i kana mau keikikane, iaku la, E houluulu mai ia oukou iho i hai aku ai au ia oukou i na mea e hiki mai ana io oukou la i na la mahope.

- ² E houluulu mai ia oukou iho, e lohe, e na keiki a Iakoba; e hoolohe mai ia Israela i ko oukou makuakane.
- ³ E Reubena e, o oe no ka'u hiapo, o ko'u ikaika, a me ka hoomaka ana o ka ui o'u; ke kela ana i ka hanohano, ke kela ana i ka mana:
- ⁴ He hu wale me he wai la, aole oe e kela aku, no ka mea, pii aku la oe i ka moe o kou makuakane: alaila oe i hoohaumia iho ai: pii aka la ia i kuu wahi moe.
- ⁵ O Simeona laua o Levi, he mau hoahanau laua: aia na mea hoomainoino ma ko laua hoolimalima.
- ⁶ Ma ko laua wahi ohumu aole e hele aku kuu uhane, ma ko laua halawai aole e hui pu ia'ku ko'u naui: no ka mea, no ko laua inaina pepehi iho la laua i ke kanaka, a no ko laua makemake oki iho la laua i ke olona wawae o ka bipi.
- ⁷ E hoinoia ka laua inaina, no ka mea, he ino ia, a me ko laua huhu, no ka mea, he koikoi ia: e mahelehele au ia laua iloko o ka Iakoba, a e hoopuehu au in laua iloko o ka Israela.
- ⁸ E Iuda e, o oe ka mea a na hoahanau ou e hoomaikai ai: o kou lima, aia no ia ma ka a-i o kou poe enemi; e kulou iho hoi na keiki a kou makuakane imua on.
- ⁹ He keiki a ka liona o Iuda, ua pii ae oe, e kuu keiki, mai ke pio ae: kukuli iho la ia, a moe iho la me he liona kane la, a me ka liona wahine; nawai ia e hoala ae?
- ¹⁰ Aole e lilo aku ke kookeo alii mai o Iuda aku, aole hoi ka mea webewehe kanawai maiwaena

aku o kona mau wawae, a hiki mai ai o Silo;
a ia ia ke akoakoa ana ae o na kanaka.

¹¹ E hikii ana i kana keikihoki i ke kumuwaina,
a me ke keiki a ka hokiwahine i ke ku-
muwaina maikai, holoi iho la ia i kona kapa
i ka waina, a me kona aahu i ke koko o ka
huawaina.

¹² E ulaula kona mau maka i ka waina, e keokeo
hoi kona mau niho i ka waiu.

¹³ E noho auanei o Zebuluna ma ke kahakai; oia no
ke kahakai no na moku; a e hiki aku kona
palena i Sidona.

¹⁴ He hoki ikaika no o Isakara e moe ana mawaena
o na halemalumalu:

¹⁵ Ike iho la ia i ka maha he maikai ia, a i ka aina
he oluolu ia, kulon iho la ia i kona hokua i ka
ukana, a lilo iho la ia i kauwn e auhauia'i.

¹⁶ E hooponopono o Dana i kona hanauna a
kanaka, e like me kekahi o na ohana o
Israela.

¹⁷ He nahesa o Dana ma kapa alanui, he moolele
ma ke ala; nana e nahu aku na kuekue-
wawae o ka lio, a e haule hope iho ka mea
e hooholo ana ia ia.

¹⁸ Ua kali au i kou hoola ana, e Iehova.

¹⁹ O Gada, e lanakila mai ka poe kaua maluna ona,
aka, e lanakila aku oia ma ka hope.

²⁰ Mai Asera mai kana ai momona, a e haawi aku
ia i na mea ono na na'lii.

- 21 O Napetali, he diawahine ia i kalaia'ku; ke hua mai nei ia i na huaolelo maikai.
- 22 He lala hua o Iosepa, he lala hua ma ka punawai: ke kolo ae nei na lala ona maluna o ka pa.
- 23 Ua hooeha nui mai, a ua pana mai hoi na mea pana ia ia, a ua inaina mai lakou ia ia.
- 24 Aka, ua mau no kona kakaka i ka ikaika, a ua hooikaikaia kona mau lima e na lima o ka Mea mana o Iakoba; (nolaila mai ke kahuhipa, ka pohaku no Israela;)
- 25 E ke Akua o kou makua, nana oe e kokua mai; e ka Mea mana loa hoi, nana oe e hoomaikai mai i na mea maikai o ka lani iluna, a o ka hohonu ilalo, i na mea maikai o ka u, a o ka opu.
- 26 Ua oi aku ka hoomaikai ana o kou makuakane maluna o na hoomaikai ana o na mauna mau, a hiki aku hoi i na mokuna o na puu kahiko loa: maluna no auanei ia o ke poo o Iosepa, a maluna hoi o ka piko o ke poo o ka mea i hookaawaleia ae mai koua poehanauna aku.
- 27 E haehae o Beniamina me he iliohae la, i ke kakahiaka e ai iho ia i ke pio, a i ke ahiahi e puunaue ia i ka waiwai pio.
- 28 O keia poe a pau, o ka poe ohana ia a Israela he umikumamalua: a oia ka mea a ko lakou makuakane i olelo mai ai ia lakou, a i hoomaikai mai ai ia lakou; i kela kanaka keia kanaka e like me ka hoomaikai ana, ana i hoomaikai mai ai ia lakou.

- ²⁹ Kauoha aku la oia ia lakou, i aku la, E huipu ana au me ko'u poe makua: e kanu pu hoi oukou la'u me na makua o'u ma ke ana maloko o ke kula o Eperona, no ka Heta,
- ³⁰ Ma ke ana iloko o ke kula ma Makepela, ma ke alo o Mamere, ma ka aina o Kanaana, o ke kula a Aberahama i kuai ai me Eperona, no ka Heta, i wahi ilina kupapau nona.
- ³¹ Malaila lakou i kanu ai ia Aberahama, a me kana wahine me Sara, a malaila lakou i kanu ai ia Isaaka a me kana wahine mo Rebeka, a malaila hoi au i kanu ai ia Lea.
- ³² Ua kuaiia ke kula, a me ke ana iloko me na mamo a Heta.
- ³³ A pau ka Iakoba kauoha ana i kana poe keiki, opili ae la ia i kona mau wawae maluna o kahi moe, kaili aku la ke aho, a huipu ia iho la ia me kona poe makua.

50

- ¹ HAULE iho la o Iosopa ma ka maka o kona makuakane, a uwe iho la maluna iho, a houi aku la.
- ² Kauoha ae la o Iosepa i kana mau kauwa, i na kahnuia e ialoa i kona makuakane, a ialoa no na kahuna ia Israela.
- ³ A pau ae la na la hookahi kanaha nona, no ka mea, oia na la e pau ai ka ialoa ana o ka poe i ialoaia; a kanikau iho la ko Aigupita nona i na la he kanahiku.
- ⁴ A pau ae la na la kanikau, olelo aku la o Iosepa i na kanaka o Parao, i aku la, Ina i loaa ia'u ka lokomaikaiia mai ia oukou, ke nei aku

nei au, e olelo aku oukou ma ka pepeiao o
Parao, me ka i aku,

⁵ Na ko'u makuakane i hoohiki ai au, i mai la ia,
E, e make ana au. E kanu oe ia'u, ma ka
lua kupapau a'u i kohi ai no'u ma ka aina
i kanaana. Malaila oe e kanu ai ia'u. E
ae mai hoi oe ia'u ke pii aku a kanu i kuu
makuakane, a hoi hou mai no.

⁶ I mai la o Parao, O hele e kanu i kou makuakane,
e like me kau i hoohiki ai nana.

⁷ Pii aku la o Iosepa e kanu i kona makuakane, a
pii pu aku la me ia na kauwa a Parao a pau,
a me na luna kahiko o kona hale, a me na
luna kahiko a pau o ka aina o Aigupita:

⁸ O ko Iosepa poe a pau me kona poe hoahanau,
a me ka poe a pau o kona makuakane. O na
kamalii, a me na hipa, a me na bipi, oia wale
no ka lakou i waiho ai mahope, ma ka aina
i Gosena.

⁹ Pii pu aku la me ia na kaa a me na hoohololio; he
poe nui loa.

¹⁰ Pii aku la lakou i kahi hehi palaoa o Atada, ma
o aku o Ioredaue, a malaila lakou i uwe ai
me ka uwe nui loa, a kanikau iho la lakou i
kona makuakane i na la ehiku.

¹¹ A ike ae la ka poe noho ma ia aina, o ko Kanaana
i ua kanikau nei, ma kahi hehi palaoa o
Atada, olelo iho la lakou, He kanikau nui loa
keia a ko Aigupita: no ia mea, ua kapa aku
la ka inoa o Abelamizeraima, aia ma o aku
o Ioredane.

¹² A hana aku la kana mau keiki ia ia e like me kana
i kauoha ai ia lakou.

- ¹³ Lawe aku la no kana mau keiki ia ia, i ka aina o Kanaana, a kanu iho la ia ia ma ke ana iloko o ke kula, ma Makepela, na Aberahama i kuai ia kula i wahi ilina nona, me Eperona no ka Heta, aia ma ke alo o Mamere.
- ¹⁴ A pau ke kanu ana i kona makuakane, hoi aku la o Iosepa i Aigupita, oia, a me kona poe hoahanau a pau i hele pu me ia e kanu i kona makuakane.
- ¹⁵ A ike iho la na kaikuaana o Iosepa, ua make ko lakou makuakane, olelo lakou, E ukiuki mai auanei o Iosepa ia kakou; e oiaio no, e hoopai mai ia i ka hewa a pau a kakou i hana aku ai ia ia.
- ¹⁶ Kauoha ae la lakou ia Iosepa, i ae la, Kauoha mai la kou makuakane, mamua o kona make ana, i mai la,
- ¹⁷ E i aku oukou ia Iosepa, Ke nonoi aku nei makou ia oe, e kala oe i ka hewa o kou poe kaikuaana, a me ko lakou hala, no ka mea, ua hana hewa lakou ia oe. Ano hoi, e kala oe i ka hewa o na kauwa a ke Akua o kou makuakane. Uwe iho la o Iosepa i ka lakou olelo ana mai ia ia.
- ¹⁸ Hele ae la hoi kona poe kaikuaana, haule iho la ma kona alo, i ae la, O kau mau kanwa makou.
- ¹⁹ I mai la o Iosepa ia lakou, Mai makau oukou, Owau anei ma ko ke Akua wahi?
- ²⁰ I manao no oukou e hana ino mai ia'u, a hoololi mai ke Akua ia mea, i mea maikai, e hana mai ai e like me ia i neia la, e hoola i na kanaka he nui loa.

- 21 Mai makau: na'u no oukou e malama aku i ka ai, a me ka oukou poe keiki. Hooluolu mai la ia ia lakou, a olelo lokomaikai mai la i ko lakou naau.
- 22 Noho iho la o Iosepa ma Aignpita, oia, a me ka ohana a kona makuakane: a o na makahiki o ko Iosepa oia ana, hookahi haneri a me ka umi keu.
- 23 A ike iho la o Iosepa i na keiki a Eperaima a me ke ku akolu, a me na keiki a Makira, ke keiki a Manase, o ka mea i hanauia ma na kuli o Iosepa.
- 24 I ae la o Iosepa i kona poe hoahanau, E make ana au. E oiaio no, e ike mai ke Akua ia oukou, a e hoihoi aku ia oukou, mai keia aina aku, a ka aina ana i hoohiki ai ia Aberahama a ia Isaaka, a ia Iakoba.
- 25 Na Iosepa no, na mamo a Israela i hoohiki ai, i ae la, E oiaio no, e ike mai ke Akua ia oukou, a e lawe aku oukou i ko'u mau iwi, mai anei aku.
- 26 A make iho la o Iosepa ma ka makahiki o kona ola ana, hookahi haneri a me ka umi keu. A ialoa iho la lakou ia ia a waiho iho la maloko o ka pahu ma Aigupita.

**Baibala Hemolele
The Holy Bible in the Hawaiian language of the United
States, 1868 revision**

Public Domain

Language: 'Olelo Hawai'i (Hawaiian)

Translation by: na na misionari i pai

2015-11-10

PDF generated using Haiola and XeLaTeX on 11 Nov 2022 from source files
dated 9 Oct 2020

4fde4536-9f74-574b-8404-d9ec34a30cbb